

EL SANTO EVANGELIO SEGUN

SAN MATEO

1 ¹ Jesucristuqui Davidž majchmajtquiztan, nižaza Abrahamž majchmajtquiztan tjoñitača. Jesucristuž tuquita atchi ejpnacača tinacaqui.

² Abrahamqui Isaacž ejptača. Isaacqui Jacobž ejptača. Jacobqui Judaž ejptača, niiž jilanacžtanpacha. ³ Judaqui Fares ejptača, Zaratanpacha. Tamarqui Fares Zara maatača. Faresqui Esromž ejptača. Esromqui Aramž ejptača. ⁴ Aramqui Aminadabž ejptača. Aminadabqui Naasonž ejptača. Naasonqui Salmonž ejptača. ⁵ Salmonqui Booz ejptača. Rahabqui Booz maatača. Boozqui Obedž ejptača. Rutqui Obedž maatača. Obedqui Isafž ejptača. ⁶ Isafqui David cjita chawc jilirž ejptača. Davidqui Urías tjunatan zalžcu Salomonž ejptača.

⁷ Salomonqui Roboamž ejptača. Roboamqui Abías ejptača. Abiasqui Asaž ejptača. ⁸ Asaqui Josafatž ejptača. Josafatqui Joramž ejptača. Joramqui Uzías ejptača. ⁹ Uziasqui Jotamž ejptača. Jotamqui Acaž ejptača. Acazqui Ezequías ejptača. ¹⁰ Ezequiasqui Manasés ejptača. Manasesqui Amonž ejptača. Amonqui Josías ejptača. ¹¹ Josiasqui Jeconías ejptača, niiž jilanacžtanpacha. Nii

timpuqui Israelit žoñinacaqui preso chjitžtatača Babilonia cjita yokquin.

¹² Jalla nekztanaqui Jeconiasqui Salatielž ejptača. Salatielqui Zorobabelž ejptača. ¹³ Zorobabelqui Abiudž ejptača. Abiudqui Eliaquimž ejptača. Eliaquimqui Azorž ejptača. ¹⁴ Azorqui Sadocž ejptača. Sadocqui Aquimž ejptača. Aquimqui Eliudž ejptača. ¹⁵ Eliudqui Eleazarž ejptača. Eleazarqui Matanž ejptača. Matanqui Jacobž ejptača. ¹⁶ Jacobqui Josež ejptača. Josequi María lucutača. Mariiqui Jesús majtchinča. Nižaza Jesusaqui Yooz cuchanžquita Cristo cjitazakazza.

¹⁷ Tunca pusin atchi ejpnacaž kamta wachquichiča Abrahamž timpuquiztan Davidž timpucama. Nižaza tsjii tunca pusin atchi ejpnacaž kamta wachquichiča Davidž timpuquiztan Israel žoñinacaž Babilonia cjita yokquin preso chjichta timpucama. Nižaza tsjii tunca pusin atchi ejpnacaž kamta wachquichiča Babilonia yokquin chjichta timpuquiztan Cristuž nasta tjuñicama.

JESUCRISTUŽ NASTA

¹⁸ Jalla tužuča Jesucristuž nastaqui. Niiž maa María cjitiqui Josižtan zalzjapa kazzintača. Ima lucžtan

kamcan ica cjissinča Yooz Espiritu Santuž cjen. ¹⁹Naaža lucu José cjitaqui Yooz kuzcama kamñitača. Niiž tjun María icaž cjen Josequi kuz turwaysi cjissiča. Nekztan jamazit jaljtis pecatča. Kjanacama ultimu jaljtisasž niiqui, Maríqui žoñiž chjaawjkatta cjitasatča, ana honorchiz. ²⁰Jalla nuž jaljtis pinsan, Yooz Jilirž anjilaqui wiiquin niižquiz tjonziča, tuž cjican:

—José, Davidž majchmaati, Yooz Espiritu Santuqui am maataka t'icziča. Jalla nižtiquiztan ana jiwjata naatan zalzqui. ²¹Nižaza majjtanaqui, wawž tjuuqui Jesús cjitaž cjequiča. Jalla niiqui niiž wajtchiz žoñinaca ujnacquiztan liwriyaquiča. —Nuž cjichiča anjilaqui. ²²⁻²³Tuqui timpuquiztanpacha Yooz Jiliriqui profetžquiz chiikatchiča, tuž cjican:

“Tsjaa tunsill turqui icaquiča.

Nekztan lucmajch wawa mataquiča. Nii wawaqui Emanuel cjitaž cjequiča”.

Emanuelqui tuž cjiča: učumnacatanča Yoozqui. Nii profetž takucama cumplissiča Jesucristuž nastanaqui.

²⁴Jalla nekztan Josequi tjaji wajtžcu, Yooz anjilaž mantitacama ojkchiča. Mariatan zalziča. Nižaza persun tjunjapa ricujchiča. ²⁵Naaža majtz tjuñicama Josequi Maríatan anapan ultimu lucutiñi paasiča. Jalla nižtiquiztan ana zalzi cjichucatača, pero chicapan kamñitača. Wawa majttan, Jesús cjita tjuužtan tjuuzkatchiča.

MAGONACA RISPITI TJONCHİČHA

2 ¹Belén cjita wajtquiz nižaza Judea cjita yokquin Jesuacui majttatača. Nii nacionž chawjc jiliritača Herodes cjitaqui. Jalla nii tuquita timpuquiz jalla tužu

watchitakalča. Nii nacionquin Jerusalén cjita wajtquin tuwanchuctan tsjii kjaž žoñinacaqui irantižquichiča. Mago cjita žoñinacatača ninacaqui, warawar puntu istutiñi. ²Jerusalén wajtquiz irantižcu pewcpewcziča tuž cjican:

—Uzca nassiča judío žoñinacž chawjc jiliriqui. ¿Jakziquintaya? — jalla nuž cjican pecunchiča. Nižaza cjichiča, —Wejrnacqui tuuna žejlcan niiž nastiquiztan warawara cherchinča. Jalla nižtiquiztan nii rispiti tjonchinča, —jalla nuž cjican mazziča.

³Herodes cjita jiliriqui magonacaž quint'ita nonžcu, ancha pinsamintu apazziča persun kuzquiz. Nižaza Jerusalén wajtquiz kamñi žoñinacami ancha kuzquiz pinsatča. ⁴Jalla nekztanaqui nii rey jiliriqui timplu chawjc jilirinaca, nižaza lii tjaajiñi maestrunaca kjawziča. Ninacžquiz pewcziča:

—¿Jakziquint Cristuqui majtta cjesaya? —jalla nuž cjican pewcziča.

⁵Ninacaqui kjaaziča tuž cjican:

—Belén wajtquinča, Judea yokquin. Tsjii profetaqui cjiřchiča, tuž cjican:

⁶“Judá yokquinča Belén

watjaqui. Jalla nii watjapanča chekanaqui, parti watjanacquiztan Judá yokquin. Jalla nekztan tsjii chawc jiliriqui ulnaquiča. Jalla niiqui wejt Israel žoñinacž mantaquiča; nižaza cwitaquiča”.

⁷Jalla nekztanaqui Herodes jiliriqui magonaca jamazit kjawziča. Nekztanaqui zumpacha pewcziča, čhjul timpuquiztan nii warawaraqui paristčhaja, jalla nii. ⁸Jalla nekztanaqui Herodesqui magonaca cuchanchiča Belén watja, jalla tuž cjican:

—Nii Belén watja oka, nižaza nii wawž puntu zumpacha pjurwiit'aquičha. Wawa watžcuqi, wejtquiz mazcaquičha. Wejrmi zakal ojkz pecučha, wawa rispiti.

⁹Jalla nekztan Herodes jiliriž chiižinta taku nonžcu, magonacaqui ojkchiča. Jerusalén watja ulantan, nii tuuna cherta warawaraqui ninacž tucquin wilta okatča. Jakziquin nii wawa želatčhaja, jalla nii juntun tsijsiča warawaraqui. ¹⁰Nii warawara tsijsi cheržcu, magonacaqui ancha wali cuntintutača. ¹¹Nekztanaqui kjuya luzcu, wawa cherchiča Marii maatanpacha. Jalla nekztanaqui ninacaqui quillziča wawa rispitsjapa. Paaz caja cjetžcu, wawžquiz zuma cusasanaca onanchiča, kori, insinzu, mirra. Jalla nuž nii wawžquiz rispitičiča. ¹²Jalla nekztanaqui wiiquin Yoozqui magonacžquiz chiižinčiča, ana Herodes kjutni quepajo. Jalla nižtiquiztan persun watja quejpchiča yekja jicz kjutni.

EGIPTO YOKQUIN ATIPASSIČHA

¹³Jalla nekztanaqui nii magonacž ojkta tsjii Yooz Jilirž anjilaqui wiiquin Josežquiz parisisquichiča. Nekztan tuž cjichiča:

—Žaazna, tii wawa chjicha maatanpacha. Egipto yokquin oka, atipasjapa. Herodes jiliriqi tii wawaž kjuraquičha conzjapa. Jalla nii Egipto yokquin am želaquičha, čhjulorat wejrqui amquiz wilta chiyachaja, jalla niicama. —Jalla nuž wiiquin chiičiča anjilaqui.

¹⁴Jalla nuž anjilaž chiiitiquiztan Josequi nii orapacha žaaziča. Nekztan wawžtan maatan chjitchiča. Nii weenpacha ulanchiča Egipto yok kjutni. ¹⁵Jalla nicju kamchiča Herodes ticzcam. Niiž tuquitanpacha

Yooz Jiliriqi profetžquiz chiikatchiča, tuž cjican: “Egipto yokquiztan wejt persun Maati kjawznacha”. Jalla nii profetž chiita takuqui cumplissičha.

HERODESQUI JESUSA CONKATZ PECATČHA

¹⁶Herodesqui kuzquiz tantiyassičha, “Magonacaqui wejttañž burlaskalak” cjican. Jalla nižtiquiztan walja žawjziča. Jesucristo majtta timpu tantiichiča magonacž maztiquiztan. Jalla nuž tantižcu mantichiča Belén wajtquin nižaza nii wajtž tjiyaran tjapa lucmajch wawanaca pizc watquiztan kozzuc conajo. ¹⁷Jalla nuž cumplissičha Jeremías cjita profetž cijjrta takuqui. ¹⁸Tuqui timpuqui Jeremiasqui cijjrchiča, tuž cjican:

“Ramá cjita wajtquin wali chawc llaqui želaquičha nižaza alto joržtan kaaquičha. Raquel cjitiqi ancha kaaquičha naaža maatinacžquiztan. Ana wira kuztami ch'uj cjequičha. Nižaza naaža maatinacaqui ticziž cjequičha”.

Jalla nuž cijjrchiča Jeremías cjita Yooz taku paljayni profetaqui.

¹⁹Wiruñauqi Herodes cjita jiliriqi ticziča. Jalla nekztanaqui tsjii Yooz Jilirž anjilaqui Josežquin wilta parisisquichiča wiiquin. Nii oraqui Josequi Egiptuquin tira želatča. Anjilaqui cjichiča:

²⁰—Žaazna, tii am uza chjicha maatanpacha. Israel yoka quepa. Am wawa conz pecni Herodes jazic ticziča.

²¹Jalla nuž cjen Josequi žaažcu Israel yokquin nii uztan maatan chjitchiča.

²²Israel yokquin Judea provinciquin Arquelao cjita jiliritača mantiñiqui. Jalla niiča Herodes majchqui. Niiž ejpž

puestuquizpacha luzzitača. Josequi nii quintu zizcu, Judea yokquin kamz jiwjatchiča. Nekztan tsjii anjilaqui wiiquin Josežquiz paljaychiča, Judea yokquiz ana kamajo, antiz Galilea yokquin okajo. Jalla nekztan Galilea yok kjutni ojkchiča. ²³ Jalla nii yoka irantižcu, Nazaret cjita wajtquiz kamchiča. Tuqui timpuqui Yooz cuntiquiztan chiiñi profetanacaqui mazinchiča, Jesusaqui “nazareno” cjitazakaz cjequiča, jalla nuž cjican mazinchiča. Nazaret wajtquiz kamcan profetanacaž chiita taku cumplissiča.

JUAN BAUTISTA YOOZ TAKU PALJAYŇI

3 ¹ Niiž wiruñaquí Juan Bautistaquí Judea provinciquin želatča, ch'ekti yokquin. Yooz taku paljayatča, ² tuž cjican:

—Kuznacaž campiya. Arajpach Yoozqui waj mantaquiča. Nii timpuqui žcatžinžquiča.

³ Tuqui timpuqui Isaías cjita profetaquí Juanž puntuquiztan cjiyrchiča, tuž cjican:

“Ch'ekti yokquin tsjii žoñž joraž nonžta cjequiča. Alto jorquiztan tuž cjican chiyaučiča: ‘Tsji chawjc Jiliriz tjonaučiča. Jaziqui zuma kamañ jicz tjaczna. Tsji jicztakaz ančuca kuznaca zumpacha azquicha, nižaza zuma ligitumapanž cje’”.

Jalla nuž cjiyratača Juanž puntuquiztan.

⁴ Juanž zquitiqui camello cjita animalž chomquiztan watstatača. Niiž cinturonaquí zkizitača. Nižaza langosta cjita kolta animalanaca lujlñitača. Munti misq'uinaca lujlñizakaztača. ⁵ Walja žoñinacaquí Juanž taku nonžni tjonñitača,

Jerusalén chawc wajtquiztan, nižaza Judea yokquiztan, nižaza Jordán cjita puj žcatirantan. Walja žoñinaca tjonñitača. ⁶ Jakziltat niiž persun ujnaca mazzaja jalla ninacžquiz Juanqui bautissiča Jordán cjita pujquiz. ⁷ Nii tama žoñinacžtanpacha walja fariseonacami, nižaza saduceonacami jalla nii jilirinacami Juanžquin tjonchizakazza bautista cjisjapa. Jalla ninaca cheržcu, Juanqui tuž chiižinchiča:

—Zkoražtakaz incallni žoñinaca. Yooz Ejpuqui ujchiz žoñinaca wajillaž casticaquiča. ¿Ject ančucaquiz nii mazzejo? ¿Nii casticu atipzjapa wejtquinž tjonkaya? ⁸ Kuz campiichinčucžlaj niiqui, zumapankaz kamaquiča, ančuca campiita kuz kjanapacha tjeezjapa. ⁹ Ančhucqui anaž mit kuzziz porapat chiyasaquiča, tuž cjican: “Wejrnacqui Abrahamž majchmaatinacžquiztanpacha tjoninča, Yoozqui anaž wejrnaca casticasača”. Jalla nižta ana chiihiiz waquisiča. Yoozqui tii maznacquiztan žoñiz cjisakatasača, Abrahamž majchmaatinaca cjisjapa. ¹⁰ Ančhucqui tsjii frut muntiztakazza. Ana zuma fruta pookni muntiqui k'aatztaž cjequiča jir achžtan. Jalla nuž k'aatztiquiztanauqi, ujtaž cjequiča. Jalla nižta irataž ančucaquiz wataquiča. Ana zuma kamañchiz žoñinaca casticta cjequiča. ¹¹ Wejrqui weraral chiyuča. Kjajtankal bautisuča, ančuca kuznaca campiitiquiztan. Tsjiiqui wejt wirquin tjonča. Jalla niiqui Espiritu Santužtanami nižaza arajpach ujžtanami bautisaquiča. Jalla niiča wejtquiztan tsjan juc'ant poderchizqui. Niižquiz atintisjapa anal waquisuča, niiž čhjata jeržcu chjojkzinimi. Inakaztča wejrqui.

¹² Ančhucqui trigo zkalažtakazza. Nii tjoñi jiliriqui trigonaca kjojaquičha. Nekztan itzanacami zuma trigumi pjalznaquičha. Nii zuma triguqui ricujtaž cjequičha. Niiž persun kjuyquin majctaž cjequičha. Nii itzanacazti liwj ujtaž cjequičha, ana wira tjesñi ujquiz. Jalla nižta irataž ančhucquiz wataquičha.

JESUSAQUI BAUTISTATAČHA

¹³ Niiž wiruñaquí Jesusaquí Galilea yokquiztan Jordán cjeta pujquin ojkchičha, jakziquint Juan želatčhaja, jalla nicju. Bautiskatzjapa Juanžquin ojkchičha. ¹⁴ Jesusiž irantitan, Juanqui ana nii bautis pecatčha. Jalla tuž cjichičha:

—Amž wejr bautis waquizičha. ¿Am wejtquiz tjonkaya? ¿Weriž bautista cjisjapaya? —Jalla nuž cjichičha Juanqui.

¹⁵ Nekztan Jesusaquí kjaazičha, tuž cjican:

—Anzikam wejr bautisaquičha. Yooz mantitacama liwj cumplis waquizičha učhumqui. —Jalla nuž kjaaztiquiztan Juanqui “iyaw” cjichičha.

¹⁶ Nekztanaquí Juanqui Jesusa bautissičha. Kjazquiztan ulnan, nii orapacha arajpacha cjetzičha. Nekztan Jesusaquí cherzičha Yooz Espíritu Santo palomažtakaz chjiwžquini. Jalla niižuntuñpacha Espíritu Santuquí irantižquichičha. ¹⁷ Nekztanaquí arajpachquiztan tsjii jora paljayžquini nonzičha, jalla tuž cjiñi:

—Tiičha wejt ultim k'ayi Maatiqui. Tiiž cjen ancha cuntintutčha wejrqui. —Jalla nuž cjichičha nii tsewctan chiižquini joraquí.

JESUSAQUI DIABLUŽ YANŽTA

4 ¹ Jalla nekztanaquí Jesusaquí Jordán cjeta pujquiztan ojkchičha.

Nuž okan, Espíritu Santuquí Jesusa chjitchičha ch'ekti yokquin, Satanás diabluž yanžta cjisjapa. Satanasquí Jesusa ujquiz tjojtskatz pecatčha.

² Jalla nijwc žejlcan, Jesusaquí pusi tunc tjuñi pusi tunc arama ana čhjeri lujlchičha. Jalla nii pusi tunc tjuñi wattiquiztan ancha čhjeri eecskatchičha. ³ Jalla nekztanaquí diabluquí Jesusižquiz macjatchičha ujquiz tjojtskatz yanzjapa. Jalla tuž cjichičha:

—Amquí ultim Yooz Maatimžlaj niíquí, tii maznacquiztan t'anta tuckatalla.

⁴ Jesusaquí kjaazičha, tuž cjican:

—Cjijrta Yooz takuquí tuž cjichičha: “Žoñinacaquí anaž čhjeržtan alaja žetasačha. Yooz takučha cekanaquí, jalla ničha ultim čhjerižtakazquí”. Jalla nuž kjaazičha Jesusaquí.

⁵ Jalla nekztanaquí diabluquí Jesusa chjitchičha Jerusalén, Yooz illzta chawjc watja. Jalla nicju timplu tsewcta pjurniguin yawkatchičha.

⁶ Nekztan diabluquí cjichičha:

—Cjijrta Yooz takuquí tuž cjichičha:

“Yooz Ejpquí niíž anjilanaca mantaquičha am cwitajo. Ninacž persun kjaržtan am cwitaquičha, ana am kjojcha chjojričta cjeýajo mazquizimi”.

Jazic, ultim Yooz Maatimžlaj niíquí, tsewctan kozzuc tii yokquiz layzca. —Jalla nuž cjichičha nii diabluquí.

⁷ Nekztanaquí Jesusaquí kjaazičha tuž cjican:

—Cjijrta Yooz takuquí zakaz cjichičha: “Žoñiqui ultim arajpach Yooz ana inakaz nuž yanznaquičha”. Jalla nuž cjijrtačha.

⁸ Jalla nekztanaquí wilta ujquiz tjojtskatz yanzjapa, diabluquí Jesusa chjitchičha pajk cur puntiquin. Jalla niwjc chjitžcu,

diabluqui tjapa tii muntuquiz žejlñi nacionanaca nižaza tjapa ninacž cusasanacžtanpacha, nižaza tjapa ninacž honoranacžtanpacha jalla ninaca diabluqui Jesusižquiz tjeeziča.

⁹Nekztan nii diabluqui cjichiča:

—Tjapa tinaca amquiz tjaasača, wejtquizim quillzaja, nižaza wejr rispitchaja, niiqui.

¹⁰Jalla nižtiquiztan Jesusaqui kjaaziča, tuž cjican:

—Satanás, wejtquiztan zaraka amqui. Cjijrta Yooz takuqui tuž cjiča: Yooz Jiliržquinkaz rispita, nižaza nii alaja sirwa. Niikazza am Yooz Jiliriqui.

¹¹Jalla nuž Jesusiž chiitiquiztan diabluqui Jesusižquiztan zarakchiča. Nekztan tsjii kjaž anjilanacaqui Jesusižquin atinti tjonchiča.

JESUSAQUI GALILEA YOKQUIN OJKCHIČHA

¹²Niž wiruñaquí Jesusaqui quintu nonchiča, Juan carsilquiztača, jalla nii. Jalla nii quintu nonžcu, Galilea yokquin ojkchiča. ¹³Pero Nazaret wajtquin ana kamchiča; antis Capernaum wajtquin kami ojkchiča. Capernaum watjaqui kot atquiztača, Zabulón yokquin nižaza Neftalí yokquintača. ¹⁴Jalla nuž ojktiquiztan Isaías profetaž cjijrta taku cumplissiča.

¹⁵Jalla tuž cjijrchiča Isaías profetaqui:

“Zabulón, nižaza Neftalí, am yokaqui kot atquizza, nižaza jiczquizza Jordanquiztan tuwanchuc. Nižaza Galilea yokquínča. Jalla nii Galiliiquinaqui yekja wajtchiz žoñinacž kamča. ¹⁶Am yokquin žejlñi žoñinacaqui zumchiquiz kamča, ana zuma kamañquiz. Ninacaqui tsjii

žoñi cheraquiča. Nii žoñiqui zuma kamaña tjeeznaquiča, zuma kjanažtakaz. Ticzi žoñinacžtakaz kamča; anaž Yooz kamaña zizza. Pero kjanapachaž Yooz zuma kamaña tjeezta cjequiča.”

¹⁷Jalla nekztanaqui Jesusaqui Yooz puntu kjanzt'i kallantichiča, tuž cjican:

—Kuznaca campiya. Arajpach Yooz waj mantaquiča. Jalla nii timpuqui žcatžinžquiča. —Jalla nuž paljaychiča.

PAJKPIC CH'IZ TANŇI ŽOÑINACA JESUSIŽ KJAWŽTA

¹⁸Jesusaqui Galilea cjita kot at tjiyaranž okatča. Jalla nuž ojkan pucultan jilazullca žoñinaca cherchiča. Tsjiiqui Simón cjitatača, nižaza Pedro cjitazakaztača. Tsjiiqui Andrés cjitatača. Jalla ninacaqui ch'iz tanñinacatača. Nii oraqui ninacaqui ch'iz tanz kjazquiz tjojtsi želatča.

¹⁹Jalla ninacžquiz Jesusaqui tuž cjican paljaychiča:

—Wejtta ch'iz ojklayñi cjee. Jaknuž ch'iz juntichamžlaja, jalla nižta irata ančhucqui Yooztajapa žoñinaca juntaquiča.

²⁰Jalla nuž chiitiquiztan nii pucultan žoñinacaqui nii orapacha ch'iz tanz eccu, Jesusižtan ch'iz ojklaychiča.

²¹Jalla nekztanaqui tsjii koloculla najwcjapa ojkcucu Jesusaqui tsjii pucultan jilazullca žoñinaca cherchizakazza. Tsjiiqui Jacobo cjitatača. Tsjiiqui Juan cjitatača. Zebedeož majchtača. Niiž ejpžtanpacha warcuquiz želatča, ch'iz tanz azquichcan. Jalla nii cheržcu, Jesusaqui ninaca kjawziča. ²²Nekztan nii orapacha warcumi niž ejpmi eccu, Jesusižtan ch'iz ojklaychiča.

ŽOŇINACA JESUSA APŽA

²³Tjapa nii Galilea cjita yokaran ojklajčiha, zapa ajcz kjuyquiz Yooz puntu tjajincan. Nižaza paljayčiha, Yooziž mantita žoñinacaž cjee, cjican. Nižaza tjapaman laanaca čhjetinčiha.

²⁴Jesusiž ojklajta, jalla nii quintuqui tjapa Siria yokquin ojkičiha. Jalla nižtiquiztan, tjapaman conchiz žoñinacami, nižaza tjapaman laa ayiñi žoñinacami, nižaza zajraž tanta žoñinacami, nižaza t'ucur žoñinacami, nižaza ana ojklajy atñi zuch žoñinacami, tjapaman laanaca Jesusižquin chjižtatača. Nekztanaqui Jesusaqui nii laanaca čhjetinčiha.

²⁵Galilea žoñinacaqui nižžquin walja apžquichiča, nižaza Decápolis watjanacquiztan žoñinacami, nižaza Jerusalén wajtquiztan žoñinacami, nižaza Judea yokanacquiztan žoñinacami, nižaza Jordán pujž tuwanchuctan žoñinacami. Tjapa nii žoñinacami jalla nuž Jesusa apziča.

JECTNACAT CUNTINTU ŽOŇINACA

5 ¹Walja tama žoñinaca cheržcu, Jesusaqui tsjii kolta curulla yawchiča. Jalla nekztan nii curullquin julziča. Nižaza niž kjawžta žoñinacaqui niž muytata ajczyča.

²Jalla nekztan Jesusaqui ninacžquiz tjajñi kallantichiča, tuž cjican:

³—Jecnatat “wejrqui ujchizpanča” cjican persun kuzquiz sint'ičhaja, jalla ninacaž Yooz wajtchiz žoñinaca cjequiča. Nekztanqui cuntintuž cjequiča.

⁴Jecnatat persun ujquiztan llaquita žejlčhaja, jalla ninacžquiz Yoozqui kuznaquiča. Nekztan cuntintuž cjequiča ninacaqui.

⁵Jecnatat humilde kuzziz cječhaja, jalla ninacžquiz Yoozqui irinsaž

tjaaquiča, ew yoka. Nekztan cuntintuž cjequiča.

⁶Jecnatat Yooz kuzcamakaz kamz ancha pecčhaja, jalla ninacžquiz Yoozpanž zuma kamzjapa yanapaquiča. Nekztan cuntintuž cjequiča.

⁷Jecnatat parti žoñinacžtajapa oksñi kuzziz cječhaja, jalla ninacžquiz Yoozqui zakaz oksnaquiča. Nekztan cuntintuž cjequiča.

⁸Jecnatat ancha zuma kuzziz cječhaja, jalla ninacaqui Yooz cheraquiča. Nekztan cuntintuž cjequiča.

⁹Jecnatat pasinsis kuzziz kamñi cječhaja, jalla ninacaqui Yooz maati cjitaž cjequiča. Nekztan cuntintuž cjequiča.

¹⁰Jecnatat Yooz kuzcama kamtiqiztan chjaawjta sufračhaja, jalla ninacaž Yooz wajtchiz žoñinaca cjequiča. Nekztan cuntintuž cjequiča.

¹¹Jecnatat weriž cjen žoñinacaž chjaawjta cječhaja, nižaza kijčta cječhaja, nižaza tjapaman toscar tawkžtan quintra ch'aanita cječhaja, jalla ninacami cuntintuž cjequiča.

¹²Jecnatat weriž cjen jalla nižtanaca sufrichi cječhaja, jalla ninacžquiz Yoozqui arajpachquin wali pajk honora tjaaquiča. Jalla nižtiquiztan tii muntuquiz kamcan, cuntintukaž cjee. Ančhucqui cjuñzna. Yooz cuntiquiztan chiiñi profetanacaqui nižta zakaz sufrichiča tuqui timpuquiztanpacha.

CRIIICHINACŽ PUNTU

¹³Jesusaqui tjajinchizakazza: —Ančhucqui tii muntuquiz kamcan yacu cuentažtakazza, parti žoñinacžtajapa. Pero yacuqui lak'až cjesaž niiqui, čkjažpant wilta walipan cjisnasajo? Anapanž cjesača.

Nekztan anaž čhjuljapami sirwasača; tjojtapanž cjesača; nekztan žoñinacaž tjecžtaž cjequiča.

¹⁴ Ančhucui tii muntuquiz kamcan, parti žoñinacžtajapa kjana cuntažtakaz cjesača, zuma kamaña zizajo. Tsjii curquiz kjuyta watjaqui, ana chjojžta cjesača. ¹⁵ Tsjii lamparaqui tjeežtaž cječhaj niiquei, anapanž cajón koztan nonžta cjesača. Lamparaqui tjeežtaž cječhaj niiquei, tsewc tsijjptapanž cjesača, tjapa nii kjuyquiz žejlñi žoñinacžtajapa kjanajo. ¹⁶ Jalla nuž ančhucui lamparažtakaz cjee, žoñinacžtajapaqui. Kjanapacha zuma kamañchiz cjee. Nekztan žoñinacaqui ančuca zuma kamaña cheržcu, ančuca arajpach Yooz Ejpžquin honora tjaaquiča.

LII PUNTU

¹⁷ Jesusaqui tjaajinchizakazza: —Wejrqui ana tjonchinča Moisés lii tjabatanskatzjapa, nižaza profetanacaž tjaajintanaca tjabatanskatzjapami. Jalla nižta anaž pinsa ančhucui. Wejrqui ana tjonchinča nii tuquita Yooz tjaajintanaca tjatñiquei; antis tjonchinča cumpliskatzjapa. ¹⁸ Weraral chiižinuča. Tuquita Yooziž tjaata liiquiztan tjapa puntumi tjapa letrami anaž tjabatanta cjequiča, tjappacha cumpliscama. Ima tii muntumi arajpachami tucužinžnan, nii liiquei anapanž tjabatantaž cjequiča. ¹⁹ Jalla nižtiquiztan jequit tuquita Yooziž tjaata liiquiztan tsjii mantita, kolta lii cjenami, ana pajz pecčhaj niiquei, nižaza yekjap žoñinacžquiz nižtapacha tjaajinčhaja, jalla nii žoñiquei arajpach Yooz wajtquin anaž čhjul honorchiz cjequiča. Pero jequit nii tuquita lii mantita cazačhaja, nižaza yekjap žoñinacžquiz nižtapacha tjaajinčhaja, jalla nii žoñiquei arajpach

Yooz wajtquin chekan honorchiz žoñiž cjequiča. ²⁰ Ančhucacuiž wejr chiižinuča. Lii tjaajiñi maestruncami, nižaza fariseo žoñinacami žejlča. Pero ančhucui ninacžquiztan anaž juc'anti Yooz mantitacama kamačhaj niiquei, anapanž arajpach Yooz wajtquin luzasača. Yooz mantitacama kamstanča, arajpach Yooz wajtquin luzjapa.

ŽAWJZ PUNTU

²¹ Jesusaqui tjaajinchizakazza: —Ančhucui tuquita atchi ejpnacžquiztan tuž nonzinčhucča. Ninacaqui cjiñitača, tuž cjican: “Anača žoñi conzqui. Jequit žoñi conačhaja, niiquei juzjitaž cjequiča”. ²² Pero wejr chiižinuča, jequit tsjii jilžjapa žawjwačhaj niiquei, jusjitaž cjequiča. Nižaza jequit tsjii jilžtan ch'aačhaj niiquei, Junta Suprema cjita chawjc jilirinacaž jusjitaž cjequiča. Nižaza jequit tsjii jilžquiz “ana zumamča” cjican ch'aančhaj niiquei, infernuquin chjatkattaž cjequiča. ²³ Nižaza tii puntu zakal cjeeča. Jequit niž ofrenda Yooz yujcquin chjichačhaj niiquei, nižaza chjichcu niž jilžtan quintra tanasta cjuñsnačhaj niiquei, ²⁴ jalla nekztan ima ofrenda tjaacan, nii timpluquizpacha ecla. Nekztanaqui niž jilžquin pertuna mayiza ojkla. Niižtan jilžtan walikaz cjila. Jalla nekztanaqui timpluquin quejpžcu, ofrenda Yoozquin tjaasača. ²⁵ Jequit am quintra quijchi cječhaj niiquei, nižaza jilirž kjuya chjichačhaj niiquei, jalla nii quijchi žoñžquiz pertunam mayizaquiča ana enenzcu, ima jilirž kjuya irantican. Pertunazta cjequiž niiquei, anam juez jiliržquin intirjita cjequiča jusjita cjisjapa. Amqui ultimpacha juez jiliržquin intirjita cjesaž niiquei, nii juez jiliriqui am tsjii

policiquin zakaz intirjasača; carsilquiz chawjcta cjesača. ²⁶ Weraral chiižinuča. Carsilquiz chawjctam cjesaž niiqui, anam ulanasača, liwj pacañcama.

ADULTERIO PUNTU

²⁷ Jesusaqui tjaajinchizakazza:

—Ančhucqui tuquita atchi ejpnacžquiztan tuž nonzinčhucča: “Anača adulteriuquiz ojklazqui”.

²⁸ Pero wejrqui tuž chiižinuča, jakzilta luctakat yekja maataka “wejt maatakaj cjejaa” cjican pinsiçhaja, jalla niiqui persun kuzquiz niwjctanaqui adulterio paachizakazza Yooz yucquiziqui.

²⁹ Am žew latu čhujquiqui ujquiz tjojtskatčhaj niiqui, nii čhujqui leczna, nižaza nawjk tjojtta. Jalla nuž tsjii čhujquiqui pertissi cjenaqui am parti curpuqui ana infernuquin tjojtta cjesača. Jalla nuž waliž cjesača.

³⁰ Nižaza am žew kjarauki ujquiz tjojtskatčhaj niiqui, nii kjaru pootzna, nižaza nawjk tjojtta. Jalla nuž tsjii kjarauki pertissi cjenaqui am parti curpuqui ana infernuquin tjojtta cjesača. Jalla nuž waliž cjesača.

TJUNATAN JALJTIS PUNTU

³¹ Jesusaqui tjaajinchizakazza:

—Ančuca tuquita atchi ejpnacaqui tuž cjiñitača: “Jecmiž niiž persun tjunatan jaljtasaž niiqui, primiruqui tsjii ultim jaljtita cjiirta papel certificado tjaasa”. ³² Pero wejrqui tuž chiižinuča, jakziltamiž persun tjunatan jaljtasaž niiqui, nižaza ana čjul adulterio motivo želan, jalla niwjctanaqui naa ultim jaljtita tjunqui adulterio cjiskatasacha. Nižaza jakziltami naa ultim jaljtita tjunatan zalznačhaj niiqui, adulterio uppanž paača.

JURAMENTO PUNTU

³³ Jesusaqui tjaajinchizakazza:

—Nižaza ančhucqui tuquita atchi ejpnacžquiztan tuž nonzinčhucča: “Anača toscar tawkžtan juramento paazqui. Juramento paaquiz niiqui, tjapa nii juramentužtan compromitta takupanž cumplisnaquičha Yooz yucquiziqui”. ³⁴ Pero wejrqui tuž chiižinuča, anaž čjulquiztanami juramento paasača, werara chiižpančha. Nižaza anača “arajpacha zizza” cjican juramento paazqui. Yooztajapača arajpachaqui. ³⁵ Nižaza anača “tii yoka zizza” cjican juramento paazqui. Yooztajapača tii yokaqui. Nižaza Jerusalén wajž tjuu aynakkan anača juramento paazqui. Chawjc Yooz Jiliržtajapača nii watjaqui. ³⁶ Nižaza anača “wejt persun acha zizza” cjican juramento paazqui. Amqui anam zinta tsok charquiztan chiw charquin tuckatasacha. Nižaza anam zinta chiw charquiztan tsok charquin tuckatasacha. ³⁷ Jalla nižtiquiztan, “Jesalla” cjicanaqui, “Jesalla” cjispančha; nižaza “Anaž” cjicanaqui, “Anaž” cjispančha. Zajra diabluz cjen juramento paazqui žejlčha.

ANA WALI TJEPUNTA PUNTU

³⁸ Jesusaqui tjaajinchizakazza:

—Ančhucqui tuquita atchi ejpnacžquiztan tuž nonzinčhucča: “Tsji žoniñi yekja žoñž čhujqui pjatžinasacha, nekztan nii pjatñi žoñž čhujqui pjatžintazakaz cjesača. Nižaza tsjii iżke chjatkatžinasaz niiqui, nii chjatkatñi žoñž iżke chjatkatžintazakaz cjesača”. ³⁹ Pero wejr chiižinuča, anača kijtžñi žoniñi nižtapacha kijtžqui. Nižaza am quindra tsjii yujc latu kijchasaž niiqui, kijchta cjiskazza, tsjii yujc latužtanpachami. ⁴⁰ Nižaza jakziltamiž am tanžcu am almilla kjanž pecčhaj

niiqui, kjañaj cjiskazza, irztanpachami.
⁴¹ Jakziltamiž niiž kuzi tsjii tupucama,
 amquiz chjitskatasaj niiqui, juc'anti
 tupucama chjichna. ⁴² Jakziltamiž
 amquiztan mayasaž niiqui, tjaa amqui.
 Nižaza jakziltamiž amquiztan tomžni
 tjonasaž niiqui, onzna amqui.

QUINTRA ŽOÑINACŽTANAMI ZUMA MUNAZIZA

⁴³ Jesusaqui tjaajinchizakazza:
 —Nižaza ančhucqui tuquita atchi
 ejpnacžquiztan tuž nonzinčhucča:
 “Mazinacžtan zuma munaziza. Nižaza
 am quintra žoñinacžtan chjaawjkata”.
⁴⁴ Pero wejr chiižinuča, am quintra
 žoñinacžtanami zuma munaziza. Nižaza
 am quintra laykiñi žoñinacžtajapa
 zuma kuztan Yoozquiztan maynaquiča.
 Nižaza am quintra chjaawjkatñi
 žoñinacžquin zumapan paa. Nižaza
 am quintra ch'aañinacžquinami
 kichñinacžquinami zumapan
 Yoozquiztan mayt'ižina. ⁴⁵ Jalla
 nuž zuma kamcan ančhucqui tjeeža,
 arajpach Yooz Ejpž maatičhucča, nii.
 Yoozqui zuma žoñinacžquizimi ana
 zuma žoñinacžquizimi liwj tsjiikaz
 niiž paata tjuñi tewkkatča. Nižaza
 niiž kuzcama kamñinacžquizimi nižaza
 ana niiž kuzcama kamñinacžquizimi
 tjapa ninacžquiz chijñi apayžquiča.
⁴⁶ Ančhucqui persun okžni
 žoñinacžquizkaz okznaquiž niiqui,
 jalla nuž paatiquiztan čhjul premio
 Yoozquiztan tanznaquejo? Jalla
 nižtazakaz kamča ana wali impuesto
 cobriñinacami. ⁴⁷ Nižaza ančhucqui
 persun jilnacžquizkaz tsaanaquiž
 niiqui, jalla nijwctan čhjul zumaž
 ančhuc paajo? Jalla nižtazakaz paača
 ana Yooz pajñinacami. ⁴⁸ Ančhucqui
 walja zuma kuzziz kama, jaknužt
 ančhuc arajpach Yooz Ejp walja zuma
 kuzzizpančhalaja, jalla nuž.

ZUMA KAMZ PUNTU

6 ¹ Jesusaqui tjaajinchizakazza:
 —Ančhucqui anača
 persunpacha honorchizkaz cjis
 peczqui. Anača žoñinacž yujcquiz
 ančuca Yooz custurumpinaca
 paazqui, žoñinacžquiztan honorchiz
 cjisjapa. Ančhucž jalla nuž persun
 honorchizkaz cjis pecaquiž niiqui, nii
 honorchiz kaz cjequiča. Ančuca
 arajpach Yooz Ejpqui ana iya
 honora tjaaquiča. ² Ana zum kuzziz
 žoñinacaqui t'akjir žoñinacžquiz
 onanžcu žoñi žoñinacžquin
 mazmazniča, “onanchinča”
 nuž cjicanaqui. Ajcz kjuyaranami
 calliranami jalla nižta paañiča,
 žoñinacaž ninacžjapa zuma chiyajo.
 Pero wejrqui weraral chiižinuča.
 Jalla nižta paañi žoñinacaqui nii
 honorchizkaz cjequiča. Ančhucqui
 anača nižta iratapacha kama.
³ Ančhuczi t'akjir žoñinacžquiz
 onanžcu, jalla nii ančuca onantaqui
 anaž jeczquizimi mazmaznaquiča,
 “onanchinča”, cjicanaqui. ⁴ Nižaza
 t'akjir žoñinacžquiz jamazit onaquiča.
 Aunquimi ančucaž jamazit paachiž
 cjenami, ančuca Yooz Ejpqui cherča.
 Jalla nuž cheržcu ančucaquiz
 kjanacama honora tjaaquiča, tsjii
 premiužtakaz.

MAYIZIZ PUNTU

⁵ Nižaza nii ana zum kuzziz
 žoñinacaqui Yoozquin mayizican jalla
 tuž justazniča. Ajcz kjuyquizimi
 call isquinqizimi tsijtchi Yoozquin
 mayiziñiča, tjapa žoñinaca cherajo.
 Wejrqui weraral chiižinuča, jalla nuž
 paažcu ninacaqui nii honorchizkaz
 cjequiča. Ančhucqui anača nižta
 irata mayizizqui. ⁶ Ančhuczi Yooz
 Ejpžquin mayizizjapaqui, kjuyquiz

luz waquiziĉha, niĉaza kjuy chawjcz waquiziĉha. Jalla nektzan anĉhuca Yooz Ejpĉquin mayizasacĉha. Jalla nuĉ zinalla mayizan anĉhucatan chicaĉ cjequiĉha Yooz Ejpqui. Jalla nuĉ jamazit mayiztiquiztan Yooz Ejpqui anĉhucaquiz honora tjaaquiĉha, tsjii premiuĉtakaz.

⁷Yoozquin mayizcan, anaĉha wiltan wiltan takunaca quejpĉcu quejpĉcu mayizizaqui. Jalla nuĉ mayizaquiĉ niiquei, inapanikazza. Jalla niĉtaĉ mayizza ana Yooz pajni Źoĉinacaqui. Jalla nuĉ wacchi chiican mayizitiquiztan “nonznaqueeka Yoozqui” cjican. ⁸Jalla niĉta anaĉ anĉhuc cjeella. Anĉhuca Yooz Ejpqui zizza, ĉhjulut anĉhuc pecĉhaja, jalla nii. Ima anĉhucaĉ mayizan, panĉ zizza Yooz Ejpqui. ⁹Jaziqui anĉhucqui jalla tuĉ mayizaquiĉha:

“Yooz Tata, amqui arajpachquin Źejlĉha. Am tjuu honorchiz aptitaj cjilalla. ¹⁰Niĉaza am mantiz timpu tjonchej cjilalla. Niĉaza tii muntuquiz Źejlĉni Źoĉinacaqui am kuzcamaj kamlalla. Jaknuĉt am kuzcama kamĉhaja arajpachquin Źejlĉnina, jalla niĉta. ¹¹Niĉaza tonjiqui ĉhjeri tjaaĉcalla ĉhjerĉtan kamzjapa. ¹²Niĉaza wejtnacaĉ paata ujnaca pertunalla, jaknuĉt wejrnacqui wejtnaca quintraa paani pertunuĉhaja, jalla niĉaza. ¹³Niĉaza anaĉ anawalinacĉquiz tjojtskatala, antis anawalinacquiztanĉ liwriyalla. Amĉha wiĉaya juc'ant mantiĉamqui, niĉaza amĉha wiĉaya juc'ant azzizqui, niĉaza amĉha wiĉaya juc'ant honorchizqui. Jalla nuĉoj cjila. Amĉn.”

¹⁴Anĉhuca quintraa paaniĉacĉquiz pertunaquiĉha. Nektzan Yooz Ejp zakaz anĉhuca ujnaca pertunaquiĉha.

¹⁵Anĉhuca quintraa paaniĉacĉquiz ana pertunaquiĉ niiquei, nektzan ana zakaz Yooz Ejpqui anĉhuca ujnaca pertunaquiĉha.

AYUNAS PUNTU

¹⁶—Anĉhucqui ayunascan anaĉ llaquit chercherchiz cjee. Ana zum kuzziz Źoĉinacaqui llaquit chercherchiz ayunasniĉha, Źoĉinaca ninaca ayunasni cherajo. Wejrqui weraral chiiĉzinuĉha, jalla nuĉ paatiquiztan ninacaqui inapanikaz cjequiĉha. ¹⁷Anĉhuczi ayunascanacqui zumpacha yujcmiĉ awjzna, niĉaza zumpacha achami ĉhjijczna, ¹⁸Źoĉinaca anĉhuc ayunasni ana nayajo. Yooz Ejpqui ana cherta cjenacqui tjappacha cherĉha, jamazit paatami. Yooz Ejpqui anĉhucaquiz zuma honoraĉ tjaaquiĉha, tsjii premiuĉtakaz.

CUSASANAC PUNTU

¹⁹Jesusaqui tjaaĉinchizakazza: —Tii muntuquiz kamcanacqui anaĉha muzpa cusasanaca juntizqui. Kjurinacakaz anĉhuca juntita cusasanaca lulaquiĉha. Niĉaza parti anĉhuca juntita cusasanaca inapankaz ĉhjijtaquiĉha. Niĉaza tjaĉniqui kjuyaĉ luzasaĉha, anĉhuca cusasanaca tjangzjapa. ²⁰Nonĉna, arajpachquin muzpa cusasanaca juntaquiĉha. Arajpachquin cusasanaca lujlĉnimi, niĉaza cusasanaca akziĉnimi, niĉaza cusasanaca tjangziĉnimi ana Źejlĉha. ²¹Jakziquizt anĉhuca cusasanaca juntita Źejlĉhaja, jalla nicjukaĉ anĉhuc kuz tjaaĉha.

ZUMA KAMAĉNCHIZ, ANA ZUMA KAMAĉNCHIZ PUNTU

²²Jesusaqui tjaaĉinchizakazza:

—Žoňž čhjujquiqui persun curpuž lamparažtakazza. Jaziqui žoňž čhjujqui zuma cjequiz̃ niqui, zuma cheraquičha. Jalla nižtazakaz žoňž kuzqui zuma cjequiz̃ niqui, zuma kamaquičha. ²³Žoňž čhjujquizti ana zuma cjequiz̃ niqui, zumchiquiztakaz ojklayaquičha. Ančhuca kamaña zumchiquiz panž cjequiz̃ niqui, juc'anti juc'anti zumchiquiz cjisnaquičha. Nekztan čjaknužt zuma kamasajo?

PAAZ PUNTU

²⁴Jesusaqui tjaačinchizakazza:
—Anaž jakziltami pizc patruna sirwasača. Pizc patrunchiz cjesaž niqui, tsjii patrunchiz cjesaž cjesača. Tsjii patrunchiz cjesaž cjesača. Tsjii patrunchizkaz zuma sirwasača. Jalla nižtiquiztan Yoozquiz sirwican anaž ancha paazquiz kuz tjasača. Nižaza paazquiz kuz tjaaquiz̃ niqui, anaž Yoozquin ancha kuzziz cjesača.

YOOZ EJPQUI NIIŽ MAATINACA CWITIČHA

²⁵Jesusaqui tjaačinchizakazza:
—Ančhucaquiz tuž čhižinuča, žejtzjapaqui kjaz liczmi lujlž čherimi pecča. Jalla nuž cjenami ančhucqui anača kuzquizic čherquiztan llaquita cjisqui. Nižaza curpu wali cjisjapa zquiti pecča. Jalla nuž cjenami ančhucqui anača zquitquiztan llaquita cjisqui. Čhjul čherquiztanami žoňž žetiž juc'anti importičha. Nižaza čhjul zquitquiztanami persun curpuž juc'anti importičha. ²⁶Laylayñi wežlanacaž chernza. Jalla nii wežlanacaqui ana zkalami čhjacča, nižaza ana zkalkuiztanami ricujča, nižaza ana čheri yaaz zquitchizza. Jalla nuž cjenami ančhuca arajpach Yooz Ejpqui wežlanacžquiz čheri

tjaača. Yooz yujcquiziqui ančhucqui čhjul wežlanacquiztanami juc'antiž importičha. ²⁷Anaž jec kolta žoñimi persunpacha tsjan lajcha paki atasacna, llaquiziñi kuzziz cjenami ancha lajcha pecñi kuzziz cjenami.

²⁸¿Kjažtiquiztan ančhucqui zquitquiztankaz llaquit kuzziz cjesajo? Plantanacž pjajkjallaž chernza, jaknužt pajkčhaja, jalla nii. Ninacaqui anaž langza, nižaza anaž kawanča. ²⁹Jalla nuž cjenami nii pjajkjallanacaqui ancha c'achjallača. Finu zquiti cujtžcumi ricachu Salomón cjita jiliriqui anaž juc'ant c'achja nii pjajkjallanacžquiztanami. ³⁰Plantanacaqui tsjii upacamakaz žejlča. Nekztanaqui jakatažu kattažu jurnuquiz tjutjunzjapa ujžtača. Jalla nižta cjenami Yooz Ejpacha nii plantanaca cwitiča. Ančhucqui čhjul plantaquiztanami juc'antipanž importičha. Jalla nižtiquiztan Yoozqui ančhuc juc'ant cwitiča, Yoozquin ana tjapa kuzziz cjenami. ³¹Jalla nižtiquiztan ančhucqui anača llaquita kuzziz cjisqui, čhjul čherquiztanami, nižaza kjaz liczquiztanami, nižaza čhjul zquitquiztanami. ³²Ana criichi žoñinacaqui tii muntu cucasanacžquin kuzziz ojklayča. Ančhuczi ana nižta kuzziz cjeella. Ančhucača arajpach Yooz Ejpchizqui. Čhultakiča ančhucqui pecčhaj niqui, liwz zizza Yooz Ejpqui. ³³Jalla nižtiquiztan Yooz Ejpžquinpankaz walja kuzziz cjee. Nižaza niiž mantita zuma kamañquiz kuzziz cjee. Jalla nekztanaqui ančhucaltaqui cawalikaz cjequičha čhjulumi. ³⁴Jakatan čhjulut anawalinaca watačhaj niqui, jalla nii ana juyzu paa tonjiqui. Jakaqui čhjulut watačhaj niqui, jakapachaž jaknužquinami wataquičha. Zapuru čhjul anawalinacaqui žejlñipanča.

ŽOŇINACŽTAN ZUMA KAMA

7 ¹Jesusaqui tjaajinchizakazza:
—Ančhucalaqui anača žoñinacž

uj chii chiizqui. Jalla nuž žoñinacž uj chii chiyaquiž niique ančhucqui juc'ant ujchiz cjequiča Yooz yujcquiziqui.

²Nižaza žoñinacžquizimi “Amqui Yooziž castictaj cjila”, cjican chiyaquiž niique anchucqui Yooziž casticta zakaz cjequiča. Zoñinacžtan zuma kama. Nekztan Yooz Ejpqui ančhucatan zumaž cjequiča. ³Nižaza amqui am jilž čhujcquiz tsjii cjuchilla cherasaž niique, čkjažtiquiztan am persun čhujcquiz pajk cjujchi ana cherjo?

⁴Am persun čhujcquiz nii pajk cjujchi ana cherasaž niique, čkjažtiquiztan am jilžquiz chiijo, “Jila, am čhujcquiztan cjuchilla apakžinača”, cjicanajo?

⁵Ana zum kuzziz žoñimča amqui. Am persun čhujcquiztan pajk cjujchi apakalla. Nekztan zuma cherasača, y nižaza am jilž čhujcquiztan cjuchilla apakasača.

⁶Yoozquin criichi žoñinaca, ančhucqui Yooz taku anapan nonz pecni žoñinacžtan Yooz puntu ana paljayaquiča. Ninacaqui pacunacažtakazza. Nižta žoñinacaqui ančhucaltan ch'atni pacužtakaz cjesača. Nižaza nii Yooz taku anapan nonz pecni žoñinacaqui cuchinacažtakazza. Yooz puntu nonžcu, kuzquizkaz žawjča.

YOOZQUIN MAYIZIZQUI

⁷Jesusaqui tjaajinchizakazza:
—Yooz Ejpžquiztan mayaquiž niique, Yooz Ejpqui tjaaquiča. Nižaza Yoozquin kjuraquiž niique, Yooz wachaquiča. Nižaza kjuy zanuqiztan t'oc t'ocaquiž niique, cjetžintaž cjequiča. ⁸Jequit mayačhaja, risiwaquicha. Nižaza jequit Yoozquin

kjuračhaja, wachaquiča. Nižaza jequit kjuy zanuqiztan t'oc t'ocačhaja, cjetžintaž cjequiča. Jalla nužuča Yoozquiz mayizizqui.

⁹Anaž jakziltami ančuca majch t'anta mayanaqui maz chjalznasača.

¹⁰Nižaza anaž jakziltami ančuca majch ch'iz mayanaqui zkora chjalznasača. ¹¹Ančhucqui ana zum kuzziz cjenami zuma cusasanaca tjayinčhucča persun maatinacžquiz. Jaziqui ančuca arajpach Yooz Ejpqui mayni maatinacžquiz juc'ant zumaž tjaasača.

¹²Jaknužt ančhucqui parti žoñinaca ančhucatan zuma munaziz pecčhaj niique, jalla nižtapacha parti žoñinacžtan zuma munaziz waquiziča ančhucqui. Jalla niipan Moisés liiquiz chiichiča, nižaza Yooz cuntiquiztan chiiñi profetanacaž cijirtanacami.

ZKOZ JICZ, PAL JICZ

¹³Jesusaqui tjaajinchizakazza:
—Yoozquin ojkz pecčhaj niique, zkoz zanuqiztan luzza. Infiernuquin ojkni jicz palača, nižaza pal zanchizza. Jalla nijwchuc ojkni žoñinacaqui muzpača. ¹⁴Tsjic zakaz žejlča. Arajpachquin ojkni jicz zkozača, nižaza zkoz zanallichizza. Nižaza c'ujlcullača arajpachquin ojkni jiczqui. Jalla nii jiczquinaqui koluckaz žoñi ojkča.

KAMAŇQUIZTAN PAJTA CJESAČHA ŽOŇINACAQUI

¹⁵Jesusaqui tjaajinchizakazza:
—Ančhucqui zumpacha cwtasaquiča toscar taku chiichiñi žoñinacžquiztanami. Jalla ninacaqui “Yooziž tjaata taku chiyučha” cjiñizakazza. Ninacaqui ančucaquiz tjonža, tsjii uuzi zkizi tjutžta kitižtakaz. Ninacž kuzqui anawira zumača.

¹⁶Ninacž ana zuma kamañquiztan pajtaž cjequiča, ultimu ana zum žoñinacaqui. Tsjii ch'ap muntiqui uwas frutchiz anaž cjesača. Nižaza tsjii ch'ap plantaqui higo frutchiz anaž cjesača. Jalla nižtapanča ana zum kuzziz žoñinaca. Zuma kamañchizqui anapanž cjesača. ¹⁷Tjapa zuma muntinacaqui zuma fruta pookñiča. Nižaza tjapa ana zuma muntinacaqui ana zuma fruta pookñiča. ¹⁸Zuma muntiqui anapanž ana zuma frutchiz cjesača. Nižaza ana zuma muntiqui anapanž zuma frutchiz cjesača. ¹⁹Jakzilta muntit zuma fruta ana pookzaja, k'atžtaž cjequiča nižaza ujtaz cjequiča. ²⁰Jalla nižtanacquiztan ančhucqui ana zum kuzziz žoñinaca pajaquiča, ninacaž ana zuma kamañquiztan.

ANA YOOZ WAJTQUIN OJKŊI ŽOŊI

²¹Jesusaqui tjaajinchizakazza:

—Yekjap žoñinacaqui wejtquiz “wejt Jiliri, wejt Jiliri” paljajča. Pero nuž chiicanami, anaž wejt arajpach Ejpž mantuquiz kamaquiz niiqui, anapanž arajpach wajtquin okasača, nižaza anapanž arajpach Yooz Ejpž mantuquiz želasača. ²²Ultim žoñi pjalz tjuñquiziqui wacchi žoñinacaqui wejtquiz paljayaquiča, tuž cjican: “Wejt Jiliri, wejt Jiliri, am tjuu aynakcan Yooz taku paljajchinča, nižaza am tjuu chiican zajranaca chjatkatchinča, nižaza am tjuu aynakcan wacchi milajrunaca paachinča”. Jalla nuž cjican wejtquiz paljayaquiča. ²³Jalla nuž paljaytiquiztanami wejrqui cjeeča, “Ančhuc anawira pajchinla pero. Wejtquiztan zaraka. Ančhucča ana zuma paañinacaqui”.

PIZC PUNTA ŽOŊINACAQUI

²⁴Jesusaqui tjaajinchizakazza:

—Jakziltami weriž chiita taku nonžaja, nižaza weriž chiita tawk jaru kamčhaja, jalla niiqui zuma intintazni žoñinacača. Intintazni žoñiqui jalla tužuča. Tsjii maz lum juntun kjuya kjuycha. ²⁵Nekztanaqui chijni chijinchiča. Nekztan puj kjazqui walja tsijtchiča, nižaza pjatziča, nižaza tjamiqui walja tjamchiča nii kjuya quintr. Pero nii chijñimi, tjamimi, kjazmi ana nii maz juntun kjuyta kjuyaqui pali atchiča. ²⁶Jaziqui jakziltami weriž chiita taku nonzcanpacha ana wejt tawk jaru kamčhaja, jalla niiqui zumzu žoñiča. Zumzu žoñiqui jalla tužuča. Ana zuma yokallquiz pjil yok juntun kjuya kjuychiča. ²⁷Nekztanaqui chijni chijinchiča. Jalla nekztan puj kjazqui walja tsijtchiča, nižaza pjatziča, nižaza walja tjamchiča nii kjuya quintr. Jalla nekztanaqui nii pjil yok juntun kjuyta kjuyaqui muzpa tsucchuca pajlziča.

²⁸Jesusaž jalla nuž tjaajni žeržtan, nonžni žoñinacaqui walja ispantichiča niiz tjaajintiquiztan. ²⁹Jesusaqui walja zizni zizni tjaajinchiča. Lii tjaajini maestrunacaqui ana niža tjaajiničača.

MOJKCHI JANCHICHIZ

LAA ŽOŊI ČHJETINTA

8 ¹Jalla nekztanaqui Jesusaqui curquiztan chijjwžquichiča. Nižaza muzpa žoñinaca apziča.

²Tsjii mojkchi janchichiz laa žoñiqui Jesusižquiz macjatžquichiča. Jesusiž yujcquiz quillžcu, tuž cjichiča:

—Wejt Jiliri, tii laaquiztanž čhjetnalla. Am wejr čhjetinzim pecčhaj niiqui, wejr čhjetinzim atča.

³Jalla nekztanaqui Jesusaqui kjaržtan lanžcan, tuž cjichiča:

—Wejr am čhjetnasachiya. Čhjetintam cjissa.

Jesusaž jalla nuž chiitiquiztan, nii mojkchi janchichiz žoñiqui laaquiztan žejtchi quirchiča. ⁴Nekztanaqui Jesusaqui niizquin chiižinchiča, tuž cjican:

—Wejr am tsjii cjesača. Jalla tii čhetintiquiztanaqui anam jeczquizimi maznaquiča. Timpluquin oka. Jalla nicju timplu jiliržquin persunpacha tjeežca, žejtchi, jalla nii. Nižaza Moisés mantita ofrenda tjaaquiča, tjapa žoñinaca zizajo, laaquiztan čhetinta, jalla nii.

TSJII ČHJETINTAQUI

⁵Jalla nekztanaqui Jesusaqui Capernaum cjita watja luzziča. Jalla nuž luzan tsjii roman sultat capitán jiliriqui niizquin macjatžquichiča. Nekztanaqui roct'ichiča, ⁶tuž cjican:

—Wejt Jiliri, kjuyquiz wejt piyuna ajpžquiz žejlča, ana tsijtñi. Nižaza walja ana wali ayiñča.

⁷Nekztanaqui Jesusaqui cjichiča:

—Nii čhetñi okasača.

⁸Nii sultat capitán jiliriqui kjaaziča, tuž cjican:

—Wejt Jiliri, anal wejt kjuyquiz am tjonžca cjiyi atasacha. Wejrqui amquiztan inakaztča. Jaziqi takukaz chiya čhetinzjapa. Nekztan wejt piyunaqui čhetinta cjequiča. ⁹Wejrpacha wejt pajk jilirž mantuquiz želuča. Niiž mantitacama ojklayiñča. Nižaza wejt mantuquiz sultatunaca žejlča, čjulut wejr mantučhaja, jalla nuž cjen zultatunaca ojčča. Nižaza zultatu kjawznučhaja, zakaz tjonča. Nižaza wejt piyuna čjulu paajumi mantučhaja, zakaz paača.

¹⁰Jalla nuž nonžcu, Jesusaqui nii jiliri ancha zuma kuzziz naychiča. Nekztanaqui nuž nayžcu Jesusaqui niiz apžñinacžquiz cjichiča:

—Wejrqui weraral cjiwča. Chekapan tii žoñiqui juc'ant Yoozquin kuzzizza,

tjapa Israel wajtchiz žoñinacžquiztanami.

¹¹Nižaza wejrqui cjiwča, tuwantan tajatan muzpa žoñinacaqui tjonaquiča, arajpach Yooz wajtquin luzjapa. Jalla nii Yooz wajtchiz žoñinacaqui Abrahamžtan, Isaacžtan, Jacobžtan, jalla ninacžtan juntupacha cuntintuž cjequiča. ¹²Israel žoñinacazti arajpach Yooz wajtquin žejlchucatača. Pero Yooz wajt zawntan zumchiquiz chjatkataž cjequiča. Jalla nicjuž kaaquiča, nižaza ižke jojcan želaquiča.

¹³Jalla nekztanaqui Jesusaqui capitán jiliržquiz tuž cjichiča:

—Am kjuya oka. Jaknužt am tjapa kuztan cřičhaja, jalla nižtapachaž cjequiča.

Jalla nii orapacha niiz piyunaqui žejtchi quirchiča.

ŽOÑINACA ČHJETINTA

¹⁴Nekztanaqui Jesusaqui Pedruž kjuya ojčkichiča. Jalla nicju ajpžquiz Pedruž ajmuž maa cherchiča ch'ujlñi conžtan laa cjichi. ¹⁵Naaža kjara lanžinchiča. Nuž lanztiquiztan nii ch'ujlñi conquistat žejtchinča. Nii orapacha žaažcu, ninaca atinti kallantichinča.

¹⁶Nii čhetinta quintu nonžcu tjuñiž kattan muzpa zajraž tanta žoñinaca Jesusižquiz zjičtatača. Jesusaqui tsjii taku chiižcu zajranaca chjatkatchiča. Nižaza tjapa laanaca čhetinchiča. ¹⁷Nii čhetintanacaqui Isafas profetaž chiita taku cumplissiča. Isaiasqui cjiyrchiča tuž cjican: “Tsji žoñiqui učhum laa curpunaca tjupi cjiskataquiča, nižaza conanacquiztan učhum čhetnaquiča”.

JESUCRISTUŽTAN CHICA OJKLAYZ PUNTU

¹⁸Wiruñauki tsjii nooiqui muzpa žoñinacaqui walja muytata Jesusižquiz ajcziča. Jalla niža cheržcu, Jesusaqui mantichiča, kotž tsjii latuquiztan

okajo. ¹⁹ Jalla nekztanaqui tsjii lli tjaajiñi maestruqui Jesusižquiz macjatžquichiča, tuž cjan:

—Tjaajiñi Maestro, jakzitchum okačhaja, amtan chicapachal ojklayasača.

²⁰ Jesusaqui nižquin kjaaziča, tuž cjan:

—Kitinacami kjuychizza. Nižaza wežlanacami tjurchizza. Wejrzi anal kjuychizza, tjajzjapami.

²¹ Tsjiiki nižquiz apzñi žoñinacžquiztan zakaz paljaychiča, tuž cjan:

—Wejt Jiliri, amtan chica ojklayasača. Pero wejt ejpča ticziqi. Nekztan iyal wejt ejp tjatsñi okaž cjeella.

²² Jesusaqui kjaaziča, tuž cjan:

—Wejtan chicaka am ojklaya. Ticzižtakaz žoñinacaqui, jalla ninacaj ticzinaca tjatžlani.

JESUSAQUI TJAMIMI KJAZ LJOJKIMI MANTIČHA

²³ Jalla nuž chiyžcu Jesusaqui warcuquiz luzziča. Niž tjaajinta žoñinacaqui luzzizakazza. ²⁴ Ninacaž kotquiz okan, tjamiqi walja tjamchiča. Jalla nuž tjan kjaz ljojkiqi warcu tjatanž pecatča. Jesusazti tjajatča. ²⁵ Nii kjaz ljojkiž cjen tjaajinta žoñinacaqui Jesusa žinchiča, tuž cjan:

—iWejt Jiliri! iLiwriyalla! Tii warcu kjazquiz julzmayača. Ticznačhani učhumqi.

²⁶ Jesusaqui kjaaziča, tuž cjan:

—Ĳjažtiquiztan ančhucqui ancha tsuctsucjo? Ančhucqui anača wejtquin tjapa kuzziz.

Jalla nekztan Jesusaqui žaažcu, tjamimi kjaz ljojki užiča. Jalla nuž chiitiquiztan tjamimi kjaz ljojki apaltichiča. ²⁷ Nii apaltñi

cheržcu nižtan ojklayñi žoñinacaqui ispantichiča, nižaza tuž cjichiča:

—Ĳčjul žoñit teejo? Tjamimi tii kot kjaz ljojki miž tiiž chiita takukaz cazla.

ZAJRAŽ TANTA ŽOÑINACA

²⁸ Nii kotž nawjctuñtan irantižcu, Jesusaqui Gadara cjita yokquin ulanchiča. Ulantani pucultan žoñinacaqui campu santuquiztan tjonchiča. Nii pucultan žoñinacaqui zajraž tantatača walja ana walinacatača, žoñinacžtan kichasñipanikaztača. Jalla nižtiquiztan nii jiczquiz ana jecmi ojklayñitača.

²⁹ Jesusižquiz macjatžcu nii zajranacaž tanta žoñinacaqui kjawchiča, tuž cjan:

—Ĳjažtiquiztan wejtnacaquiz mitisejo? Ima casticz timpu irantižcan amqui tekz tjonchamča, wejrnaca sufriskatzjapa. Ĳjažtatajo? —Nuž cjan kjawchiča.

³⁰ Nižaza nii nawjkchuc cuchinacaqui ojklayča lujlan. ³¹ Zajranacaqui Jesusižquiz rocchiča tuž cjan:

—Amqui wejrnaca chjatkataquiz niiqi, nii cuchinacžquin wejrnaca luzkatalla.

³² Jalla nekztanaqui Jesusaqui cjichiča:

—Nižtaqui, oka. Cuchinacžquin luzca.

Jalla nuž chiitiquiztan zajranacaqui žoñinacžquiztan ulanchiča; cuchinacžquin luzziča. Zajranacaž luztiquiztan cuchinacaqui tsjii barranc k'awquin tjojtsiča, kotquizpachatača. Jalla nužquiz kjaztan tsamžcu, ticziča nii cuchinacaqui.

³³ Jalla nii cuhi itzñinacaqui ancha tsucchi zajtchiča. Watja irantižcu, nii pucultan zajraž tanta žoñinacž puntuquiztan quint'ichiča, nižaza tjapa nižta watchinacami. ³⁴ Jalla nii

quintu nonžcu tjapa nii wajtquiz žejlñi žoñinacaqui ulanchiċha, jakziquin Jesusa želatċhaja, nicju. Jesusižtan zalžcu, ninacaqui rocchiċha, ninacž yokquiztan okajo.

ZUCH ŽOÑI ĆHJETINTA

9 ¹Jalla niiž wiruñpachaqui Jesusaqui wilta warcuquiz luzziċha. Nekztan kotž tsjii latuquiztan kajkchiċha. Nižaza niiž persun watja irantichiċha. ²Jalla nijwc žoñinacaqui Jesusižquin tsjii zuch žoñi ċhjitchiċha. Tjajz zquitinacžtanpacha ajpċhi ċhjitchiċha. Ninacž tjapa kuz ċjicjiñi cheržcu, Jesusaqui laa žoñžquiz paljaychiċha, tuž ċjican:

—Jila, ana llaquis; tjup kuzziz ċjee. Am ujnacac pertuntaċha.

³Jalla nižta čhiñi nonžcu yekjap lii tjaajiñi maestrinacaqui kuzquiz tuž pinsichiċha: “Yooz quintrala; tii žoñž takuqui anawalipanla”. ⁴Pero Jesusaqui ninacž kuzquiz pinsita zizatċha. Jalla nekztan ninacžquiz ċjichiċha:

—ċKjažtiquiztan anċhucqui nižta ana zuma pinsamintuchiztajo? ⁵ċJakzilta takut pjasila čhiiz ċjesajo? ċ“Am ujnaca pertuntaċha” čhiiz pjasila ċjesaya? Už ċ“Tsijsna, oka”, jalla nuž čhiiz pjasila ċjesaj? ⁶Tsewtan cuchanžquita Yooz Zoñtċha wejrqui. Tii muntuquiz jiliritċha, ujnaca pertunzjapami. Razunal čhiyuċha. Nuž zizjapa, anċhucqui tiiz čera.

Jalla nekztanaqui nii zuch žoñžquiz ċjichiċha:

—Tsijsna, am tjajz zquiti apta; nižaza am kjuya oka.

⁷Jalla nii orapacha tsijtsiċha, nižaza niiž kjuya ojkiċha. ⁸Zoñinaca nii cheržcu, tsucchi quirchiċha, nižaza “Yoozqui honorċiz ċjilalla” ċjican čhiichiċha. Yoozqui žoñinacžquiz

nižta ċhjetinñi azi tjaachiž ċjen, nuž čhiichiċha.

MATEO KJAWŽTA

⁹Nii kjuyquiztan ulanžcu Jesusaqui Mateo ċjita žoñi cherchiċha. Mateoqui impuesto cobriñi puestuquiz julzi želatċha. Jesusaqui niižquiz ċjichiċha: —Wejttan čica ojklaya.

Jalla nekztan Mateoqui tsijtsu, Jesusižtan ojkiċha. ¹⁰Niiž wiruñ Jesusaž Mateož kjuyquin lulan, muzpa impuesto cobriñinacami nižaza uċhiz žoñinacami irantichiċha. Nižaza ninacaqui Jesusižtan niiž tjaajinta žoñinacžtan čica julziċha tsjii mizquiz. ¹¹Fariseo žoñinacazti jalla nii cheržcu, Jesusiž tjaajinta žoñinacžquiz pewcziċha, tuž ċjican:

—ċKjažtiquiztan anċhuca tjaajiñi maestruqui impuesto cobriñinacžtan nižaza uċhiz žoñinacžtan ċhjeri lujljo?

¹²Jesusaqui jalla nižta pewcžñi nonžcu ninacžquiz ċjichiċha:

—Zuma wiw žoñinacaqui anaž medicu kullñimi pecċha. Antiz laa žoñinacaž medicu kullñimi pecċha.

¹³Yooz takuqui tuž ċjicha: “Oksñi kuzziz žoñinaca juc'antil pecuċha wilana jawkñi žoñinacžquiztan”. Tantiya ċhjul puntut tii Yooz taku čhiċhaja, nii zumpacha intintaza. Jaziqui wejrqui “Zuma kamuċha” ċjiñi žoñinacžquiz anal kjawsñi tjončinċha. Antiz “Uċhizpanċha” ċjiñi žoñinacžquiz kjawsñi tjončinċha, ninacž kuz campiita ċjisjapa.

AYUNAS PUNTU

¹⁴Juan Bautistaž tjaajinta žoñinacaqui Jesusižquiz macjatžquichiċha. Nekztan pewcziċha, tuž ċjican:

—Wejrnacmi fariseo žoñinacami walja ayunasiñċha. Amiž tjaajinta

žoñinacazti ana ayunasñipanla.
¿Kjažtiquiztan nižtajo?

¹⁵Nekztanaqui Jesusaqui kjaaziča, tuž cjican:

—¿Kjažt weriž tjaajinta žoñinaca llaquit kuzziz ayunasasajo, weriž želanpachajo? Wejrqui zalz kazzi tjowažtakaztča. Ninacaqui zalz pjijstiquiz invittanacažtakazza. Zalz kazzi tjowaž želan, niž zalz pjijstiquiz invittanacaqui ana llaquit kuzziz ayunasasača. Pero tsjii timpuž tjonaquiča. Jalla nii timpuquiz zalzñi tjowa kjañtaž cjequiča; jalla nekztanž ayunasasača.

¹⁶Anaž jakziltami tsjel zquiti ew rimintužtan rimintasača. Ew rimintuqui jaljtapasača, nižaza nii ach zquitiqui juc'anti wjajrčzu tsjelanznasača. ¹⁷Nižaza anaž jakziltami ach zkiz luuzquiz ew vinu alznasača. Jalla nižtaž alznasaž niiqui, zkiz luuz panž wjajrskatasacha ew vinuqui. Nekztan vinumi zkiz luuzmi pertisnasača. Ew vinu ew zkiz luuzquiz panž alznasača. Jalla nuž zumpacha cjesača vinumi zkiz luuzmi.

JESUCRISTUČHA LA ŽOŇI ČHJETINĬQUI

¹⁸Jesusaž tjaajnan, tsjii judío žoñinacž jiliriqui irantichiča. Jesusiž yujcquin quillziča, tuž cjican:

—Wejt majtqui ticzñil jitča. Amqui wejt kjuya okasaž niiqui, naaquiz am persun kjaržtan lanznasača. Nekztan naaqui žetaquiča.

¹⁹Nekztanaqui Jesusaqui tsijtscu nii jiliržtan ojkcichiča tjaajinta žoñinacžtanpacha. ²⁰Jalla nuž okan, tsjaa laa maatak žonqui Jesusižquiz wirquiztan macjatžquichinča. Tunca paan wata ljok tjawksñi laakaz t'akjiri želintača. Jesusižquiz macjatžcu Jesusiž zquit puntallquiz

lanziniča. ²¹Ima macjatcan pinsichinča, “Wejrqui niž zquitilla lanžcu žetaka wejrqui” cjican. ²²Jalla nuž lanztiquiztan Jesusaqui jalla naaža kjutñi kjutžcu naa maatak žoñ cherziča. Nekztan tuž cjichiča:

—Cullaca, tjup kuzziz cjee. Amiž tjapa kuztan criichiž cjen, žejtchi cjissamča.

Jalla nii orapacha žejtchin cjissinča.

²³Jalla nekztanaqui Jesusaqui tira ojkcichiča. Nii jilirž kjuya irantican Jesusaqui cherchiča, nii jilirž majt tjatzjapa banda pjujñinacaqui listutakalča, jalla nii. Nižaza žoñinacaqui ančaž kaacan aranchiča.

²⁴Nuž cheržcu Jesusaqui ninacžquiz cjichiča:

—Ančhucqui tekztanž ulna. Taa uzqui anača ticzinqi, antiz tjajča.

Jalla nuž Jesusiž chiitiquiztan, žoñinacaqui nižquin tjassiča.

²⁵Nekztanaqui Jesusaqui ninaca ulanskatchipanča. Nekztan luzcu, naaža ticzi uza kjarcu tanžcu, žinziča; žejtchinpacha. ²⁶Jalla nekztanaqui tjapa kjutñi nii yokquin nii milajru quintu ojkcichiča.

ZUR ŽOŇINACA ČHJETINTA

²⁷Jalla nijwctan ulanžquitiquiztan pucultan zur žoñinacaqui nižquin apžquichiča, kjawcan:

—Davidž majchmaatquiztan tjoñi, wejrnaca okznalla, —cjican.

²⁸Nekztan Jesusaž kjuya luztan nii zur žoñinacaqui nižquin macjatchiča. Nekztan Jesusaqui ninacžquiz pewcziča, tuž cjican:

—Wejrqui ančhuc cherkatasacha, ¿jalla nii crii ančhucya?

Ninacaqui kjaaziča, tuž cjican:

—Wejt Jiliri, criyuča.

²⁹Jalla nekztanaqui Jesusaqui ninacž čhjuiqui lanlanžinchiča. Nižaza cjichiča:

—Ančucaž tjapa kuztan
criitiquiztan cherni cjsna.

³⁰Nii orapacha ninacž čhjujquiqui
cherni cjsiŋiŋa. Nekztanaqu
Jesusaqui ninacžquiz zumpacha
chiižinchiŋa, tuž cjican:

—Tii čhjetintaqui anaj jecmi
zizla; ančhucmi anaž jecžquizimi
chiichiyaquičha.

³¹Jesusaž nuž chiižinchiž cjenami,
ninacaqui ulanžcu, tjapa yokaran nii
čhjetinta quintu parličhiŋa.

ANA CHIIŇI ŽOŇI ČHJETINTA

³²Nii kjuyquiztan ulnan yekjap
žoninacaqui tsjii zajraž tanta žoŇi
zjiŋcchiŋa. Zajraž tantiquiztan
ana chiiŇi atatŋa. ³³Nekztanaqui
Jesusaqui nii zajra chjatkatchiŋa.
Jalla nuž chjatkattiquiztan nii ana
chiiŇi žoŇiqui chiyi kallantichiŋa.
Žoninacazti jalla nii cheržcu walja
ispantichi cjsiŋiŋa, tuž cjican:

—Tii Israel yokquiz ana wira
tižtanaca cheriŇtaŋa wejrnaqu.

³⁴Pero fariseo nžoninacazti tuž
cjetŋa:

—Tiiqui zajranacž jilirž aztankaz
zajranaca chjatkatiŇiŋa.

³⁵Jesusaqui tjapa wajtquiztan watja
nižaza jochquiztan jochi ojklaychiŋa,
judío ajcz kjuyquizimi tjaajincan. Yooz
mantuquiz kamz puntu chiižinchiŋa.
Nižaza tjapaman laanacami nižaza
jallc'a curpuchiznacami čhjetinchiŋa.

³⁶Žoninaca cheržcu, ninaca okziŋa.

Ana awatirchiz uuzanacažtakaz

želatŋa. ³⁷Žoninaca okzcu,
Jesusaqui niiž tjaajinta žoninacžquiz
paljaychiŋa, tuž cjican:

—Weraral cjiwŋa. Zkalaqui walja
žejlŋa. Pero zkala ajžni žoninacaŋa
upaqui. ³⁸Yooz Ejpcui zkali Patrunaŋa.
Jalla nižtiquiztan Yooz Patrunžquiztan
mayiza, zkala ajžni žoŇi cuchnajo.

TUNCAPAN APOSTOLONACA ILLZTA

10 ¹Jalla nektzanaqui Jesusaqui
niiž tuncapan illzta žoninaca
kjawziŋa. Nekztan ninacžquiz
mantiz poder tjaachiŋa, zajranaca
chjatkatzjapa, nižaza tjapaman
laanacami jallc'a curpuchiznacami
čhjetnajo.

²Nii tuncapan illzta apostolonacaqui
jalla tižta tjuuchiznacataŋa:
Primuruqui Simonataŋa, nižaza niiž
tsjii tjuuqui Pedro cjitazakaztaŋa.
Nekztan niiž lajkaŋa, Andrés cjiŋa.
Nekztan Jacobotaŋa, nižaza niiž
jila Juan. Nii pucultanaqui Zebedeož
majchwichaŋa. ³Nekztan Felipitaŋa,
Bartolometaŋa, Tomastaŋa, nižaza
Mateotaŋa. Nii Mateozti impuesto
cobriŇitaŋa. Nekztan Jacobotaŋa,
Alfeož majchaŋa. Nekztan
Lebeotaŋa nižaza niiž tsjii tjuuqui
Tadeo cjitazakaztaŋa. ⁴Nekztan
Simonataŋa, niiqui cananista cjiŋa
partiquiztantaŋa. Ultimquiziqui Judas
Iscariotetaŋa, jalla niiqui Jesusiž
quintra tarasunchiŋa.

ILLZTA ŽOŇINACA CUCHANTA

⁵Jesusaqui nii tuncapan illzta
žoninaca cuchanžquichiŋa,
niiž cuntiquiztan ojklajajo. Ima
cuchanžcan tuž chiižinchiŋa:

—Judío yokquinpanž ojklajachiŋa,
Samaria yokquin nižaza yekja
yokanacquin ana ojklajachiŋa. ⁶Israel
wajtchiz žoninacžquinkaz okaquičha.
Jalla ninacaqui katchi uuzinacažtakaz
žejlŋa. ⁷Arajpac Yooz mantuquiz
kamz timpu žcatžinžquičha. Jalla
nii paljaycan ojklajžcaquičha.

⁸Nižaza laanaca čhjetnaquičha.
Nižaza ticzinaca jacatatskataquičha.
Nižaza mojkchi janchichiz žoninaca
čhjetnaquičha. Nižaza zajranaca

chjatkataquiċha. Tii mantiz poderaqui anċhucaquiz nużukaz tjaataċha. Jalla niżtiquiztan tii poderżtan žoñinacżquiz yanapżcu anaż ċhjulumi mayaquiċha pacajo.

⁹Paaz ana ċhjechaquiċha, kor paazmi, ċhiw paazmi, cobre paazmi. ¹⁰Niżaza ana ċhjechaquiċha žak quelzmi. Tsjii almilla alaja ċhjechaquiċha. Niżaza ana iya ċhjulumi ċhjechašaċha, ana yekja ċhjatami, niżaza atsmi. Yooztajapa langzñinacżquiziqui ċhjeriqui tjaata ċjis waquiziċha.

¹¹Anċhucqui wajtquizimi jochquizimi irantiżcuqui, zuma žoñipanż kjurznaquiċha. Nuż zuma žoñi wachuqui, niiż kjuyquiz alujasaquiċha, nii wajtquiztanami jochquiztanami ulanzcama. ¹²Tsjii kjuya luzcu, tsaanaquiċha, “Anċhuc walipaj ċjila”, ċjican. ¹³Nii kjuychiz žoñinaca zumažlaj niiqui, jalla ninacżtaqui walipanż ċjequiċha. Yekjapa žoñinacaqui ana zumažlaj niiqui, jalla ninacżtaqui ċhjulumi anawalikaz ċjequiċha. ¹⁴Jakziltat anċhuc ana risiwaquiß niiqui, niżaza anċhuc ana nonz pecaquiß niiqui, ninacżquiztan okaquiß anċhucqui. Nii kjuyquiztan ulnaquiċha niżaza nii wajtquiztanaqui. Nekztan nii wajtquiztan kojchquiz žcatchi pulpunaca tsajt tsajtsnaquiċha. Jalla nii tsajt tsajttaqui siñalaż ċjequiċha ninacż quintru, anċhuc ana risiwchiż ċjen. ¹⁵Weraral ċjiwċha. Casticz tjuñquiziqui nii anċhuc ana zuma risiwñi žoñinaczi juc'anti castictaž ċjequiċha, Sodoma ċjita Gomorra ċjita, jalla nii wajtchiz žoñinacżquiztan.

CHJAAWJKATÑINACA ŽELAQUIĊHA

¹⁶Jesusaqui tjaajinchizakazza:
—Tii weriż ċhiizinta taku nonžna.
Wejrqui anċhuc cuchnuċha. Anċhucqui

kitinacż taypiquiz ojklayaquiċha, uuzanacažtakaz. Jalla niżtiquiztan anċhucqui walja kuzziz ċjee. Listuż ċjequiċha žkoražtakaz, pero zuma paazjapa. ¹⁷Anċhucqui persunpachaž walja cwitzazaquiċha. Anċhucqui jilirinacżquin intirjita ċjequiċha; niżaza ajcz kjuyquiz wjajttaž ċjequiċha. ¹⁸Niżaza anċhucqui wejt puntuquiztan parlichiz ċjen ċhjichtaž ċjequiċha prefectonacżquinami, niżaza tsjan chawjc jilirinacżquinami. Nekztan anċhucqui wejt puntuquiztan ċhiyaquiċha, nii jilirinacż yujcquizimi, niżaza ana judío wajtchiz žoñinacż yujcquizimi. ¹⁹Jilirinacżquiz intirjitaž ċjenami, ana kuz turwaysi ċjequiċha, ċhjulut anċhuc kjaaznaċhaja, niżaza jaknužt kjaaznaċhaja, jalla nii. Jilirinacż yujcquiz prisintiz ora, Yoozqui anċhuca kuzquiz ċhiiz taku tjaaquiċha, jaknužt ċhiizalaj, nii. ²⁰Anċhuca persun kuzquiztan anaž ċhiyaquiċha. Antiz anċhuca Yooz Ejpż Espíritu Santuqui anċhuc ċhiikataquiċha.

²¹Nii timpuquiziqui žoñinacaqui persun jilż quintru aptjapznaquiċha persun jila conkatzjapa. Niżaza ejpnacaqui persun maatinacż quintru aptjapznaquiċha. Maatinaczi persun maa ejpnacż quintru zakaz aptjapznaquiċha, persun ejpnaca conkatzjapa. ²²Tjapa ana criichi žoñinacaqui anċhucaquiz ċh'aanaquiċha wejt puntu parliñiž ċjen. Pero jakziltat ticzcama wali tjurt'iñi kuzziz ċjeċhaj niiqui, liwriitaž ċjequiċha, Yooztan wiñaya kamzjapa. ²³Tsjii wajtchiz žoñinacaqui anċhuc ċhjatkataquiß niiqui, ninacżquiztan yekja wajtquin okaquiċha. Weraral ċjiwċha, wejrqui arajpachquiztan cuchanžquita Žoñtċha. Ima weriż tii muntuquiz wilta tjonan, anċhucqui

tjapa Israel watjanacžquin anaž iranti atasacha.

²⁴“Tjaajinta žoñiqui niiz tjajinižquiztan anaž juc'anti cjesača. Nižaza piyunaqui niiz patrunžquiztan anaž juc'anti cjesača. ²⁵Tsjii tjaajinta žoñiqui niiz tjajiniž irata, jalla nižta tjajiniž cjisnaquiz niiqui, cuntintuž cjis waquiziča. Nižaza tsjii piyunaqui niiz patrunž irata, jalla nižta patrunaž cjisnaquiz niiqui, cuntintuž cjis waquiziča. Nonžna ančhucqui, quintra žoñinacaqui “Beelzebú” cjican zajra jilirž tjuužtan wejtquiz tjuuskataquiz niiqui, ančhucquiz juc'ant anawal tjuužtanž tjuuskataquiča. Wejrqui kjuychiz patrunžtakaztča, ančhuczti wejt kjuj familiažtakazza.

²⁶Jalla nižtiquiztan ančhucqui anaž žoñi eksna. Tjapa chjojzakuñ tjajintami zuma kjana ziztaž cjequiča. Nižaza tjapa jamazit tjajintami nižtakaz zuma kjana ziztapankaz cjequiča. ²⁷Tjapa weriž chjojzaka tjajintanacami ančhucqui žoñinacž yujcquiz kjanacama paljayaquiča. Nižaza tjapa weriž jamazit tjajintanacami ančhucqui paljayaquiča, tjapa žoñinaca nonzjapa. ²⁸Nonžna ančhucqui, anača eksqui tii curpu alaja conñinacžquizimi. Ninacaqui animuqui anaž conasača. Antiz Yoozquizpan eksna. Jalla niiča curpumi animumi infiernuquin wiñaya t'akjisiskatñiqui.

²⁹“Tsjii paaztan pizc wežlanaca kjayasača. Jalla nuž koluc valorchiz kjayžcumi ančuca Yooz Ejpqui ninaca cwitiča. Yooz Ejpž ana munan, tsjii wežlaqui anaž ticznasača.

³⁰Jilanaca, Yooz Ejpqui tjapa ančuca ach charanaca kanžintača. ³¹Jalla nižtiquiztan anaž čjulquiztanami eksna. Wežlanacžquiztan ančhucča

juc'ant valorchizqui. Yooz Ejpqui ančhuc juc'anti cwitaquiča wežlanacžquiztan.

³²Jakziltat parti žoñž yujcquiz wejt favora cječhaj niiqui, nižazakal wejrqui wejt arajpach Yooz Ejpž yujcquiz nii žoñž favora chiyača. ³³Nižaza jakziltat parti žoñž yujcquiz wejr ana pajñi nicačhaj niiqui, nižaza wejrqui wejt arajpach Yooz Ejpž yujcquiz nii žoñž quintra ana pajñi zakal chiyača.

³⁴Tii taku nonžna. Weriž tjontiquiztan žoñinacaqui ana zumquin cjequiča; quintrasñi cjequiča. Nekztan aptjapznaquiča. Ana criichinacaqui criichi žoñinacž quintra cjequiča. ³⁵Weriž tjontiquiztan tsjii maatiqui persun ejpžjapa quintraž cjequiča. Nižaza tsjaa majtqui persun maajapa quintra cjequiča. Nižaza tsjaa wazmi persun kjan maajapa quintra cjequiča. ³⁶Jalla nižta zapa mayni familianacaqui ninacporaž quintraž cjequiča. ³⁷Jakziltat persun maa ejpžquizkaz kuzziz cječhaja, jalla niiqui anaž wejt partiquiz cjichuca cjesača. Nižaza jakziltat persun ocjalžquizkaz kayazt'achaja, jalla niiqui anaž wejt partiquiz cjichuca cjesača. ³⁸Jakziltat wejt partiquiz cjis pecčhaj niiqui, tjapa kuztanž wejtquiz cjistanča. Sufrisjapaqui listoj cjila, ticzcama. Ana nižta wejtquin tjapa kuztan cječhaj niiqui, anaž wejt partiquiz cjichuca cjesača. ³⁹Jakziltat weriž cjen persun anazum kamañquiztan ana jaytačhaja, jalla niiqui ultimquiziqui ana liwriita cjesača. Nižaza jakziltat weriž cjen persun anazum kamañquiztan jaytačhaja, jalla niiqui ultimquiziqui liwriitaž cjequiča; Yooztan wiñaya zuma kamaquiča.

⁴⁰Jequit ančhuc risiwčhaja, nižaza wejrmi zakaz risiwča. Nižaza jequit

wejr risiwčhaja, jalla niiqui nižazakaz wejt Yooz Ejpmi risiwčha. ⁴¹ Jequit tsjii Yooziž cuchanta profeta risiwaquiz niiquei, jalla niiqui profetažtakaz honorchiz zakaz cjequičha. Nižaza jequit tsjii Yooz kuzcama kamni žoñi risiwačhaja, jalla niiqui Yooz kuzcama kamniž premio, jalla nižtakaz honorchiz cjequičha. ⁴² Nižaza jequit tsjii wejtquin kuzziz žoñžquiz yanapačhaja, jalla niiqui honorchiz zakaz cjequičha. Jequit wejtquin criichi žoñžquiz tsjii tasa kjaz onačhaja, jalla niiqui honorchiz zakaz cjequičha. —Jalla nuž chiichiča Jesusaqui.

JUAN BAUTISTAŽ CUCANŽQUITA ŽOÑI

11 ¹ Niiž tuncapan illzta žoñnacžquiz tjajinz žeržcu, nekztan Jesusaqui ojkičiča, yekja watjanac kjutni. Wajtquiztan watja ojklayčiča, žoñnacžquiz tjajni, nižaza Yooz taku paljayi.

² Juanqui nii oraqui carsilquizačha. Jalla nicju Cristuž ojklaytanaca quintu nončiča. Nekztanaqui Juanqui tsjii kjažt mazinaca Jesusa pewcni cuchanžquichiča. Nekztan irantižcu Jesusižquiz ³ pewcziča, tuž cjican:

—Cristuqui tjoñiž cjispacha;
¿Amj Yoozquiztan cuchanžquita Cristumkaya? ¿Už yekjaž tjewznasa, jaa?

⁴ Jesusaqui ninacžquiz kjaaziča, tuž cjican:

—Jaknužt cherčhaja nonžaja, jalla nii tjappachaž Juanžquiz quint'ižcaquičha ančhucqui. ⁵ Zur žoñnacac cherča, Zuch žoñnacaqui ojklayča. Mojkchi janchichiz žoñnacaqui čhetintača. Oñi žoñnacaqui nonža. Nižaza ticzi žoñnacaqui jacatatskattača. Nižaza pobre žoñnacžquiz Yooz liwriñi taku paljaytapanča. ⁶ Jakziltat

weriž paatanaca cheržcu, nižaza weriž chiitanaca nonžcu, ana kuz turwayzižlaj niiquei, walipanikaz cjequičha.

JUAN BAUTISTA PUNTU

⁷⁻⁸ Jalla ninacaž ojktan, Jesusaqui chiyi kallantichiča Juanž puntuquiztan. Žoñnacžquiz tuž cjichiča:

—Ch'ekti yokquin, čhjululu cheržni ojkininčhuctaya? ¿Tjamiž tjizinta caña cheržni ojkininčhuctajo? Anačhay. ¿Fino zquiti cujtchi žoñi cheržni ojkininčhuctajo? Chawjc jilirž kjuyquin zuma zquiti cujtchi žoñi žejlča. Jalla nii zizza ančhucqui. ⁹ Čhjululu cheržni ojkininčhuctaya? ¿Yooz cuntiquiztan chiiñi profeta cheržni ojkininčhuctaya? Jesalla, ultim werara nuž ojkininčhucča. Juanqui tuquita profetanacžquiztan juc'ant chekanča. ¹⁰ Juanž puntuquiztan Yooz takuqui tuž cjiča:

“Yooz Ejpqui tsjii žoñi
cuchanžcaquičha ima Cristuž
Yooz taku paljayi ojklayan. Nii
žoñiqui Israel žoñnacžquiz
Cristu zuma tjewskataquičha”.

¹¹ Weraral cjiwčha. Juan Bautistača parti žoñž maatinacžquiztan tsjan juc'antiqui. Pero chjul Yooz maatimi žoñž maatinquiztan tsjan juc'antiča. Arajpach Yoozquin kuzziz žoñnacacha Yooz maatinacaqui.

¹² Juanž tjontiquiztan anzcama muzpa žoñnacaqui ts'acjazcan arajpach Yooz mantuquiz luz pecča; walja tjapa aztan nižaza tjapa kuztan luz pecča. ¹³ Juanž tjonzcama, tjapa tuquita profetanacž chiitanacami nižaza Moisés liinacami arajpach Yooz cuchanžquita puntuquiztan chiiča. ¹⁴ Elfas cjita profetaqui wila tjoñiž cjispacha; nii Elias tjonz

cuntiquiztanča Juan Bautistaqui. Jalla niic werarača. Nuž criiz waquiziča. ¹⁵Jakziltačhalaj nonznī cjunchiz, jalla niiqui tii chiitaqui nonžna.

¹⁶¿Kjažtat tii timpuquiz željñi žoñinacajo? ¿Jecnaca iratat tinacajo? Jalla tižta ocjalanacaztakazza tinacaqui. Yekjap ocjalanacaqui palazquin julzi uzinča, nižaza ninacž mazinaca kjawkjawža, tuž cjian: ¹⁷“Tsajtsjapa pincallu pjuchinča. Ančhuczi ana tsajtchinčucča. Nižaza kaayikaayi wirzu itzinča. Ančhuczi ana kaachinčucča”. Jalla nuž cjichiča ocjalanacaqui. Jalla nižta iratača tii timpuquiz željñi žoñinacaqui. ¹⁸Juan tjonchiča. Niiqui zumanaca ana lujlñiča, nižaza ana licñiča. Jalla nižtiquiztan ančhucqui tuž cjinčucča, “Juanqui zajraž tantača” cjian.

¹⁹Niž wiruñaqi wejrqui tjonchinča, arajpach Yooz Ejpž cuchanžquita Žoñi. Wejrqui zumanaca luluča, nižaza licuča. Jalla nižtiquiztan ančhucqui wejt puntuquiztan cjiča: “Niīča ancha lujlñiqui, nižaza licñiqui, nižaza niīča ujchiz žoñinacž maziqui, nižaza anawali impuesto cobriñinacž maziqui”. Jalla nuž cjinčucča wejt puntuquiztan. Tuž zakal cjiwča: Yooz puntu zuma zizñi žoñinacaqui Yooz tjaajintacama kamča.

ANA YOOZQUIN KUZIZ ŽOÑINACA

²⁰Jalla nekztanaqui Jesusaqui chiichiča, chojru kuziz žoñinacž puntu. Tsji watjanacquiz ancha milajrunaca paachiča. Pero nii wajtchiz žoñinaczi persun uj ana pajchiča; nižaza kuznaca ana campiichiča. Jalla nižtiquiztan Jesusaqui ninacžquiz ayjatchiča, tuž cjian:

²¹—Corazín wajtchiz žoñinaca, ančhucaquiz ancha anawaliž

wataquiča. Nižaza Betsaida wajtchiz žoñinaca, ančhucaquiz ancha anawalizakaz wataquiča. Ančhuca watjanacquiziqui walja milajrunaca paachinča. Tiro cjita nižaza Sidón cjita watjanacquiz nii milajrunaca paataž cjitasaž niiqui, nii ortanpacha nii wajtchiz žoñinacaqui Yoozquin kuziz cjitasača; nižaza “ujchizpanča wejrnacqui, pertunalla”, cjitasača. Nižaza uj zint'ižcu nii wajtchiz žoñinacaqui llaquita kuz kjanapacha tjeezñi cjitasača, lutu zquiti cujtžcu, nižaza achquiz kjupžtan tjajlžcu. ²²Jalla nižtiquiztan ančhucqui juyzu casticz tjuñquiziqui juc'anti castictaž cjequiča nii Tiro cjita nižaza Sidón cjita watjanacchiz žoñinacžquiztan. ²³Capernaum wajtchiz žoñinaca, ¿kjažtiquiztan ančhucqui pinsejo, “Yoozqui učhum honorchiz cjizkataquiča”, cjianajo? Anaž nuž cjesača. Pero ančhuczi kozzuc tjojtaž cjequiča infiernuquin sufrisjapa, ujchiz žoñinacžtan chica. Ančhuca wajtquiziqui walja milajrunaca paachinča. Sodoma cjita wajtquiz nii milajrunaca paataž cjitasaž niiqui, nii watjaqui anz tii tjuñinaca željtsača. ²⁴Jalla nižtiquiztan nii juyzu casticz tjuñquiziqui ančhucqui juc'anti castictaž cjequiča, Sodoma wajtchiz žoñinacžquiztan.

YOOZQUIN KUZIZ ŽOÑINACA

²⁵Jalla nii orazakaz Jesusaqui chiichiča:

—Wejt Yooz Tata, amqui honorchizam cijlalla. Arajpachquin željñinacami tii muntuquiz željñinacami amča mantiñamqui. Amqui humilde žoñinacžquiz chjozaka tjaajinta tjeezamča. Zizñi žoñinacžquizimi intintazñi žoñinacžquizimi nii chjozaka

tjaajintanacami ana zizkatchamċha.

²⁶Yooz Tata, amiž muntaqui nužuċha.

²⁷'Yooz Tata, tjapa amiž ziztanacaqui wejtquiz tjaaajinchamċha. Ultimquiziqui anaž jecmi wejr am Majch zumpacha pajċha. Am alaja wejr zumpacha pajċha. Nižaza anaž jecmi am Yooz Ejp zumpacha pajċha. Wejr alaja am zuma pajuċha. Nižaza jakziltižquiz wejrqui zizkatz pecaċhaja, jalla ninacazakaz am zuma pajasamċha. ²⁸Anċhucqui jakziltat ana zumanacquižtan otchižlaj niiqui, wejtquizza macjatžca. Nižaza jakziltat persun aztan Yooz watja irantiz otchižlaj niiqui, wejtquizza macjatžca. Weril anċhucquiz jeejzkataċha. ²⁹Wejrqui pasinsis kuzziztċha, nižaza humilde kuzziztċha. Jalla nižtiquiztan weriž tjaata kamaña catoka; nižaza wejt puntuquiztan zizni cjee. Nekztan persun kuz jeejz wachaquiċha. ³⁰Weriž tjaata kamañaqui anaċha ch'ama, nižaza wejt manta paazqui cježakazza.

JEEJZ TJUŇI QUINTU

12 ¹Tsjii jeejz tjuŇquiziqui Jesusaqui niž tjaajinta žoŇinacžtan ċhjacta zkalanac taypiranž okatċha. Tjaajinta žoŇinacaqui ċhjeri eecskatchiċha. Nekztan ninacaqui tric oz chjojlunaca kjajpžcu, tric lujlchiċha. ²Fariseo žoŇinacaqui jalla nižta paaŇi cheržcu, Jesusižquiz cjichiċha:

—Chera, tii amiž tjaajinta žoŇinacaqui trabajla. Jeejz tjuŇquiziqui nižta trabajzqui uċhum lii quintrala. —Jalla nuž ċhiican ujchiz jwes pecatċha. ³Nekztanaqui Jesusaqui ninacžquiz kjaaziċha, tuž cjican: —Anċhucqui tuž liichinċhucċha, žanajaa? Ċhjeri eecznanaqui David cjita žoŇiqui niž mazinacžtan tižta paachiċha. ⁴Niiqui Yooz

timpluquin luzcu Yooz yujcquin nonžta t'antanaca lujlchiċha. Ċhjul žoŇimi anapantaċha permitta nii t'antac lujlzqui. Lii quintrala niiqui. Timplu jilirinacapankaz lulasaċha. Pero nii Davidzti lujlchipanċha. Nižaza niž mazinacaqui nii t'anta lujlchizakazza. ⁵Nižaza Moisés liiquiz tižta liichinċhucž, žana jaa? Jeejz tjuŇquiziqui timplu jilirinacaqui ana jeejžla. Jalla nuž ana jeejztiquiztanaqui, ninacžtajapa anaž ujchiz cjesaċha. ⁶Anċhucquiz cjiwċha. Tekz tsjiiċha timpluquiztan juc'ant chekanaqui. ⁷Nižaza anċhucqui cjiřta Yooz taku ana intintazzinċhucċha. Yooz taku tuž cjiċha: “Wejrqui wilana jawkŇi žoŇinaca anal pecuċha. OkzŇi kuzziz žoŇinacapan pecuċha”. Tii Yooz taku intintaztasaj niiqui, anaž anċhucqui tii žoŇinaca ujchiz jwes pectasaċha. Tii žoŇinacaqui jaziqui anaž uj paaċha. ⁸Wejrqui tsewtan cuchanžquita Yooz žoŇtċha. Wejrpanikal jeejz tjuŇquizimi mantasaċha.

KJARA KJONCHI ŽOŇI ĆHJETINTA

⁹Jalla nekztanaqui najwcchuc ojķžcu judío ajcz kjuyquiz luzziċha. ¹⁰Jalla nicju tsjii žoŇi želatċha kjara kjonchi. Tsjii quintrala žoŇinacaqui uj jwesjapa Jesusižquiz pewcziċha tuž cjican: —ĲJeejz tjuŇquiziqui žoŇi ċhjetinz cjesaya, už anapan cjesaj? nuž cjican pewcziċha.

¹¹Jesusaqui ninacžquiz kjaaziċha tuž cjican:

—Jeejz tjuŇquiziqui uuzac tujquiz tjojtšiz cjesaj niiqui, Ĳkjaža anċhuczti tujquiztan uua joožŇi ana okasajo? ¹²Pero žoŇiqui uuzižquiztan juc'antiž walċha. Jalla nižtiquiztan jeejz tjuŇquizimi anaċha lii quintrala zuma paazqui.

¹³Jalla nekztanaqui Jesusaqui laa žoŇžquiz cjichiċha:

—Am kjara zjijca.

Nekztan žejtchi cjissičha, nii tsjii kjara wiwuž nižtapacha. ¹⁴Jalla nekztanaqui fariseo žoñinacaqui ulanžcu, Jesusiž conzjapa kazzičha.

¹⁵Jalla nii zizcu Jesusaqui najwcchuc ojkchičha. Nižaza muzpa žoñinacaqui Jesusižquiz apzičha. Jesusaqui tjapa nii apžni laanaca čhjetinchičha.

¹⁶Nekztan ninacžquiz mantichičha, ana jecžquizimi Jesusiž čhjetinči puntuquiztan parlajo, nii.

PROFETAŽ CHIITA TAKU CUMPLITA

¹⁷Jalla nižta ojklaycan, Jesusaqui Isafas profetaž cjijrta taku nužquiz cumplissičha. Yoozqui Isaiasquiz tuž cjijrkatchičha:

¹⁸“Jalla tiičha weriž illzta žoñiqui, weriž mantitacama ojklayni žoñi. Jalla nižžquin kayazt'učha. Niž cjen cuntintutčha wejrqui. Jalla nuž cjičha Yoozqui. Wejt Espiritu Santuqui niž kuzquiz cjequičha. Niiqui yekja watjanacchiz žoñinacžquin Yooz liwriiñi taku paljayaquičha.

¹⁹Žoñinacžquizimi ana ch'aanaquičha, nižaza ana kjawaquičha. Calliran alto joržtan ana paljayaquičha.

²⁰Tsjii tjuwanta cañami anaž kjolaquičha. Nižaza ch'aman asni michami anaž tjesaquičha, niž ultimpacha legal mantiz tjuñicama. ²¹Niž cjen yekja watjanacchiz žoñinacaqui zuma liwriiz tjuñi tjewznaquičha”.

Jalla nuž Jesusiž puntuquiztan Yooz takuqui cjičha.

JESUSIŽ QUINTRA CHIIČHA

²²Jalla nekztanaqui tsjii laa žoñiqui Jesusižquin chjichtatačha. Nii žoñiqui zajraž tantaž cjen zuratačha, nižaza

ana chiiñitačha. Jesusaqui nii žoñi čhjetinchičha. Jalla nižtiquiztan cherñi chiiñi cjissičha. ²³Jalla nuž čhjetintiquiztan tjapa žoñinacaqui ispantichičha tuž cjican:

—ČTiiž Davidž majchmajtquiztan tjonni cjesaya? ČTiipan Cristo cjesaya?

²⁴Nii nonžcu fariseo žoñinacaqui tuž cjichičha:

—Tiiqui ana wal žoñikalala. Zajranacž Beelzebú jilirž aztankaz yekja zajranaca chjatkatcha.

²⁵Jesaqui ninacž pinsitanaca zizzičha, jalla nižtiquiztan ninacžquiz cjichičha:

—Jakzilta nacionamiž partira partira t'akznaquič niiqui, nižaza t'aka t'aka kichasaquič niiqui, k'ala tjtantaž cjequičha. Tsjii watjamiž nižaza tsjii kjuya familiamiž nižta t'aka t'aka cjisnaquič niiqui, anaž tjurasacha. ²⁶Jalla nižta irata Satanás diabluqui persun partira chjatkattasaž niiqui, niipacha t'akztasacha. Jalla nuž t'akžtiquiztan niž mantiz azi anaž tjurasacha. ²⁷Ančhucqui wejt puntuquiztan cjiñčhucčha, “Beelzebú diabluž aztan zajranaca chjatkatcha”. Jalla nuž cjiñčhucčha. Jalla nužužlaj niiqui, čject ančuca partira žoñinacžquiz azi tjaazjo, zajranaca chjatkatzjapajo? Jalla nižtiquiztan kjanapachaž wejt puntuquiztan tsjii kjutni chiičinčhucčha, nii. ²⁸Wejrzi Yooz Espiritu Santuž aztan zajranaca chjatkatinčha. Jalla niicž cjičha, Yooz mantiz timpu ančucaquič žcatžinžquičha, nii.

²⁹Tsjilla cjesacha. Anaž jecmi tsjii azziz žoñž kjuyquiziqui luzi atasacha; nižaza anaž niž kinakunacami jwesi atasacha, ima čhejlcanaqui. Nii čhejlžcu, nekztan tjapa kinakunaca jwesi luzasacha.

³⁰Jecčhalaj ana wejt favora, niiqui wejt quintračha. Nižaza jequit wejtтан

chica Yooz kjutñi žoñinaca ana macjatskatčhaja, jalla niiqui žoñinacaž Yoozquiztan tirkatča.

³¹ Jazic ančhucaquiz chiyučha, tuž cjican: tjapa ujnacami nižaza tjapa ana zum takunacami pertuntaž cjesača. Pero jakzilta žoñit Yooz Espíritu Santuž quintr chiyáčhaj niiqui, anaž pertuntaž cjesača. Nii žoñiqui wiñaya ujchiz cjequičha. ³² Jakzilta žoñit wejt quintr chiyáčhaj niiqui, pertuntaž cjesača. Pero jakzilta žoñit Yooz Espíritu Santuž quintr chiyáčhaj niiqui, anaž pertuntaž cjequičha. Nii žoñiqui wiñaya ujchiz cjequičha; anawira pertuntaž cjequičha.

FRUTANAC PUNTU

³³ Nekztan Jesusaqui tjaajinchiča, tuž cjican:

—Zuma muntizlaj niiqui, zuma frutaž pookča. Nižaza ana zuma muntizlaj niiqui, ana zuma frutaž pookča. Jalla nižtiquiztan muntiqui niž frutquiztan pajza, zuma ana zuma, jalla nii. ³⁴ Zkoražtakaz ančhucui, ana zum žoñhucča. ¿Kjažža ančhucui zumanaca chiyasajo? Ančhuca kuzquiz pinsitaqui ana zuma parijula. Jaziqui ančhucča anazumanacapan chiiñinacaqui. ³⁵ Tsjii zuma žoñiqui zuma chiiča, niž zuma kuzquiztan. Nizaza tsjii ana zum žoñizti ana zumapaž chiiča, niž ana zuma kuzquiztan. Jaknužt kuzquiz pinsičhaja, jalla nuž chiiča žoñinacami. ³⁶ Ančhucaquiz cjiwčha, juyzu casticz tjuñquiziqui zapa mayni cwinta tjaastančha, tjapa ana zuma chiitanacami. ³⁷ Ančhucaž chiiitiquiztan jama jusjitaž cjequičha, ujchiz cječhaja, ana ujchiz cječhaja, nuž.

ANA CRIICHI ŽOÑINACA

³⁸ Jalla nekztanaqui yekjap fariseo žoñinacaqui lii tjaajiñi maestruncžtan Jesusižquiz cjichiča:

—Maestro, am milajru paañi cherz pecučha.

³⁹ Jesusaqui ninacžquiz kjaaziča tuž cjican:

—Ana zum žoñinacčhucča. Ana Yoozquin kuzziz žoñinacčhucča. ¿Kjažt tsjii milajru mayčha, zinalažtakaz? Jonáz cjita profetž zinala, niikaz ančhucaquiz tjaata cjequičha.

⁴⁰ Jonasqui pajk ch'iz pjuchquiz žejlchiča čhjep majžtan čhjep aramžtan. Jalla nižta irata wejrui tii yok koztan kamačha čhjep majžtan čhjep aramžtan. ⁴¹ Juyzu tjuñquiziqui, jalla nii casticz tjuñquiziqui Nínive wajtchiz žoñinacaqui jacatataquičha. Nekztan ninacaqui tii timpuquiz kamñi žoñinacž uj tjeeskataquičha. Jonás Yooz taku paljaytiquiztan ninacaqui Yoozquin kuzziz cjissiča. Pero wejrtčha Jonasquiztan juc'ant chekanaqui. Tii timpuquiz kamñi žoñinacazti anaž Yoozquin kuz tjaača. ⁴² Nižaza casticz tjuñquiziqui tsjaa waruta maatak jilirui jacatataquičha. Nekztan naaqui tii timpuquiz kamñi žoñinacž uj tjeeskataquičha. Naaqui najwkta yokquiztan tjonchinčha Salomonžtan zali, nižaza niž zuma razunchiz taku nonzñi. Pero tejgz wejrtčha Salomonquiztan tsjan juc'ant chekanaqui. Pero tii timpuquiz kamñi žoñinacazti wejt taku anaž nonz pecča.

ZAJRA PUNTU

⁴³ Tsjii zakal quint'asača. Tsjii zajraqui žoñžquiztan ulanzcu kjoñ yokaran ojklayñitača, jeejzjapa kjurcan. Ana jeejz watžcuqui, kuzquiz pinsichiča, tuž cjican: ⁴⁴ “Jaziqui wejr quepaka jakziquiztan ulanzquitučhaja, jalla nicju”. Jalla nuž quejžpzu nii žoñžtan wilta zalchiča. Nii žoñiqui pewžta kjuyažtakaztača, cuza

žcayi, azquitžta, pero laachitača. ⁴⁵Jalla nuž zaltiquiztan nii zajraqui pakallak juc'ant anawali zajranaca zjijqui ojkcichiča. Zajranaca zjijcžcu, tjappacha nii žoñž kuzquiz luzziča. Jalla nižtiquiztan nii žoñiqui juc'ant ana waliž cjišsiča tuquita kamzquiztan. Jalla nižta irata tii ana zum žoñinacžquiz wataquiča. —Jalla nuž quint'ichiča Jesusaqui.

JESUSIŽ FAMILIA

⁴⁶Jesusaqui iyapanž žoninacžquiz chiyatča. Jalla nuž chiyan niž maaqui lajknacžtan irantižquichiča. Žoñinacž tjiiquin želan, nižtan parlis pecatča. ⁴⁷Tsjii žoñiqui Jesusižquiz mazziča, tuž cjican:

—Am maa lajknacžtanpacha tii tjiiquiz žejlča. Am kjawž, amtanž parlis pecča.

⁴⁸Jesusaqui mazni žoñžquiz kjaaziča, tuž cjican:

—¿Ject wejt maaya? ¿Ject wejt jilanacaya?

⁴⁹Jalla nuž chiižcu tjaajinta žoñinacž kjutni kjaržtan tjeeziča, nižaza cjichiča:

—Tinacača wejt maami, wejt jilanacami. ⁵⁰Jecnacami wejt arajpach Yooz Ejpž kuzcama kamčhaja, jalla ninacača wejt jilanacami, wejt cullaquinacami, wejt maami.

ZKALA ČHJACZ QUINTU

13 ¹Nii noojpacha Jesusaqui kjuyquiztan ulanchiča. Kot kjutni ojkcžcu kot atquiz julziča.

²Jakziquin nii želatčhaja, jalla nicju žoñinacaqui walja ajcziča. Jalla nižtiquiztan tjaajinzjapa tsjii warcuquiz luzziča. Nekz julziča. Tjappacha žoñinacaqui kot at tjiiquiz žejlčiča. ³Jalla nekztanaqui Jesusaqui žoñinacžquiz walja Yooz

puntunaca tjaajinčiča, tjapaman quintunacžtan. Jalla nuž tjaajincan tuž cjichiča:

—Tsjii žoñiqui zkal čhjaqui tewcchiča. ⁴Zkala čhjaccan, parti simillaqui jicz latuquiz tjojtsiča. Nekztan wežlakaz nii simillac ilziqui. ⁵Parti simillazti maz yokaran tjojtsiča. Nekziqui anaž wacchi pjila želatča. Nekztan koloculla pjila želan ratulla jecziča. ⁶Jalla nuž jecžtiquiztan sii kjakiqui ujchiča; koluc sep'allchiztača nekztan. Ratulla kjonchiča. ⁷Parti simillazti ch'ap ch'ap yokaran tjojtsiča. Ch'apinacakazza ancha pajkchiqui, nižaza atipchiqui. ⁸Parti simillazti zuma yokquiz tjojtsiča. Nekztan zuma pookchiča. Yekjap simillaqui patac čherchiz zapa zkal ozquiz pookchiča; nižaza yekjap simillaqui sojta tuncan čherchiz zapa zkal ozquiz pookchiča; yekjap simillaqui quinsa tuncan čherchiz pookchiča. ⁹Jakziltažlaja nonžni cjuñchiz niiqui, nonžla.

¹⁰Jalla nekztanaqui tjaajinta žoñinacaqui Jesusižquiz macjatchiča, nižaza pewcziča, tuž cjican:

—¿Kjažtiquiztan am nižta quintunacžtankaz žoñinacžquiz tjaajinya?

¹¹Jesusaqui kjaaziča tuž cjican:

—Arajpach Yooz mantuquiz kamz puntuquiztan ch'aman intintazzuca quintunacžtan tjaajnuča. Ančhucaquizkaz Yoozqui zizkatz munča nii puntunacquiztanaqui. Parti žoñinacžquiziqui Yoozqui ana zizkatz munča. ¹²Jequit zizačhaja, jalla nižquiziqui juc'ant tjaajinz tjaataž cjequiča. Nekztan zumpacha zizniž cjequiča. Jequit ana zizačhaja, jalla niž kuzquiztan kjañtaž cjequiča nii ana intintaztanacaqui.

¹³Jalla nižtiquiztan wejrqui tižta

quintunacžtan paljajučha. Parti žoñinacaqui weriž paata cheržcumi ana cherchižtakaz cjissa. Nižaza weriž chiita taku nonžcumi, ana nonznñižtakaz tucčha; ana intintazñi žoñinacačha ninacaqui. ¹⁴Jalla nižta cjissiz cjen, Isaías profetž taku cumplissa. Jalla tuž Isaíasqui cijjrchičha:

“Ančhucqui nonznaquičha. Nonžcu, ana intintazaquičha. Nižazaž cheraquičha. Cheržcu, anaž tantiyasaquičha. ¹⁵Tii žoñinacž kuznacaqui chojru cjissičha; ana zumaž nonža. Nižaza čhjucchiz cjenami ana cherznñi atčha, zur žoñižtakaz. Jalla nuž cjisnaquičha, ana cherznñi cjisjapa, nižaza ana nonznñi cjisjapa, nižaza ana kuzquiz intintiñi cjisjapa, nižaza ana wejtuquin macjatzjapa. Ana wejtuquin tjontiquiztan, ana liwriita cjesačha”.

¹⁶Ančhucčha cuntintu. Ančhucqui cherznñi žoñinacčhucčha. Nižaza nonznñi žoñinacčhucčha. Ančhucčha Yooziž wintiztaqui. ¹⁷Weraral cjiwčha. Wacchi profetanacami nižaza zuma kuzziz žoñinacami ančhucaž chertanaca cherz zakaz pecatčha. Pero ana cherchičha. Nižaza ančhucaž nonžtanaca nonz zakaz pecatčha. Pero ana nonzičha. Ančhuczti cherchinčhucčha, nižaza nonzinčhucčha. ¹⁸Jazic ančhucž nonžnalla. Jalla tuž cjičha nii zkala čhjacz quintuqui. ¹⁹Nii jicz latuquiz tjojtsi simillaqui jalla tižta žoñinacačha. Ninacaqui arajpach Yooz mantuquiz kamz puntuquiztan nonzcanpacha, ana intintazza. Diabluqui ninacž kuzquiz tjonžcu, ninacaz intintazta kjañčha. ²⁰Nižaza nii maz yokquiz tjojtsi simillaqui jalla tižta žoñinacačha. Ninacaqui Yooz

taku nonžcu nii ora cuntintuž nonža; cuntintuž catokčha. ²¹Pero ninacaqui ana tjapa kuztan catoktiquiztan zkoluc zep'ichiz zkalažtakazza. Jalla nižtiquiztan ana tjuraquičha. Yooz taku criichiž cjen, sufraquičha; nižaza chjaawjkattaž cjequičha. Jalla nekztan orallaž quejpsnaquičha. ²²Nižaza nii ch'ap yokquiz tjojtsi simillaqui jalla tižta žoñinacačha. Ninacaqui Yooz taku nonžcu, catokčha. Pero nekztan juc'anti kuz tjaačha tii muntu cusasanacquiz. Wali jiru kamzpanž pecčha. Persun kuzquiz pectiquiztanacqui Yooz taku tjatža ninacž kuzquiz. Jaziqui ana zuma kamčha; ana pookñi zkalažtakaz kamčha. ²³Nižaza nii zum yokquiz tjojtsi simillaqui jalla tižta žoñinacačha. Ninacaqui Yooz taku nonžcu, zuma tjapa kuz catokčha; zuma intintičha. Jalla nižtiquiztan zuma kamañchiz cjissa, zuma pookchi zkalažtakaz. Nii zuma pookñi žoñinacaqui zuma kamañchizpanž cjissa, jaknužt tsjii simillaqui patac čhjerchiz, sojta tunc čhjerchiz, quinsa tunc čhjerchiz pookčhaja, jalla nižtačha.

ANA WAL PASTU QUINTU

²⁴Tsjii quintužtan quint'ichičha Jesusaqui, tuž cjan:

—Arajpach mantiñi Yooz puntuqui jalla tužučha. Tsjii žoñiqui zuma similla čhjaczhičha zkal yokquiz.

²⁵Tjapa niiž kjuychiz žoñinacaz tjajan, tsjii quintra žoñiqui tjonchičha. Nekztan zkalquiz ana wal pastunaca čhjaczhičha. Jalla nuž ana wal čhjaczcu, ojckhičha. ²⁶Nii tric zkala jecžtan, chicapacha pajkchičha nii ana wal pastunacaqui. Nižaza pizcpacha pookchičha. ²⁷Jalla nii cheržcu, nii piyunanacaqui patrunžquin mazñi

ojkchiča. Nižquin mazziča, tuž cjican: “Wejt Patruna, amiž čhjacta simillaqui zumažlaj niiqui, čjakziquiztan tii ana wal simillanaca pajkchitaya?” ²⁸ Patrunaqui kjaaziča, tuž cjican: “Tsjii quintra žoñiqui nižta paačhani”. Jalla nekztanaqui piyunanacaqui pewczyča tuž cjican: “čWejrnacqui nii ana wal pastunaca k'achasaya?” ²⁹ Nii patrunaqui cjichiča: “Ana k'achacuiča. Ana wal pastu k'achcan yekjap tricžtanpachaž k'achnasacha. ³⁰ Antiz pizcpacha pajkla, cujich timpu tjonzcama. Jalla nekztan wejt piyunanacacui cuchantaž cjequičha. Ninacaqui anawal pastunaca ricujaquičha. Nekztan kojchquiz čhejlznaquičha ujjzapa. Jalla nekztanaqui tricuž ricujžcu, wejt tiric yaaz kjuyquiz majcznaquičha”.

³¹ Nižaza Jesusaqui tsjii puntuzakaz quint'ichiča, tuž cjican:

—Arajpach Yooz mantiz puntuqui tužuča. Tsjii žoñiqui niž yokquiz mostas similla čhjaczhiča. ³² Mostas simillaqui parti simillquiztan juc'ant zkoltallača. Jalla nuž cjenami pajkžcuqui tjapa zkalanacquiztan tsjan pakjiča. Pajk muntižtakaz cjissa. Nekztan wežlanacaqui nii mostas munti itzquiz tjuraž tjacñiž tjonča.

LIWATUR QUINTU

³³ Jesusaqui tsjii quint'ichizakazza, tuž cjican:

—Arajpach Yooz mantiz puntuqui jalla tužuča. Tsjaa maatak žonqui čhjep medida tupžcu nii liwatura jac'uquiz utchinča; nižaza t'ajzinča, tjapa nii t'anti maza tsijtkatzjapa.

³⁴ Tjapa tjajjintanacami quintunacžtan paljaytatača. Arajpach Yooz puntuquiztan tjajjincan, Jesusaqui quintunacžtankaz tjajjinchica. ³⁵ Jalla nuž tjajjincan,

Jesusaqui tuquita profetaž chiita takuqui cumplissiča. Profetaqui jalla tuž cjiyrchiča:

“Quintunacžtankaz chiyučha.

Tii muntu kallantitiquiztan weriž chiita tjajjintanaca ana intintazzucača. Jalla nii ana intintaztanaca paljayučha”.

ANA WAL PASTU QUINTU INTINTAZKATTA

³⁶ Jalla nižta puntunaca chiiz žeržcu, Jesusaqui žoñinacžquiztan ojkchiča; kjuyquiz luzziča. Jalla nicju niž tjajjinta žoñinacaqui macjatchiča, tuž cjican:

—Nii zkal yokquiz čhjacta ana wal pastu, jalla nii puntuquiztan wejtnacaquiz intintazkatalla.

³⁷ Jalla nekztanaqui Jesusaqui intintazkatchiča tuž cjican:

—Wejrqui tsewctan cuchanžquita Yooz Žoñtča. Wejrtča zuma similla čhjaciñtui. ³⁸ Nii zkal yokaqui tii muntuča. Nii zuma zkalanacaqui cjiča, arajpach Yooz mantuquiz kamñi žoñinacača nii. Ana zuma pastunacaqui diabluz mantuquiz kamñi žoñinacača. ³⁹ Nii ana wal pastu čhjaczñimi diablupachača. Zkala ajz timpuqui tii muntu tucuzinž timpuča. Nii zkala ajzñi piyunanacaqui Yooz anjilanacača. ⁴⁰ Jaknužt nii ana wal pastunaca ricujžcu, ujquin ujjzapa tjojttaž cječhaj niiqui, jalla nižta irataž wataquičha tii muntu tucuzinžcan, ultim jujuž nekz. ⁴¹ Jalla nii oraqui wejt anjilanaca cuchanžcača, tii muntuquiztan tjapa ana wal žoñinaca ricuji. Wejt anjilanacaqui tjapa ujnaca paakatñi žoñinacami, nižaza tjapa ana wali paañinacami ricujaquičha. ⁴² Jalla nuž ricujžcu, infiernuquin tjojttaž cjequičha kjackhi jurnuquiztakaz.

Jalla nekzi anchaž kaaquiĉha, nižaza waljaž ižke kjojnacuĉha.

⁴³Yooz kuzcama kamni žoñinacasti arajpach Yooz wajtquiz želaquiĉha, tjuñižtakaz kjančan. Jakziltat nonžni cjuñchizĉucžlaja, nonžna.

IYA QUINTUNACA

⁴⁴Arajpach Yooz mantuquiz kamañauqui jalla tužuĉha. Tsjii yokquiz pajk paaz ĉhjojžtataĉha. Tsjii žoñiqui nii ĉhjojžta paaz wajtĉhiĉha. Nii wajtžcu, wila ĉhjojziĉha nekpacha. Ancha cuntintutaĉha. Nekztanaqui tjapa niž cusasanaca tuij ojkĉhiĉha. Niiž cusasanaca tjuyžcu, nii yoka kjayĉhiĉha. Jalla nužuĉha arajpach Yooz kamañauqui luzqui. Nii kamañauqui ĉhjulquiztanami juc'anti valorĉhizza.

⁴⁵Nižaza arajpach Yooz mantuquiz kamañauqui tužuĉha. Tsjii tintichiz žoñiqui zuma valorĉhiz perlanaca kjayi ojkĉhiĉha. ⁴⁶Nekztan tsjii ancha zuma valorĉhiz perla wajtĉhiĉha. Jalla nekztanaqui tjapa niž cusasanaca tuijĉhiĉha, nii perla kjayžjapa.

⁴⁷Nižaza arajpach Yooz mantiz puntuqui tužuĉha. Tsjii ĉh'iz tanñi žoñinacaqui niž ĉh'iz tanz pajk kotquiz tjojtziĉha. Jalla nuž tjojtžtiqiztan tjpaman ĉh'iznaca tanchiĉha. ⁴⁸Nekztan ĉh'iz tanz ĉhjijpztanaqui, kot at tjiiquin jwessiĉha. Jalla nekztanaqui ninacaqui nijwc julžcu, ĉh'iz pjalziĉha. Zuma ĉh'iznaca canastiquiz yaaziĉha. Ana zuma ĉh'iznacasti tjojtĉhiĉha. ⁴⁹Jalla nižta irataž tii muntu tucuzinžtanaqui wataquiĉha. Anjilanacaqui ulanžcaquiĉha žoñinaca pjali, zuma žoñinaca ana zuma žoñinaca, nii. ⁵⁰Nii ana zuma žoñinacaqui infieruquin tjojttaž cjequiĉha tsjii kjakchi jurnuquiztakaz. Jalla nekzi ancha kaaquiĉha, nižaza ižke kjojaquiĉha.

⁵¹Jalla nekztanaqui Jesusaqui žoñinacžquiz pewcziĉha, tuž cjican: —ĉAnĉhucui tjapa tii weriž ĉhiita quintunaca intintiya?

Nii žejlñi žoñinacaqui kjaaziĉha, tuž cjican:

—Wejt Jiliri, wejrnacui intintasuĉha.

⁵²Nekztan Jesusaqui cjichiĉha:

—Tsjii lii tjaajiñi maestruqui arajpach Yooz mantuquiz cjisnaquiz niiqui, tsjii kjuya patrunažtakaz cjissa. Jalla nuž cjistiquiztan niž ziztanacuiztan zuma tjaajintanaca zizkatasasĉha, tuqita tjaajintami nižaza anzta tjaajintami.

⁵³Jalla tii arajpach Yooz mantiz puntuquiztan ĉhiiz žeržcu, jalla nekztan Jesusaqui ojkĉhiĉha, niž persun yoka. ⁵⁴Jalla nicju irantižcu, ajcz kjuyquiz tjaajñi kallantichiĉha. Nii nonžni žoñinacaqui ispantichiĉha tuž cjican: —ĉJakziquin tii žoñizti ancha tižtanaca zizñi ĉjissitajo? ĉKjažt ancha tižta milajrunaca paasajo?

⁵⁵Carpinterož majĉkakza tiiqui. Tiiž maaqui María ĉjitiĉha. Nižaza tiiž lajknacaqui Jacoboĉha, Joseĉha, Simonaĉha, nižaza Judassa. ⁵⁶Nižaza tiiž cullaquinacaqui uĉhumnacžtan kamĉha. Jalla nižtiqiztan, ĉjakziquin tiiqui tižtanaca zizzitajo?

⁵⁷Jalla nižta pinsitiquiztan ninacaqui Jesusižjapa quintru ĉjissiĉha. Pero Jesusaqui ninacžquiz cjichiĉha:

—Persun wajtĉhiz žoñinacami, nižaza persun kjuyĉhiz žoñinacami tsjii Yooziž uĉta profetžquiz ana rispitiĉha. Parti žoñinacasti nižquiz rispitiĉha.

⁵⁸Jalla nižtiqiztan nekzi ana ancha milajrunaca paachiĉha, nii wajtĉhiz žoñinacaqui Jesusižquiz ana criichiž, nekztan.

JUAN BAUTISTA CONTA

14

¹Jalla nii oranaca Herodes ĉjita jiliriqui Jesusiž quinto

nonchiċha. ² Jalla nuż nonżċu, niiz piyunanacżquiz cjichiċha:

—Juan Bautistala tiiqui. Ticziquiztan jacatatchila. Jalla nižtiquiztan walja milajarunaca paazjapa poderchizlani.

³ Jalla nuż tsucchiċha Herodes jiliriui. Tuquiqui Herodesqui Juan tankatchiċha. Ċejlżcu carsilquin chjitchiċha. Jalla nuż paachiċha, niiz tjunaż cjen. Niiz tjunqui Herodías cjitiċha. Tuquiqui naaqui niiz jilż tjuntaċha. Felipe cjitataċha Herodes jilaui. ⁴ Jalla nižta anawali zalziż cjen, Juanqui Herodiżquiz chiižinchicha tuż cjican:

—Naa maatak žon anaż am tjun cjichuca. Felipiż tjunċha naaui.

⁵ Jalla nuż chiižintiquiztan Herodes Juan conz pecatċha. Pero žoinaca ekscu ana atchiċha. Tjapa žoinacaqui Juanżquiz rispitchiċha tuquita Yooz taku parliņi profetažtakaz. ⁶ Nii Herodesqui niiz persun cumpleañ tjuņquiziqui pijista paachiċha. Jalla nuż pijista paan, naa Herodías majtqui ulanżquichinċha, invittaż žoinacż yujcquiz tsati. Jalla nuż tsatan ancha justassiċha Herodesqui. ⁷ Zuma tsattiquiztan Herodesqui taku onziċha, tuż cjican:

—Ċjululum mayċhaja, jalla nii tjaasaċha.

⁸ Ima mayan maaui mataquiz mantichinċha, Juanż acha mayzjapa. Jalla naaža maaż chiita takucama Herodesquiztan maychinċha, tuż cjican:

—Tsjii chuwwquiz Juan Bautistaż acha tjaalla.

⁹ Jalla nuż maytiquiztan Herodesqui llact'azziċha. Pero invittaż žoinacaz nonznan taku onziċha. Jalla nižtiquiztan naaža maytacama mantichiċha. ¹⁰ Juanqui carsilquiz želatċha. Jalla nijwc cuchanchiċha,

Juanż acha pooti. ¹¹ Jalla nektzanaui tsjii chuwwquiz acha zjiċżcu, naaquiz tjaatataċha. Nektzan naaui maaquinż tjaachinċha.

¹² Jalla nii quintu nonżċu, Juanż tjaajinta žoinacaui Juanż curpu chjichi tjonchiċha. Nektzanaui nuż chjichcu niiz curpu tjatziċha. Jalla nuż tjatżcu, Jesusiżquin mazņi ojkcichiċha.

LUJLZ ĊHJERI TJAATA

¹³ Nii quintu nonżċu Jesusaui najwk ojkcichiċha, ana žoni žejlż yokquin. Warcuquiz ojkcichiċha. Pero žoinacaui nuż ojkcċi quintu nonchiċha.

Jalla nektzanaui ninacaui nii yokaranpacha wajtanacquiztan ulanchiċha. Jesusiżquin wilta zali kjojchin ojkcichiċha. ¹⁴ Warcuquiztan ulanżcu Jesusaui tama žoinaca cherchiċha. Jalla nuż cherżcu niiz kuzquiz sint'ichiċha ninacżtajapa. Nektzan zijjcta laanaca ċhjetinchiċha.

¹⁵ Waj zezi cjisnan niiz illzta žoinacaui Jesusiżquin tjonchiċha, tuż cjican:

—Waj zezilla. Ċhjeri pecċha. Tii yokquiziqui anaż ċhjeri žejl-la. Jalla nižtiquiztan tii žoinaca cutzna. Okaj cjee, joch kjuyaran ċhjeri kjayżcumi lulaċhani tinacacni.

¹⁶ Jesusaui ninacżquiz cjichiċha:

—Anaż cuchta cjesaċha. Anċhucaż ċhjeri tjaauichiċha.

¹⁷ Nektzanaui ninacaui kjaaziċha, tuż cjican:

—Wejtnacalta ana lujlż ċhjeri žejlċha. Pjijska t'antalla pizc ch'iztanzaz žejlċha.

¹⁸ Jesusaui ninacżquiz cjichiċha:

—Nii ċhjeri wejtkwiz zijjca.

¹⁹ Jalla nektzanaui Jesusaui žoinacżquin mantichiċha, pasturan julzna cjee. Jalla nuż julzkatżcu nii pjijska t'anta nii pizc ch'iz persun

kjaržtan tanziča. Tanžcu tsewcchuc arajpach kjutñi cherziča, nižaza Yooz Ejpžquin gracias cjican chiichiča. Nekztanaqui t'anta kjolžcu tjajinta žoñinacžquiz tojunchiča. Nekztan ninacaqui parti žoñinacžquin partir paychiča. ²⁰T'antanaca ch'iznaca lujlžcu liwjpača nii žoñinacaqui chjekchi cjissiča. Nižaza nii t'antiquiztan nii ch'iznacquitzan žejtchinacaqui tuncapan canasta chjiipi ricujtača. ²¹Jalla nii t'anta ch'iz lujlchi žoñinacaqui pjijska warank luctakanacatača. Maatakanacami ocjalanacami ana kantatača nii oraqui.

JESUSAQUI KJAZ JUNTUŇ OJKČHA

²²Nekztanaqui Jesusaqui niiz tjajintanaca warcuquiz luzkatchiča, niiz tuqui kota kajjayajo tsjii latu kotquin irantizcama. Jesusazti nii žejlñi žoñinacžquiz persun kjuyquin okaj cjican nijwctan najwkcuch cuchanchiča. ²³Jalla nuž cuchanžcu Jesusaqui curulla yawchiča, zinalla Yooz Ejpžtan parlisjapa. Jalla nuž mayizan ween cjissiča. Nicju zinatača Jesusaqui. ²⁴Nii oraqui niiz tjajinta žoñinacaqui kotž taypiquin okatča. Tjamiqui warcuž quintra walja tjamatča. Nižaza kjaz ljojkimi warcu waljaž aytinquiskatatča. ²⁵Wali chawc kjantati Jesusaqui ninacžquin žcatžinchiča, kjazuntuñ ojkan. ²⁶Niiz tjajinta žoñinacaqui, Jesusa kjazuntuñ tjoñi cheržcu, ancha tsucchiča, nižaza kjawchiča, tuž cjican:

—Cuntinažlani —cjican kjawchiča.

²⁷Pero ninacž kjawan Jesusaqui ninacžquiz paljayžquichiča, tuž cjican:

—Tjup kuzziz cjee. Wejrpanča. Anaž tsuca.

²⁸Nekztanaqui Pedruqui paljaychiča, tuž cjican:

—Wejt Jiliri, amžlaj niiqui, wejr kjawznalla kjazuntuñ ojkszapa am irantiscama.

²⁹Jesusaqui niizquiz cjichiča:

—Pichalla amqui.

Nekztanaqui Pedruqui warcuquiztan ulanžcu, kjazuntuñ oki kallantichiča, Jesusa jakziquin tjenatčhaja, jalla nicju.

³⁰Nii walja tjamiz cjen tsucchiča. Tsucžcu, kjazquiz luzi kallantichiča. Nekztan kjawchiča, tuž cjican:

—Wejt Jiliri, wejr yanapalla, wejr žejtkatalla.

³¹Nii orapacha Jesusaqui Pedruž kjara tanziča, nižaza niizquiz cjichiča:

—Ancha upa kuzzizamča amqui. ¿Kjažtiquiztan am kuz turwayskatchamtaya?

³²Ninacž warcuquin luztan, tjamiqui zekchiča. ³³Jalla nii cheržcu warcuquiz žejlñi žoñinacaqui Jesusiž yujcquiz quillziča, tuž cjican:

—Chekapan werara Yooz Maatimkalala amqui.

LAANACA ČHJETINTA

³⁴Jalla nuž kota kajkžcu, Genesaret cjita yoka irantichiča. ³⁵Nii yokchiz žoñinacaqui Jesusa pajchiča. Jalla nekztan “Jesusa tekž žejlča”, cjican liwj nii yokaran mazmazziča. Nii quintu maztiquiztan tjapa laanaca zjičchiča, jakziquin Jesusa želatčhaja, jalla nicju. ³⁶Nii žoñinacaqui Jesusižquiz walja rocchiča, tuž cjican: —Am zquit puntalla mekaz lanzkatžinalla. Tjapa lanzñi žoñinacaqui žejtchi cjissiča.

UJ PUNTU

15 ¹Jalla nekztanaqui tsjii kjaž fariseo žoñinacaqui nižaza tsjii

kjaž lii tjaajiñi maestruncáztanpacha Jesusižquiz macjatchiċha. Ninacaqui Jerusalén wajtquiztan tjonchiċha.

Jesusižquiz pecunchiċha, tuž cjican:

²—¿Kjažtiquiztan amiž tjaajintanacaqui učum tuquita atchi ejpnacž custurumpi ana cazjo? Ana kjara awjžcu, lujl-la.

³Pero Jesusaqui ninacžquiz pewcziċha, tuž cjican:

—Anċhuczi, ¿kjažtiquiztan Yooz mantita lii ana cazjo? Nii lii caz cjenpacha persun custurumpinacakaz paala anċhucui. ⁴Yoozqui tuž cjichiċha: “Am maa ejpmi rispitaquiċha”. Nižaza cjichiċha: “Jequit persun maa ejpž quintra chjaawjkataċhaja, jalla niiqui contaj cjila”. ⁵Pero anċhuczi tuž tjaajiñċhucċha: Žoñiqui persun maa ejpžquin chiyasaċha, tuž cjican: “Am anal yanapasaċha. Tjapa wejt cusasanaca Yoozquin tjaataċha nekztan”. ⁶Jequit nižta chiyāċhaj niiqui, niž persun maa ejpžquiz anaž yanapċuca cjesaċha. Jalla nuž tjaajincan anċhucui Yooz mantita ana walkatchinċhucċha, persun custurumpi jarukaz ojċzjapa. ⁷Ana wal kuzziz žoñinaca. Isaías cjita profetaqui anċhucui puntuquiztan zuma kjana cjiirchiċha, tuž cjican:

⁸“Tii žoñinacaqui atžtankaz wejtquiz rispitiċha. Pero tinacž ultim kuzzti wejtquiztan ažquinċha. Nižaza wejr anaž rispitiċha. ⁹Tinacaqui inakaz wejtquin custurumpi paaċha. Tinacž tjaajintanacaqui žoñiž mantitakazza”.

¹⁰Jalla nekztanaqui Jesusaqui žoñinaca kjawziċha, nižaza tuž cjichiċha:

—Nonžna, nižaza intintazñi kuzziz cjee. ¹¹Anaž zawnctan kjuylchuc

žoñž atquiz luzñiqui uj cjesaċha žoñžquiziqui. Antiz žoñž atquiztan ulanñi, jalla niž uj cjesaċha žoñžquiziqui.

¹²Jalla nuž chiitiquiztan Jesusiž tjaajinta žoñinacaqui nižquin macjatchiċha, nižaza cjichiċha:

—Nii fariseo žoñinacaqui am chiita taku nonžcu anċa žawjwatċha. ¿Nii ana nayċhamjo?

¹³Pero Jesusaqui ninacžquiz kjaaziċha, tuž cjican:

—Jakzilta zkalat wejt arajpach Yooz Epiz ana ċhjacta cjeċhaja, jalla nii zkalaqui zep'ižtanpacha kajlžtaž cjequiċha. ¹⁴Ninacžquiz ana ċhijquiza. Ninacaqui zur žoñinacžtakazza. Yekja zuranacžquiz irpican, pucultanpacha wali ojtquiz tjojtsnasaċha.

¹⁵Pedruqui Jesusižquiz cjichiċha:

—Tii puntuquiztan wejtnacaquiz tjaajznalla.

¹⁶Jesusaqui cjichiċha:

—¿Anċhucui zakaz ana intintiya?

¹⁷Tjapa atquiz luzñi ċheriqui pjuchquiz luzza, nekztan wir ċjutñiž ulanċha. ¿Jalla nii ana intintiya? ¹⁸Pero atquiztan ulanñi chiitaqui kuzquiztan tjonċha. Jalla nii žoñžquiziqui uj cjesaċha.

¹⁹Kuzquiztanpanž ulanċha tižtanaca, ana wali pinsisnacaqui, nižaza žoñi conzqui, nižaza adulteriuquiz ojċlayzqui, nižaza yekja maatakžtan žejlžqui, nižaza cusasanaca kjañžqui, nižaza toscar taku chiizqui, nižaza ana wal taku joojoozqui. ²⁰Jalla nižtanaca uj cjesaċha žoñžquiziqui. Pero ana kjara awjžcu, jalla nižta lujlžcu, anapan uj cjesaċha. Jalla niiqui žoñž custurumpikazza.

YOOZQUIN KUZZIZ MAATAKA

²¹Jalla nekztanaqui Jesusaqui nijwctan ojċchiċha Tiro nižaza Sidón

cjita yokquin. ²² Jalla nijwc želan tsjaa cananea yokchiz žoñqui Jesusižquiz tjonzinča, kjawcan:

—Wejt Jiliri. Davidž majchmajtquiztan tjonni. Wejr oksnalla. Wejt majtqui zajraž tantača. Jalla nižtiquiztan ana wira wali laača.

²³ Jesusaqui ana čjulumi kjaaziča. Jalla nekztan niž tjaajinta žoñinacaqui roqui tjonchiča, tuž cjican:

—Tsjika oka cjee. Učhum wirquiz kjaw jawi apžquiča.

²⁴ Nekztanaqui Jesusaqui cjichiča: —Yooz Ejpmi wejr cučanžquichiča Israel wajtchiz žoñinacžquin, ninacžquinkaz. Nii Israel žoñinacaqui katchi uuzanacažtakazza.

²⁵ Pero naa maatak žoñqui macjatžquichinča, nižaza niž yujcquiz quillzinča, tuž cjican:

—Wejt Jiliri, wejr yanapt'alla.

²⁶ Nekztan Jesusaqui naaquiz cjichiča:

—Maatinacž t'anta ana kjañasača, pawcžquin tjaazjapaqui. Jalla niiqui ana wali cjesača.

²⁷ Jalla nuž čiižinta cjenami naaqui cjichinča:

—Jesalla, wejt Jiliri. Pero pacunacami patruvaž mizquiztan tjawkzi čherilla lujlča.

²⁸ Jalla nekztanaqui Jesusaqui cjichiča:

—Cullacalla, walja Yoozquin kuzzizamča. Jaknužum am pecčhaja, nužoj cjila.

Jalla nii orapacha naaža majtqui žejtchi cjissinča.

LAANACA ČHJETINTA

²⁹ Jalla nekztanaqui Jesusaqui nijwctan ulanchiča, Galilea cjita kot ata watchiča. Nekztan tsjii curulla yawžcu julziča. ³⁰ Tama žoñinacaqui irantižquichiča, jakziquin nii

želatčhaja, jalla nicju. Ninacaqui laanaca zijicchiča, zuch žoñinaca, zur žoñinaca, ana čiiñi žoñinaca, čhjojritžta žoñinaca, tjpaman laanaca, jalla ninaca zijictatača, Jesusiž yujcquin. Jesusaqui ninaca liwj čhjetinchiča. ³¹ Jalla nuž cheržcu, žoñinacaqui ancha ispanitichiča. Ana čiiñi žoñinacaqui čiiñi cjissiča. Čhjojritžta žoñinacaqui žejtchi cjissiča. Zuch žoñinacaqui ojklajni cjissiča. Zur žoñinacaqui cherñi cjissiča. Jalla nuž cheržcu žoñinacaqui walja Yooz honora waytichiča, “Israel žoñinacž Yooz ancha honorchiz cjilalla”, cjican.

JESUSAQUI ČHJERI TJAAČHA

³² Jalla nekztanaqui Jesusaqui niž tjaajinta žoñinaca kjawžcu, tuž cjichiča:

—Tii žoñinacžtajapa kuzquiz anchal sint'uča. Čhjep maj wejttan chica žejlča, nižaza ana čjul čherchizza. Persun kjuyanacquin anal cutz pecuča ana lujlchi cjen. Tinacaqui ana lujlchi okaquiž niiqui, jicžaranž tismayasača.

³³ Nekztan niž tjaajinta žoñinacaqui cjichiča:

—¿Jaknuž čheri cunsicas, tii wacchi žoñinacžtajapajo? Tii yokquizic anaž kjayzmi žejlča.

³⁴ Jesusaqui ninacžquiz pewcziča, tuž cjican:

—¿Kjaž t'antichizt ančhucjo?

Ninacaqui kjaaziča, tuž cjican:

—Pakallak t'antača, nižaza tsjii kjaž ch'iznacžtan.

³⁵ Jalla nekztan Jesusaqui nii žoñinacžquiz mantichiča, yokquiz julznajo. ³⁶ Nekztan persun kjaržtan nii pakallak t'anta ch'iztanpača tanziča. Jalla nekztan Yoozquin gracias cjican tjaachiča. Nekztan

nii t'antanaca ch'iznaca kjolkjolziča. Nekztan niiz tjaajinta žoñinacžquiz toj tojziča. Nekztan ninacazti partir paychiča nii tama žoñinacžquiz.
³⁷Tjapa nii tama žoñinacazti čjjeri lujlžcu chjekchi cjissiča. Nižaza žejtchinacaqui pakallak canasta chjijpi ricujtatača. ³⁸Pusi warank luctak žoñinacatača lujlchiqi. Nižaza nii oraqui maatakami ocjalami muzpa želatčhay, pero ana kantatača.
³⁹Jalla nekztanaqui Jesusaqui nii žoñinacžquiz liwj cuchanchiča okajo. Niimi warcuquin luzziča. Nekztan Magdalena cjita yokquin ojkičiča.

JESUSIŽ QUINTRA ŽOÑINACA

16 ¹Fariseo žoñinacami, saduceo žoñinacami Jesusa cherzñi ojkičiča. Jesusiž quintra uj jwes pecatča. Jalla nižtiquiztan Jesusižquiztan maychiča, arajpach milajru tjeznajo, tsjii sinalažtakaz.
²Jesusaqui ninacžquiz kjaaziča, tuž cjican:
 —Zezilla arajpach tsjiri ljoc cjissi cjen, “Jakac zuma tjuñiž cjequiča” cjinčhucča. ³Nižaza wentan tjuñi tjewktan arajpach tsjiri ljoc cjissi cjenaqui, walja tsjiri cjenaqui,
 “Tonjiqui ana zum tjuñiž cjequiča” cjinčhucča. Ana zum kuzziz žoñinaca. Ančhucqui tsewcta tsjiri cheržcu, zuma tjuñi ana zuma tjuñi cječhaja, jalla nii zumpacha zarayinčhucča. Pero ančhucqui weriž paata sinalanaca cheržcu, ana zuma zarayinčhucča.
⁴Ana zum kuzziz žoñinacaqui Yoozquiztan zarakchiž cjen, sinala sinala mayča. Ančhucžtajapa Jonás puntuqi sinalažtakaz žejlča. Ana iya tjeežta cjequiča. —Jalla nuž chiižcu Jesusaqui ninacžquiztan zarakchiča.
⁵Niiz tjaajinta žoñinacaqui kotquin tsjii latu kajkičiča. Nižaza t'anti

žaka chjitz tjatstkalča. ⁶Nekztanaqui Jesusaqui ninacžquiz cjichiča:

—Tii taku nonžna. Fariseo žoñinacž liwaturžquiztanami nižaza saduceo žoñinacž liwaturžquiztanami zumpacha cwitasaquiča.

⁷Jalla nii chiita nonžcu, tjaajinta žoñinacaqui ninacpora parlasiča, tuž cjican:

—Učhumqui ana t'anta zjijtača, jalla nižtiquiztan niža chiiča.

⁸Jesusaqui ninacž pinsita zizcu, ninacžquiz paljaychiča tuž cjican:

—Ĳjažtiquiztan ančhucqui t'antiquinkaz pinsejo? Ančhucqui ancha upa kuzzizčhucča. ⁹Anapanž ančhucqui wira intintas, žtižta ana cjuñžjo? Pjijska t'antiquiztan pjijska warank luctak žoñžquiz partir payžcu lujlkatchinla. Nekztan Ĳkjaž canasta nii žejtchi t'antanaca ricujtataya?

¹⁰Nižaza pakallak t'antiquiztan pusi warank luctak žoñžquiz partir payžcu lujlkatchinla. Nekztan Ĳkjaž canastat nii žejtchi t'antanaca ricujtataya?

¹¹Fariseo žoñinacž puntuquiztanami nižaza saduceo žoñinacž puntuquiztanami, jalla nii liwatur puntu chiičinča. Jalla nii chiitaqui anača ultim t'anti puntuquiztanaqui. ĲAnaž nii intintas, ančhucya?

¹²Jalla nekztanaqui ninacaqui zumpacha intintazziča. Jesusaqui ultim t'anti liwaturquiztan ana nii puntu chiižinčiča. Pero fariseož tjaajinta puntuquiztan nižaza saduceož tjaajinta puntuquiztan, jalla nii puntu chiižinčiča, jalla nii tjaajintanacquiztan cwitasaquiča, cjican.

ĲJECT JESUSAQUI?

¹³Jalla nekztanaqui Jesusaqui Cesarea de Filipo cjita yokquin ojkičiča. Nii irantižcu, niiz tjaajinta žoñinacžquiz pewcziča, tuž cjican:

—Wejrqui tsewcta cuchanžquita Yooz Žoñtča. Žoñinacaqui wejt puntuquiztan ċkjažt cjeejo?

¹⁴Ninacaqui kjaaziča, tuž cjican:

—Yekjapanacaqui am puntuquiztan tuž cjicha: “Juan Bautistača niiqui”. Yekjapanacaqui cjiča, “Eliassa niiqui”. Nižaza yekjapanacaqui cjiča, “Jeremiassa niiqui”. Nižaza yekjapanacaqui cjiča, “Tsjii yekja profetača niiqui”.

¹⁵Jalla nekztanaqui Jesusaqui ninacžquiz pewcziča, tuž cjican:

—Ančhuczi wejt puntuquiztan ċkjažžaž cjeejo? ¹⁶Simón Pedruqui tuž cjichiča:

—Yooziž uchta Cristumča amqui, žejtñi Yooz Maatimča.

¹⁷Jesusaqui nekztan cjichiča:

—Simón, Jonás maati, jalla nuž chiitiquiztanaqui cuntintum cjee amqui. Anaž jakzilta žoñimi amquiz nii tjaajinchiqui. Wejt arajpach Yooz Ejppankazza am zizkatchiqui.

¹⁸Amquiz cjiwča. Tekztan najwkhuc amqui Pedro cjitam cjequiča. Nižaza tii maz simintuchiz wejrqui wejt icliza kjuyača. Wejt iclizaqui wejtquin kuzziz žoñinacača. Ticzmi wejt iclizquiztan ana atipasača. ¹⁹Wejrqui amquiz llawižtakaz poder tjaacha žoñinaca arajpach Yooz mantuquiz luzkatzjapa. Tii mantuquiz amqui jequit Yooz mantuquiz luzkatačaja, jalla niiqui arajpach Yooz wajtquin luzkatta zakaz cjequiča. Nižaza tii mantuquiz jequit Yooz mantuquiz ana luzkatačaja, jalla niiqui arajpach Yooz wajtquin ana luzasača.

²⁰Jalla nekztanaqui Jesusaqui niž tjaajinta žoñinacžquiz mantichiča, tuž cjican:

—Anaž jecžquizimi maznaquiča, “Niiča Cristuqui” cjicanaqui.

JESUSAQUI NIIŽ TICZ PUNTU CHIČHA

²¹Nekztan najwkhuc Jesusaqui tjaajinta žoñinacžquiz niž ticz puntuquiztan paljaji kallantichiča, tuž cjican:

—Wejrqui Jerusalén watja ojksanča. Jalla nicju nii wajtchiz jilirinacami, nižaza timplu jilirinacami, nižaza lii tjaajiñi maestruncami jalla ninacaqui wejr walja sufriskataquiča. Ultimquiziqui wejr conaquiča. Jalla nuž contiguiztan čhjep majquiztan jacatatača.

²²Nekztanaqui Pedruqui Jesusa tsjii latu chjitchiča, chiižinzjapa. Chiižinzcan, tuž cjichiča:

—Wejt Jiliri, amiž nuž chiitacama Yooz Ejppan anaj niic nuž munlalla. Amquiz anaj niža watlalla.

²³Jalla nuž chiitiquiztan Jesusaqui Pedruž kjutñi kjutziča, tuž cjican:

—Satanás, wejtquiztan zaraka. Amqui wejr ujquiz tjojtskatz pecča. Am kuz pinsitaqui anaž Yooz pinsita, antiz žoñiž pinsitakazza.

²⁴Jalla nekztanaqui Jesusaqui niž tjaajinta žoñinacžquiz cjichiča:

—Jequit wejttan chica kamz pecčhaj niiqui, primiruqui persun kamañ wiraqui tjatza. Sufrisjapaqui listoј cjiła, ticzcama. Nekztan wejttan chicaž kamaquiča. ²⁵Jakziltat persun kamañ wira ana tjats pecčhaj niiqui, arajpach kamañauqui ana tjaataž cjequiča. Jakziltat wejt laycu persun kamañ wira tjatznačaja, jalla niiqui arajpachquin wiñaya kamaquiča.

²⁶Tsjii žoñiqui tjapa tii mantuquiz žejlñi cusasanaca kanasača. Pero nekztan infernunquin okaquič niiqui, tjapa nii kanta cusasanaca, ččhjulpapat sirwejo? Inakaz cjequiča. Arajpachquin Yooztan kamzqui persun

liwriizqui anaž paaztanac kjayasača. ²⁷Wejrqui tsewtan cuchanžquita Yooz Žoñtča. Tsii nooiqui wejrqui wejt anjilanacžtan quejpžcača; wejt Ejpž wali aztan quejpžcača. Jalla nuž quejpžcu, wejrqui zapa maynižquiz tjaača, jaknužt kamčhaja, jalla nii jaru tjaača. ²⁸Weraral cjiwča. Tsii nooiqui wejrqui mantiz poderžtan tjonacha. Yekjap tekzi žejlñi žoñinacaqui nii noojcama ana ticznaquiča.

JESUSAQUI TSJEMATAŽ CJISSIČHA

17 ¹Sojta tjuñquiztan Jesusaqui Pedružtan, Jacobžtan, Juanžtan, Jacobož lajk, jalla ninaca chjitchiča. Ninacžtan alaja nuž pajk curquin ojkžcu, yawchiča. ²Jalla nieju ninacž yujcquin tsjemat chercherchiz cjiSSIČHA. Jesusiž yujcqui walja c'ajñi cjiSSIČHA tjuñižtakaz. Nižaza niž zquitimi muzpa llijñi cjiSSIČHA, nižaza ancha chiwi. ³Nii orapacha MoiseStan Eliastan parizichiča. Nii pucultan žoñiqui Jesusižtan parlican želatča. ⁴Jalla nekztan Pedruqui Jesusižquiz cjichiča:

—Wejt Jiliri, tekz žejlžqui walikazza. Am pecaquiči niiqui, čhjep chjujlli kjuyaž kjuyača wejrnacqui, tsjiiqui amta, tsjiiqui MoiseSta, tsjiiqui Eliasta.

⁵Pedruž nuž chiyen, zuma kjañi tsjiriqui ninacžquiz urpuntichiča. Tsjirquiztan tsjii jora chiižquichiča, tuž cjican:

—Tiiča wejt k'ayi Maatiqui. Tiiž cjen anchal cuntintutča. Jalla tiiž takunaca catoka.

⁶Jalla nii chiižquita nonžcuqui, nii čhjep tjaajinta žoñinacaqui yokquiz tuzi t'okziča. Muzpa tsuchiča. ⁷Jalla nuž tuzi t'okzi želan, Jesusaqui ninacžquiz macjatžquichiča. Ninacžquiz kjaržtan lanlanžinchiča, tuž cjican:

—Tsijtsna. Anača tsuca.

⁸Ninacaqui acha waytižcu Jesusa alajakaz cherziča, ana iya jecmi cherchiča.

⁹Nekztanaqui curquiztan chjiwžcan, Jesusaqui ninacžquiz mantichiča, tuž cjican:

—Anaž jecžquizimi nii ančucaž cherta maznaquiča, weriž ticziquiztan jacatatta, jalla niicama.

¹⁰Nekztanaqui niž tjaajinta žoñinacaqui Jesusižquiz pewcziča, tuž cjican:

—Lii tjaajiñi maestrunacaqui cjiñiča, primero Elías profetaqui tjonstanča, nii. ¿Kjažtiquiztan nii maestrunacaqui nižta chiiya?

¹¹Jesusaqui kjaaziča, tuž cjican:

—Ultimupanž Eliasqui wejt tuqui tjonchiča. Niiqui tjappachaž tjacziča, wejr tjonzjapa. ¹²Wejrqui cjiwča. Eliasqui tjonchitala. Pero lii maestrunacaqui nii Elías ana pajchila. Antiz ninacž kuzcama nii Elías čhjulumu sufriskatchiča. Nižaza ninacaqui wejrzakaz ancha sufriskataquiča.

¹³Jalla nuž Jesusiž chiitiquiztan nii tjaajinta žoñinacaqui tantiyazziča, Juan Bautistača Eliasqui, nii.

TSJII MAJCHQUI ZAJRAŽ TUCKATTA

¹⁴Jalla nekztanaqui curquiztan chjiwžcu, parti žoñinacžquiz irantižquichiča. Nekztan tsjii žoñiqui Jesusižquiz macjatžcu, niž yujcquiz quillziča. Nižaza tuž cjichiča:

¹⁵—Wejt Jiliri, wejt majchquiz okžnalla. Niiqui t'ucñipanča. Ancha sufriča. Avisac ujquiz tjojtsa, nižaza kjazquiz zakaz tjojtsa. ¹⁶Tekz zjijcchinča am tjaajinta žoñinacžquiz. Ninacaqui ana čhetñi atchiča.

¹⁷Jesusaqui kjaaziča, tuž cjican:

—Tii timpuquiz kamñi žoñinacaqui ana Yoozquin kuzzizza, ana zumača. ¿Ĉjulorcamat wejr anĉucatan želaqui? ¿Ĉjulorcamat anĉucaquiz awantaqui? Wejtquin zjijca nii am majch.

¹⁸ Jalla nekztanaqui Jesusaqui nii majch tanñi zajra ujziča; nekztan chjatkatchiča. Jalla nii orapacha žejtchi cjissiča. ¹⁹ Jalla nekztanaqui tjaajinta žoñinacaqui Jesusižquiz zinapora pewcziča, tuž cjican:

—¿Kjažtiquiztan wejrnacqui zajraž tanta žoñi ana ĉjetñi atchintaya?

²⁰ Jesusaqui kjaaziča, tuž cjican:

—Anĉucqui anača Yoozquin tjapa kuzziz. Jalla nižtiquiztan ana chjatkati atča. Weraral cjiwča. Tsjii mostasa cjita simillaqui koltallača. Ĉhjactiquiztan walja pakjiž pajkča. Yoozquin tjapa kuzzizĉhuc cjeĉhaj niĉui, jalla tuž paasača. Tii curumiž mantasača, tuž cjican: “Tekztan najwk oka”. Jalla nuž mantitiquiztan curucž okasača. Tjappacha ĉjulumi paasača anĉucqui, ultimu Yoozquin tjapa kuztan cjeĉhaj niĉui. ²¹ Pero tii punta zajra chjatkatzjapa, Yoozquin mayiziz waquiziča. Nižaza ayunas waquiziča.

²² Galilea yokaran juntupacha ojklaycan, Jesusaqui niiž tjaajinta žoñinacžquiz chiichiča, tuž cjican:

—Wejrqui tsewctan cuchanžquita Yooz Žoñtča. Wejrqui žoñinacž kjarquin intirjital cjeeča. ²³ Nižaza contal cjeeča. Nižaza ĉjpep majquiztanzi jacadatača.

Jalla nuž ĉiitiquiztanaqui ancha llaquisiskatchiča nii tjaajintanacžquiz.

TIMPLU IMPUESTO

²⁴ Nekztan Jesusižtan niiž tjaajintanacžtanpacha Capernaum watja irantichiča. Nekztan timplujapa

impuesto cobriñinacaqui Pedružquin cherzñi ojkcichiča. Jalla niižquin zalžcu pewcziča tuž cjican:

—¿Anĉuca tjaajiñi maestruqui timplu impuesto ana pacñikaya?

²⁵ Pedruqui kjaaziča, tuž cjican:

—Impuesto pacñipanĉay.

Jalla nekztanaqui Pedruqui kjuyquiz luzziča, jakziquin Jesusac želatĉhaja, jalla nicju. Ima Pedruž chiyan, Jesusaqui niižquiz paljaychiča, tuž cjican:

—Simón, ĉtii tantiya? Tii muntuquiz žejlñi jilirinacaqui impuesto cobriñiča.

¿Jakziltižquiztan cobriya? ¿Persun wajtchiz žoñinacžquiztankaya? už ĉyekja wajtchiz žoñinacžquiztan, ja'?

²⁶ Pedruqui kjaaziča tuž cjican:

—Yekja wajtchiz žoñinacžquiztanpanča.

Nekztan Jesusaqui cjichiča:

—Jalla nižtiquiztan nii jilirinacž persun wajtchiz žoñinacaqui impuestonaca ana pacasača. ²⁷ Jalla nuž cjenami, anaž jecmi uĉum quintru iñiziñi cjiskatz pecuča. Jaziqui kotquin oka. Nekztan ch'iz tanzjapa kjazquiz anzuelo tjojtznaquiča. Primiru tanzi ch'iz lecznaquiča. Nii ch'iz ata waakatžcu, tsjii paaz wachaquiča. Nii paazqui wejt impuestojapa, nižaza am impuestojapa wacaquiča. Nii paaz ĉhjicha, uĉum impuestonaca paczjapa.

¿JECT TUCQUIN CJES?

18 ¹ Jalla nii orapacha tjaajinta žoñinacaqui Jesusižquiz macjatžcu pewcziča, tuž cjican:

—Arajpach Yooz wajtquiz, ĉject juc'ant pajk puestuquin uĉtaž cjeequi?

² Jalla nekztanaqui Jesusaqui tsjii uza kjawziča. Nii uza ninacž taypiquiz tsijtskatchiča. ³ Nekztanaqui Jesusaqui cjichiča:

—Weraral cjiwčha. Ančhucqui tii ocjalž kuz irata, nižta kuzziz pecčha. Ančhuca kuz ana campiita cječhaj niiqui, arajpach Yooz wajtquiz anapan luzasačha. ⁴Jalla nižtiquiztan tii ocjalž kuz irata, jalla nižta humilde kuzziz cjis waquizičha. Jakziltat nižta kuzziz cjisnaquiž niiqui, jalla niičha arajpach Yooz wajtquiz juc'ant honorchizqui. Juc'ant zuma puestuquiz uchtaž cjequičha. ⁵Jequit weriž cjen tsjii ocjalažtakaz humilde kuzziz žoñi risiwčhaja, jalla niiqui wejrzakaz risiwčha.

PAAZQUIZTAN CWITASA

⁶Nižaza jakzilta humilde kuzziz žoñit wejtquin tjapa kuztan crijačhaja, jalla niižquiz ana jakziltami ujquiz tjojtskatž waquizičha. Ujquiz tjojtskataquiž niiqui, nii ujquiz tjojtskatñi žoñž jorquiz tsjii pajk molinu tjaaž mokžcu, koz kotquiz jacuntiz waquizičha. Jalla nii tsjan cusaž cjesačha nii ujquiz tjojtskatñi žoñžtaqui. ⁷iŽoñinacajay! Ujquiz tjojtaquičha, nižaza ujquiz tjojtskataquičha. Pero nektzan ana walinaca tjonaquičha. Tii muntuquiz ujquiz tjojtskatñinaca panž želaquičha, pero nii ujquiz tjojtskatñinacaqui ninacžtajapa ana waliž cjequičha.

⁸Jalla nižtiquiztan am kjaražlaj už kjojčažlaj ujquiz tjojtskatčhaja, nii uj paañi kjara cjicu už kjojča cjicu pootzna, nižaza najwk tjojta. Jalla nuž tsjii kjara cjicu už tsjii kjojča cjicu pertissi cjenami am parti curpuqui ana infiernuquin tjojtaž cjesačha. Jalla nuž waliž cjesačha. ⁹Nižaza am čhujcquiqui ujquiz tjojtskatčhaja, jalla nii čhujcqui lecžna, nižaza najwk tjojta. Yooztan wiñaya kamzjapaqui tsjii čhujquiqui pertissiž cjequiž niiqui, waliž cjequičha. Tjapa curpuqui

infiernuquin tjojtaž cjequiž niiqui, ana waliž cjequičha.

ZARAKCHI UUAZ QUINTU

¹⁰Humilde kuzziz žoñinacžtan ana chjaawjkata. Ančhucaquiz cjiwčha, ninacž anjilanacaqui wejt arajpach Yooz Ejpž yujcquiz žejlñipančha. ¹¹Wejrqui tsewtan cuchanžquita Yooz Žoñičha.

Wejrqui tii muntuquiz tjonchinčha, ujquiz kamñi žoñinaca liwriizjapa.

¹²¿Jalla tii tantiya? Tsjii žoñiqui patac uuzichiztačha. Patac uuziquiztan tsiillaqui yekjaquin zaraktan, nii žoñiqui nii llatuntunc llatuncani uuzinaca curquin ecaquičha, zarakchi uuaž kjuržquizjapa. ¹³Nižaza katchi uuaž wachaquiž niiqui, nektzan walja chipznaquičha ana zarakchi uuzanacžquiztan juc'anti. ¹⁴Jalla nižta irata ančhuca arajpach Yooz Ejpqui humilde kuzziz žoñinacžquiztan anapan jakziltami pertita cjis munčha.

UJ PERTUNZ PUNTU

¹⁵Am jilaqui am quintra ana wali paaquiz niiqui, jalla nižtan zinapora palt'a, niž ana wali paata ujquiztan “ujchizpančha” cjan cjeequi. Jalla nuž amiž chiižintiquiztan catokaquiz niiqui, nii jilaqui ricujta cjequičha. ¹⁶Zinapora chiižintiquiztan ana nonz pecaquiz niiqui, nii uj paañi jilžquiztan okaquičha. Nektzan iya pucultan jila kjawžcu, wila nii uj paañi jilžquin okaquičha, niž paata uj tjeezjapa. Jalla nuž paažcu pucultan cjicu už čhjepultan cjicu testicž taypiquiz niž paata uj tjeežta cjequičha. ¹⁷Nii uj paañiqui anapanž niž uj maz pecaquiz niiqui, jalla nii puntuquiztan tjapa icliž jilanacžquin maznaquičha. Anapan niž uj maz pecaquiz niiqui, ana Yoozquin criichi jilažtakaz čhejlinaquičha, nižaza impuesto cobriñi žoñižtakaz.

¹⁸Ultim weraral cjiwča. Tii muntuquiz jequit am čhelačhaja, jalla niiqui arajpach Yooziž čhejlta zakaz cjequiča. Nižaza tii muntuquiz jequit am cutznačhaja, jalla niiqui arajpach Yooziž cutžta zakaz cjequiča.

¹⁹Tii zakal chiižinuča. Tii muntuquiz pucultan ančhucqui tsjiikaz Yoozquiztan mayaquiž niiqui, ančhucaquiz tjaataž cjequiča. Wejt arajpach Yooz Ejpqui ančhucaž mayta tjaaquiča. ²⁰Nižaza tsjii pucultanami čhjepultanami wejtquin kuzziz cjen wejt tjuuquiz ajcznaquiz niiqui, jalla ninacž taypiquiz wejrzakaz želača.

²¹Wiruñaquí Pedruqui Jesusižquin pewczñi ojkcchiča. Zalžcu, jalla tuž pewcziča:

—Wejt Jiliri, čKjaž wiltamiž wejt jilaqui wejt quintra uj paažcu pertuna mayisasaya? čNižaza wejrqui kjaž wiltat pertunasaya? čPakallak wilita pertunasaya?

²²Jesusaquí niizquiz kjaaziča, tuž cjican:

—Wejrqui cjiwča, anaž pakallak wilita cjesača. Antiz pakallak tunc pakallakuni wiltan wiltan pertunasača.

KAJCHIZ ŽOŇI QUINTU

²³Arajpach Yooz mantiz puntuquiztan jalla tuzuča. Tsjii chawc jiliriqui piyunanacžquiz kaja packatz pecatča. ²⁴Jalla nuž packatan tsjii kajchiz žoñiqui zjjictatača. Nii žoñiqui walja kajanacchiztača, tsjii kjaž millona. ²⁵Nii piyunžtaquí anaž pacz paaz želatča. Nekztan patruñaquí jalla tuž mantichiča: “Tii žoñi tuya, paaz cunciczjapa. Nižaza niiz tjunmi, ocjalanacami, tjapa niiz cusasanacami liwž tuyła kaja pacz paaz cunciczjapa”. ²⁶Nekztanaquí nii piyunaquí patruñž yujcquiz quillziča, nižaza roct'ichiča,

tuž cjican: “Wejt patruña, pertunalla. Tjappachal pacača”. ²⁷Nižtami patruñaquí ancha okziča; nižaza nii kaja ana cobrichiča. Jalla nižtiquiztan liwrii cjissiča nii kajquiztan. ²⁸Wajilla nii piyunaquí nijwctan ulanžcu tsjii piyun maztan zalchiča. Nii piyun maziquí tsjii kjažtalla kajatača nii pertunta piyunžquiz. Nekztan nii pertunta piyunaquí jor t'ullcu tanchiča, nii packatzjapa, tuž cjican: “Kajquiztan tjappacha paca”. ²⁹Jalla nekztanaquí nii piyun maziquí niiz yujcquiz quillziča, nižaza roct'ichiča, tuž cjican: “Pasinsis kuzziz cjee.

Nii kajallquiztan tjappachakal pacača”. ³⁰Nii kaja cobriñizti ana munchiča. Antiz carcilquin uchantichiča, jalla nii kaja paczcama.

³¹Parti piyunanacaquí nižta paañi cheržcu ancha sint'ichiča. Nekztan patruñžquiz mazñi ojkcchiča. Jalla nicju tjappacha quint'ichiča, jaknužt watčhaja, nii. ³²Jalla nekztanaquí patruñaquí nii pertunta piyuna wilita kjawžkatchiča. Nekztan cjichiča:

“Ana zum kuzziz piyuna, wejrqui tjapa am kajanaca pertunchinča, amiž roct'iniž cjen. ³³Jaknužt wejrqui am kajquiztan, pertunchinčhaja, jalla nužuzakaz amlaquí am piyun mazquiz pertunstanča”. ³⁴Jalla nekztanaquí patruñaquí juc'anti žawjziča. Nižaza mantichiča, nii piyuna casticzjapa, tjapa niiz kaja paczcama.

³⁵Jesusaquí nii quintu quint'ican jalla tuž žerziča:

—Jakzilta ančhucaquiztan niiz jilžquiz kuzquiztan ana pertunačhaja, jalla nužuzakaz wejt arajpach Yooz Ejpqui ančhucaquiz ana pertunaquiča.

MAATAKŽTAN JALJTIZ PUNTU

19 ¹Jalla nuž tjaažinžcu Jesusaquí Galilea yokquiztan ojkcchiča.

Judea yokquin irantichiċha, Jordán cġita puġġ tuwanchuc. ²Muzpa žoñinacaqui niizquiz apziċha. Jalla nicju muzpa laanaca ċhetinchiċha.

³Jalla nekztanaqui yekjap fariseo žoñinacaqui Jesusižquiz macjatchiċha, ujquiz tjojtskatzjapa. Nekztan tuž pewcziċha:

—Ĉĥjul uj paatiquiztanaqui persun maatakžtanaqui jaljtasaya?

⁴Jesusaqui ninacžquiz kjaaziċha, tuž cġican:

—Yoozqui tii muntu paacan, luctakžtan maatakžtan paachiċha. ĈCġijrta Yooz takuqui ana liichinċhucjo?

⁵Yooz takuqui tuž cġiċha: “Jalla nižtiquiztan tsjii žoñiqui tjunatan zalzjapa, maa ejpžquiztan zarakstanċha. Zalžcu pucultan tsjii lucutiñi cġissa”.

⁶Jalla nuž kjanapacha tjeeċa, anaž iya pucultan žoñi, pero tsjiikazza. Jalla nižtiquiztan anaž jaljtasaċha. Yoozza tsjii luctakžtan tsjaa maatakžtan ċjalziqui, tsjii lucutiñi cġisjapa. Yooz ċjalžtaqui ana jalta cjesaċha.

⁷Nekztanaqui pewcziċha tuž cġican:

—Moisesqui jalla tuž mantichiċha.

Tsjii certificado de divorcio tjaaquiz niiqui, tjunatan jaljtasaċha. ĈKjažtiquiztan nižta mantichejo, ana jaljtiz želanajo?

⁸Jesusaqui ninacžquiz kjaaziċha, tuž cġican:

—Anċhucaž chojru kuzziz cjen Moisesqui tjunatan jaljtis lii tjaachiċha. Primirquiztanpacha anataž nižta.

⁹Wejrqui anċhucaquiz ċhiizinuċha. Adulteriuquiz ojklayniž cjenkaz am maatakžtan jaljtasaċha. Jequit ana adulterio paachiž cjenaqui niiz persun maatakžtan jaltaċhaja, nižaza yekja maatakžtan zalznaċhaja, jalla niiqui adulterio uj paaċha. Nižaza jequit divorcita maatakžtan zalznaċhaja, nii zakaz adulterio paaċha.

¹⁰Tjaajinta žoñinacaqui niizquiz cġiċhiċha:

—Luctakžtan persun maatakžtan jalla nižta cjesaž niiqui, anaž cumpinċha zalzqui.

¹¹Jesusaqui nekztan cġiċhiċha:

—Tjapa žoñinacaqui tii tjaajinta anaž catokaquiċha. Jakziltižquiz Yoozqui tjaajnaċhaja, jalla niiqui tii tjaajintaqui catokaquiċha. ¹²Žoñinacaqui punta punta ana zalzi cġiċha. Yekjapanacaqui nastiquiztanpacha ana zalzucaċha. Yekjapanacazti capunapantaċha, jalla nižtiquiztan ana zalžni atasaċha. Yekjapanacazti ana zalz pecċha, arajpach Yooz Ejpžtajapa langzjapa. Jecmiž tii takucama kami catokaquiz niiqui, paj kamla.

OCJALANACŽ PUNTU

¹³Žoñinacaqui ocjalanaca Jesusižquiz zġijcċhiċha, ocjalanacžquiz kjaržtan lanznajo, nii ocjalanacžtajapa Yoozquin mayižinajo. Pero tjaajinta žoñinacaqui zġijcċi žoñinacžquiz atajċhiċha. ¹⁴Nekztan Jesusaqui cġiċhiċha:

—Tii ocjalanaca wejtquin tjonaj cjee, ana ataja. Tii ocjalanacž kuz irata jalla nižta kuzzizza arajpach Yooz mantita kamañċiz žoñinacaqui.

¹⁵Nekztan Jesusaqui ocjalanacžquiz kjaržtan lanziċha. Jalla nekztan nii yokquiztan ojċċhiċha.

RICACH TJOWAQUI TJONCHIĈHA

¹⁶Wiruñaquei tsjii tjowaqui Jesusa ċheržni ojċċhiċha. Nekztan pewcziċha, tuž cġican:

—Zuma Maestro, Yooztan wiñaya kamzjapa, Ĉĥjul zumanacat wejr paasaya?

¹⁷Jesusaqui kjaaziċha, tuž cġican:

—ĈKjažtiquiztan “Zuma Maestro” cjee amjo? Tsjii alajaċha zumaqui.

Yoozkazza niiquei. Yooztan wiñaya kamz pecchaj niiquei, Yooz Epiž mantitanac jaru kama cjee.

¹⁸Nii tjowaqui jalla nektzan kjaaziča, tuž cjican:

—Ĉhjul mantitanacaya?

Jesusaqui niizquiz cjichiča:

—Anača žoñi konzui. Anača adulteriuquiz ojklayzqui. Anača tjangzqui. Anača toscara chiizqui, jeczquizimi. ¹⁹Am maa ejpmi rispitaquičha. Jaknužum persunpachquiz okzñamžlaja, jalla nižta okzñi kuzziz cjispanča žoñinacžquizimi, lijitum mazižtakazza.

²⁰Nii tjowaqui nektzan cjichiča:

—Tjapa nii mantitanacami cumpliñča koltiquiztanpacha. ĈJaziqui ĉhjulut wejtta pjaltasa?

²¹Jesusaqui tuž cjichiča:

—Ancha wali cjisim pecchaj niiquei, oka, nižaza amta žejlñi cusasanaca tuyzna. Jalla nii tuyžcu, porinacž ona. Jalla nižtiquiztan arajpachquin cusasanacažtakaz zuma honora tjaatam cjequičha. Jalla nii cumpliscu wiltam tjonaquičha wejtta chica ojklayzjapa.

²²Jalla nižta chiita nonžcu, nii tjowaqui walja llaquita kuzziz ojkičiča. Ancha ricachutača.

²³Jalla nektzanaqui Jesusaqui niiz tjajinta žoñinacžquin cjichiča:

—Weraral ančucaquiz cjiwča. Tsji ricachu žoñi arajpach Yooz mantuquiz luzjapa ancha ch'amaž cjesača. ²⁴Tsjii camello cjita animala žejlča. Nii camelluqui ch'aman acuj cjuñ pjetquiz luzasača. Jalla nižtaž ricachunacaqui tsjan ch'amača Yooz kamañ jiczquiz luzqui, Yooz wajtchiz žoñi cjisjapa.

²⁵Jalla nuž nonžcu, tjajinta žoñinacaqui walja ispantichiča. Nektzan ninacpora pewcsarassiča, tuž cjican:

—ĈJectpan liwriita cjesajo?

²⁶Jesusaqui ninacž kjutñi cherziča.

Jalla nektzan cjichiča:

—Žoñinacaqui anaž persunpacha liwrii atasača. Yoozpankazza liwriiñiquei. Yoozqui jecmi liwrii atasača.

²⁷Jalla nektzanaqui Pedruqui Jesusižquiz cjichiča:

—Wejt Jiliri, wejrnacqui tjapa persun cusasanaca jaytichinča, amtan chica ojklayzjapa. ĈJalla nižtiquiztan wejrnacqui ĉhjulut canas?

²⁸—Jesusaqui kjaaziča, tuž cjican:

—Weraral ančucaquiz cjiwča. Ew muntuquiz želan, wejrqui poderchiz puestuquiz luzača. Ančucazakaz poderchiz puestunacquiz luzaquičha, tuncapan Israel partira mantizjapa. ²⁹Jakzilta žoñit weriž cjen kjuyanaca, jilanaca, cullaquinaca, maa ejp, tjun, ocjalanaca, yokanaca ecačhaja, jalla ninacaž walja zuma kamañ wirchiz cjequičha. Nižaza arajpachquin Yooztan wiñaya kamaquičha. ³⁰Arajpachquin Yoozqui wacchi tii timpuquiz tucquin cjiñi žoñinaca wirquin cjskataquičha. Nižaza Yoozqui wacchi tii timpuquiz wirquin cjiñi žoñinaca tucquin cjskataquičha.

PIYUNANACŽ QUINTU

20 ¹Arajpach mantiñi Yooz puntuquiztan jalla tužuča. Wentanalla tsji yokchiz wali pajk patrunaqui piyunanaca kjuri ulanchiča, uwas frut zkala ajzjapa. ²Piyunanacžtan acuerduquiz luzičiča, zita langžtan tsjii denario cjita paaz paczjapa. Jalla nektzanaqui langžni cuhanžquichiča. ³Nektzan wenzlaka wilta ulanchiča. Palazquin inakaz žejlñi žoñinaca cherchiča.

⁴Ninacžquiz paljaychiča, tuž cjican: “Anchucqui wejt zkal yokquin langžni

oka. Wejrkal zumpacha pacača". Nekztanaqui ninacaqui ojkičiha.

⁵Taypuru patrunaqui wilta ulanchičiha, iya piyunanaca kjuri, nižaza langznajo. Nižaza taypuru zezi cjeella wilta ulanchičiha, piyunanaca kjuri, nižaza langznajo. ⁶Nii noojpacha zezi cjee wilta palaz kjutni ulanchičiha. Nižaza palazquin inakaz žejlñi žoñinacžtan zalchičiha. Ninacžquiz paljaychičiha tuž cjican: "¿Kjažtiquiztan ančhucqui tonj zita ana langz žejljo?" ⁷Ninacaqui patrunžquiz kjaazičiha, tuž cjican: "Anaž jecmi wejrnac langznajo rocchičiha". Nekztanaqui patrunaqui cjičičiha:

"Ančhucqui wejt yokquin zakaz langžni oka. Wejrkal jakniižlaj niil pacača".

⁸Tjuñiž kattan nii yokchiz patrunaqui niiz langzkatni encargado mantichičiha, tuž cjican: "Kjawžca langžni piyunanaca, paczjapa. Primiruqui wiri tjonchi piyunanacžquiz pacaquičiha; wirquin, tuqui tjonchi piyunanacžquiz pacaquičiha". ⁹Jalla nekztanaqui nii wiri luzzi piyunanacaqui langzkatnižquiz macjatchičiha. Zapa mayni ninacžquiz pactača, tsjii nooj lanžtaž nižtapacha. Tsjii denario cjita paaz tanzčiha. ¹⁰Jalla nekztanaqui wirquin paczquita primiru piyuna luzzi žoñinaca kjawžtatača. Jalla nii primiru piyuna luzzi žoñinacaqui pinsichičiha jila paca tanzjapa wiri piyuna luzzi žoñinacžquiztan. Jalla nekztanaqui pacchičiha tsjii denario cjita paaz zakaz. ¹¹Jalla nii paca tanžcu patrunž quintra quijchičiha, ¹²tuž cjican: "Tii wirquin piyuna luzzi žoñinacaqui tsjii orakaz langzičiha. Wejrnacžti primirquiztanpacha langžinčiha, nižaza zita ancha sii kjakquiz otžcan langžinčiha. Ninacžquizimi wejtnacaquizimi tsjiikaz pacchamča". Jalla nuž cjican quijchičiha. ¹³Nii patrunaqui tsjii

ninacžquiz kjaazičiha, tuž cjican: "Jila, amquiz anal incallchinčiha. Jalla nuž tsjii acuerduquiz luztapanla, tsjii denario paaz paczjapa. ¹⁴Tii paca tanzna, nižaza oka. Tii wirquin piyuna luzzi žoñinacžquiz nižazakaz pacz pecučiha, amquiz pactala, jalla nuž zakaz. ¹⁵Wejt persun paaztan jaknužut wejr pinsučhaja, jalla nuž wejt munañpiquiz pacasača. Weriz zuma pacni kuzziz cjen amqui inžiñi kuzziz cjissamla". ¹⁶Jalla nižta irataž wirquin cjiñinacaqui tucquinž cjequičiha. Nižaza tucquin cjiñinacaqui wirquinž cjequičiha. Kjawžta žoñinacaqui wacchičiha. Illzta žoñinacazti kolucullača.

JESUSAQUI NIIŽ TICZ MAZZIČHA

¹⁷Wiruñaquei Jesusaquei niiz tjaajinta žoñinacžtan Jerusalén ojkičiha. Jalla nuž jiczquiz ojkan, Jesusaquei tsjii latu niiz tuncapan illzta žoñinaca chjitchičiha, nižaza ninacžquiz tuž cjičičiha:

¹⁸—Ančhucqui zizza, tii jiczqui Jerusalén kjutniž ojkičiha, nii. Jerusalén wajtquin wejrqui intirjital cjeeča timplu jilirinacžquizimi lii tjaajiñi maestruncžquizimi. Jalla ninacaqui wejr conaquičiha. Wejrqui tsewtan cuchanžquita Yooz Žoñtča. ¹⁹Nižaza wejrqui yekja wajtchiz žoñinacžquiz intirjital cjeeča, ana wali burla paata cjisjapa. Nižaza wejrqui wjajttal cjeeča. Ultimquiziqui cruzquiz ch'awcta contal cjeeča. Jalla nekztan čhjep majquiztanzti jacatatača.

TSJII FAVORA MAYTA

²⁰Jacobžtan Juanžtan ninacž maaqui Jesusižquiz macjatžquichinčiha. Jacobžtan Juanžtan ninacž ejpqui Zebedeo cjitatača. Jalla naa maaqui maatinacžtanpacha Jesusižquin

macjatchinča. Nekztanaqui naaqui Jesusiž yujcquiz quillzinča, tsjii fawra mayzjapa. ²¹ Nekztan Jesusaqui naaquiz cjichiča:

—¿Amqui čhjulul pecya? —cjican.

Naaqui kjaazinča, tuž cjican:

—Amqui am mantis puestuquin luzcu tii wejt pucultan majchnaca am latuquiz uchnalla, tsjiiqui žew latuquiz nižaza tsjiiqui zkar latuquiz.

²² Jesusaqui tuž kjaaziča:

—Ančhucqui čhjulul mayčhaja ana intintazza. Wejrqui walja sufris tanča. ¿Nižtapacha ančhuc sufrasaya? Nižaza tsjii nooj ancha sufrican watača tsjii bautismožtakaz. ¿Jalla nižtapacha ančhuc sufrasaya?

Ninacaqui tuž kjaaziča:

—Nii sufris watimi atasacha.

²³ Nekztan Jesusaqui cjichiča:

—Weraral cjiwča. Ančhucpacha sufris tanznaquiča, tsjii lic wazužtakaz. Nižaza sufris wataquiča, tsjii bautismožtakaz. Pero wejrqui mantis puestuquin luzcu, žew latuquizimi zkar latuquizimi ana jecmi uchasača. Wejt Yooz Ejpkaz nii puestunaca tjaaqiča jeczajapa tjacžtakazlani, jalla ninacžta.

²⁴ Parti nii tuncapan illzta žoñinacaqui nii mayta puntu nonžcu nii pucultan jilazulcaž quintra žawjchiča. ²⁵ Pero Jesusaqui tjappacha nii tjaajintanaca kjawziča, nekztan tuž cjichiča:

—Ančhucqui zumpacha zizza, jalla tužu. Tii muntuquiz nación jilirinacaqui patrunažtakaz mantiñiča, nižaza chawc jilirinacaqui parti žoñinacžquiziqui niž mantita cazkatñipankazza. ²⁶ Ančhucqui ana nižta irata cjee. Tsjii kjutñiča nii irat kuzqui. Ančhucpacha jequit chawc jilirižtakaz cjis pecčhaja, jalla niiqui piyunažtakaz cjis waquiziča parti

žoñinacžquiziqui. ²⁷ Nižaza jequit ančhucpacha tucquin mantiñi cjis pecčhaja, jalla niiqui wirquin cjis waquiziča, parti žoñinacž mantitacama cjisjapa. ²⁸ Wejrqui tsewtan cuchanžquita Yooz Žoñtča. Wejrpacha tii muntuquiz ana tjonchinča, sirwita cjisjapa. Antiz wejrča tjonchinqui, žoñinacžquiz sirwisjapa, wejr ticzcama. Jalla nuž ticžcu walja preciochiztakal cjeeča, žoñinaca liwriizjapa. —Jalla nuž cjichiča Jesusaqui.

ZUR ŽOÑINACA ČHJETINTA

²⁹ Jalla nekztanaqui Jericó wajtquiztan ulnan, muzpa žoñinacaqui Jesusižquiz apziča. ³⁰ Jicz latuquin pucultan zur žoñi julzi želatča. Ninacaqui Jesusaž watñi nonžcu, kjawchiča tuž cjican:

—Wejt Jiliri, Davidž majchmajtquiztan tjonñi, wejrnacž okznalla.

³¹ Nekž žejlñi žoñinacaqui ninacžquiz ujziča, ch'uj cjeyajo. Ninacazti juc'anti kjawchiča, tuž cjican:

—Wejt Jiliri, Davidž majchmajtquiztan tjonñi, wejrnacž okznalla.

³² Jalla nekztan Jesusaqui tsijtscu, ninaca kjawziča. Kjawžcu ninacžquiz tuž pewcziča:

—¿Čhjulul werj paaj cjii ančhucya?

³³ Nii zur žoñinacaqui kjaaziča, tuž cjican:

—Wejt Jiliri, wejtnaca čhjujquiz čhjetinžinalla.

³⁴ Nekztanaqui Jesusaqui ninacžquiz sint'izcu čhjujqui lanlanžinchiča. Jalla nii orapacha cherni cjissiča. Jalla nekztanaqui Jesusižquiz apziča.

JESUSAQUI JERUSALEN WAJTQUIN LUZZIČA

21

¹ Jerusalén watja žcatžincan, Betfagé watja irantichiča.

Betfagé watjaqui Olivos cjita curu žcatitačha. Nicju irantican Jesusaqui pucultan tjaaajinta žoñinaca cuchanchičha, tuž cjican:

²—Jalla nii najwкта watja oka. Jalla nicju mokta lјat azni wachaquičha, nižaza pajk zijjc maltum wawchizza naa azniqui. Mokta jeržcu wejtquin akžcaquičha.

³Jakzilta žoñimiž atajasaž niiqui, nižquiz ančhucqui “Wejt Jiliriz pecčha. Wajilla tјepunta cјequičha tii azniqui”, nuž cjican nii žoñžquiz cјequičha. —Jalla nuž mantichičha Jesusaqui.

⁴Jalla nii watchiqui profetaž cјjјrta taku cumplissičha. Tuquitan nii profetaqui tuž cјjјrchičha:

⁵“Sión wajtchiz žoñinacžquiz tuž chiya: Chera, ančhuca chawc Jiliri tјončha, humilde kuzziz. Nižaza zijjc maltum aznuquiz yawchi tјonaquičha, nižaza nii zijjc aznuž maatanpacha tјonaquičha. Jalla ninacaqui carga kuzñi aznunacačha!”.

Jalla nuž cјjјrchičha nii profetaqui.

⁶Jalla nekztanaqui nii pucultanaqui ojkcichičha. Nižaza jaknužt Jesusaqui mantitčhaja, jalla niicama paachichičha.

⁷Ninacaqui lјat azñi naaža pajk zijjctanpacha akžquichičha. Jalla nuž akžcu, zquitinaca aznunacž juntuñ caruntichičha. Nekztan Jesusaqui yawchichičha. ⁸Niž ojkc jicз latuquiz muzpa žoñinaca želatčha. Ninacž zquiti jicзquiz chјinzičha. Yekјapaqui ramuz čhjañinaca murchičha jicзquiz chјinzjapa. ⁹Tucquin ojkcñi žoñinacami wirquin tјonñi žoñinacami chipcan walja wiwi kallantičichičha, tuž cjican:

—iViva tii Yooz tјuuquiz tјonchi žoñi! iDavid cjita chawc Jilirž majchmajtquiztan tјonñi! iAmqui rispittaj cјila! iAmquiz honora tјaataj cјila! iYooz Ejpžquin zakaz honora tјaataj cјila! —Jalla nuž wiwchichičha.

¹⁰Jesusaž Jerusalén watja luztan, tјapa nii chawjc wajtchiz žoñinacaqui walja ispantichi tјojknakchichičha. Nižaza walja pewcpewczichičha, tuž cjican:

—¿Jectpan teejo?

¹¹Žoñinacaqui tuž kjaazičha:

—Tiiqui Jesusa cjita profetala. Nazaret de Galilea, jalla najwќtan tјonchichičha.

JESUSAQUI TIMPLU PEWZIČHA

¹²Jalla nekztan Jesusaqui Yooz timpluquin luzzichičha. Jalla nicju tuyñinacami kјayñinacami timpluquiztan liwј tirkatchichičha zancchuccama. Nižaza paaz campiñi žoñinacž mizami pjocžinčichičha; paloma tuyñinacž sillami pjocžinchizakazza. ¹³Jalla nuž paažcu tuž cјichichičha:

—Yooz Takuqui tuž cјičha: “Wejt kјuyaqui Yoozquin mayiziz kјuyačha”. Ančhuczti tјañinacž kјuyažtakaz paachinčhucčha.

¹⁴Jalla nicju tsјii kјaž zur žoñinaca Jesusižquiz macјatžquichichičha, nižaza tsјii kјaž zuch žoñinaca. Jesusaqui ninaca čhјetinchičha. ¹⁵Pero timplu jilirinacami lii tјaajiñi maestrunacami jalla nii čhјetiñi milajru cheržcu, žawjchichičha. Nižaza ocјalanacaqui timpluquin Jesusižquiz tuž wiwchichičha: “iDavid cjita chawc jilirž majchmajtquiztan tјonñi! iRispittaj cјila!” Jalla nuž nonžcu timplu jilirinacami lii maestrunacami ancha žawjchichičha Jesusiž quintrа. ¹⁶Nekztan Jesusižquiz palјaychichičha, tuž cjican:

—¿Tinacž chiita taku ana nonžjo?

Jesusaqui ninacžquiz kjaazičha, tuž cjican:

—Nonznučha. Nižaza nii puntu Yooz takuqui tuž cјičha:

“Ocјalanacami piz itzñi wawanacami weјttajapa honora

zumpachaž tjaaquicha. Jalla nuž paaquicha Yoozqui”.

¿Jalla nii cjiŕta Yooz taku liichinčuckaya; ana jaa?

¹⁷ Jalla nekztanaqui ninacžquiztan ojkchiča. Betania watja ojkchiča. Jalla nicju alujassiča.

ANA FRUTCHIZ MUNTI

¹⁸ Jakatažuqui wenzlaka Jerusalén watja quejpcan čheri eescatchiča.

¹⁹ Jicz latuquiz higo munti cherchiča. Jalla nii muntiquin macjatchiča, fruta apakžcu lujlžapa. Pero fruta ana wajtchiča, čhañchiz alajatača. Jalla nižtiquiztan Jesusaqui nii muntiquiz cjichiča:

—Jazic anam iya fruta pookñi cjequicha.

Jalla nii orapacha nii muntiqui kjonchiča. ²⁰ Jalla nižta munti kjonñi cheržcu, tjaajinta žoñinacaqui ispantichiča, nižaza Jesusižquiz pewcziča, tuž cjican:

—¿Kjažtiquiztan nii higo munti ratulla kjonja?

²¹ Jesusaqui tuž kjaaziča:

—Weraral ančhucaquiz cjiwča. Ančhucqui Yoozquin tjapa kuztančhucčhalaj niiqui, nižaza ana payznakñi kuzzizčhucčhalaj niiqui, tii irata zakaz paasača. Nižaza juc'ant pajk milajru paasača. Tii curumi mantasača, tuž cjican: “Tekžtan oka. Pajk kotquin tjojsna”. Jalla nuž mantižcu nižta zakaz okasača. ²² Nižaza ančhucqui čhjulumi tjapa kuztan Yoozquiztan mayačhaja, jalla niit jama ančhucaquiz tjaataž cjequicha.

¿JEC JESUSIŽQUIZ MANTICHI?

²³ Jerusalén irantižcu Jesusaqui wilta timpluquin luzziča. Jalla nicju tjaajnan, timplu jilirinacami wajtchiz

jilirinacami niižquiz macjatžquichiča. Nekztan pewcziča, tuž cjican:

—¿Jec am mantichi tii paazjapajo?

¿Jec jilirit am utchi jilirižtakaz cjisjapajo?

²⁴ Jesusaqui ninacžquiz tuž kjaaziča:

—Wejrzal ančhucaquiz tsjii pewcznača. Ančhucqui wejtquiz kjaaznaquič niiqui, wejrzakal ančhucaquiz maznača, jec wejr mantichi, nii. ²⁵ Wejtquiz kjaaznalla. ¿Ject Juan mantižquichi bautisjapaya? ¿Yoozkaya, žoñinaca, ja'?

Jalla nekztanaqui ninacpora parlatča, tuž cjican:

—¿Jaknužum cjeequi? Učhumž “Yoozqui Juan mantichiča” cjicanž kjaaznaquič niiqui, jalla tiicni učumnacaquiz kjaaznačhan, cjican: “Nižtiquiztan čkjažtiquiztanž ančhucqui ana nii criichinčhucta?” ²⁶ Nižaza učhumž “Žoñiqui Juan mantichiča” cjicanž kjaaznaquič niiqui, žoñinacaqui učumnacaquiz čkjaž cjiqejajo? —Jalla nuž parlatča. Žoñinacaqui Juanž puntu cjiñiča, Yooz parti parliñi profetača niiqui. Jalla nižtiquiztan ninacaqui žoñinaca eksiča, “Učhum conačhani”, cjican.

²⁷ Jalla nuž parližcu ninacaqui Jesusižquiz cjichiča:

—Ana zizuča wejrnacqui.

Jalla nižta kjaaztiquiztan Jesusaqui cjichiča:

—Wejrmi ana zakal ančhucaquiz maznača, jec wejr mantichi tii paazjapa.

PUCULTAN MAJCHWICH QUINTU

²⁸ Wiruñaquei Jesusaqui tsjii puntu chiichiča, tuž cjican:

—Tii puntu tantiya. Tsjii žoñiqui pucultan majchwichtača. Tsjižquiz cjichiča: “Wejt maati, tonjiqui uwas

frut ajzn̄i oka”. ²⁹Nii mantita maatiq̄ui tuž kjaaziċha: “Anaċha”. Jalla niiz wiruñalla niiz kuz campiichiċha. Nekztan uwas frut langzn̄i ojkc̄hiċha. ³⁰Nižaza nii ejp̄qui tsjii maati cheri ojkc̄hiċha. Nižtan zalzcu, nižtazakaz uwas frut ajzn̄i mantichiċha. Jalla niiqui kjaaziċha, tuž cjican: “Tata, okasaċha”. Ultimquiziqui nuž cjiscuqui ana ojkc̄hiċha. ³¹Nii pucultanquiztan ċjakzilta maati niiz ejpž mantitacama paachiya?

Ninacaqui kjaaziċha tuž cjican:

—Primiru mantitaž, jalla niċha.

Jalla nekztanaqui Jesusaqui cjichiċha:

—Weraral anċhucaquiz cjiwċha.

Impuesto cobriñinacami, nižaza ujchiz maatakanacami arajpach Yooz wajtquiz anċhucž tuqui luzaquiċha.

³²Juan Bautistaqui tjaajñi tjonchiċha, jaknužt anċhucalaqui kamžtažlaja, jalla nii tjaajinchiċha. Pero anċhucqui niiz tjaajinta ana criichinċhucċha. Impuesto cobriñinacazti nižaza ujchiz maatakanacazti niiz tjaajinta criichiċha. Jalla nii cherchinċhucċha anċhucqui. Jalla nižtanaca cheržcumi, anċhucqui ana Yoozquin cjisjapa kuz campiichinċhucċha. Anċhucċha niiz taku ana criichinċhucqui.

ANA WAL PIYUNANACŽ QUINTU

³³Jalla tii quinto zakaz nonžna. Tsjii yokchiz patrunaqui uwas zkala ċhjacc̄hiċha. Nekztan uwas zkala muytata pirka pirkichiċha. Nižaza tsjii maz ojt paachiċha, uwas kjaz spjiŋtjapa. Nižaza tsjii campanturiž cherchi kjuychiċha, nii zkala itzjapa.

‘Nekztan nii patrunaqui zkala yoka alquilchiċha piyunanacžquiz. Nekztan jicz ojkc̄hiċha. ³⁴Zkala ajz timpu irantižcan, patrunaqui tsjii kjaž piyuna cuhanžquichiċha, niiz

parti zkala ricujajo. ³⁵Pero nii zkala alquilñi žoñinacazti nii cuhanžquita piyunanaca tanchiċha. Tsjiiqui kitžtaċha. Tsjiiqui contaċha. Tsjiiqui maztan ċhajetaċha. ³⁶Nekztanaqui patrunaqui wila piyunanaca cuhanžquichiċha, primirquiztan juc'anti. Pero nii zkala alquilñi žoñinacazti nižtapacha ana wali paachizakazza. ³⁷Ultimquiziqui patrunaqui niiz persun majch cuhanžquichiċha, tuž tantiican: “Wejt ultim maatiq̄ui rispitzinaa” cjican. ³⁸Niiz majch cheržcu, nii alquilñi žoñinacaqui ninacpora palt'ichiċha, tuž cjican: “Jalla tiikat liwŋ tii irinsa tanznaċhani. Jalla nižtiquiztan ž-conla, uċhumnacaltajapa tii yok irinsa cjeŋajo”. ³⁹Jalla nekztanaqui nii žoñinacaqui majch tanchiċha; nekztan yokquiztan jwescu conchiċha.

⁴⁰Jalla nekztanaqui Jesusaqui pewcziċha, tuž cjican:

—Jalla nii patrūnpacha tjonžcu, ċċhjulukat nii alquilñi žoñinacžtajapa paaċhani?

⁴¹Žoñinacaqui kjaaziċha tuž cjican:

—Nii ana wal žoñinacaqui contaž cjequichiċha, ana importayžcu. Nekztan nii zkala yoka yekja piyunanacžquiz alquilaquiċha, zkala ajz timpu niiz parti zkala ricujžcu niizquiz tjaata cjisjapa.

⁴²Nekztan Jesusaqui ninacžquiz cjichiċha:

—Yooz takuqui tuž cjiċha:

“Kjuy pirkĩñinacaqui tsjii maz tjojtchiċha. Nii tjoŋta mazqui isquinquiz cjissiċha. Juc'ant chekan mazqui cjissiċha.

Yoozqui nuž utchiċha. Uċhumqui jalla nii cheržcu ispanitichiċha”.

Jalla nuž cjiċha cjiŋrta Yooz takuqui. Anċhucqui nii Yooz taku liichinċhucċha, ċana jaa?

⁴³ Ančhucaquiz chiižinuča, ančhucqui nii ana wal alquilni žoñinacažtakazza. Jalla nižtiquiztan ančhucqui Yooz kjuychiz famillquiztan chjatkataž cjequiča. Yekja žoñinacaqui Yooz famillquiz luzaquiča. Yooz kuzcama kamni žoñinacaqui luzaquiča.

⁴⁴ Nonžna. Maz puntuquiztan zakal chiyuča. Jakziltat nii maz cjen ujquiz tjojsnačhaja, jalla niiqui pirasužtakaz t'okuntaž cjequiča. Nižaza jakziltiž juntuñ nii mazqui tjojsnaquiz niiqui, pulpužtakaz t'okuntaž cjequiča. Nii žoñinacaqui k'ala akžtaž cjequiča.

⁴⁵ Jalla nii Jesusiž chiita takunaca nonžcu, timplu jilirinacami, fariseo parti jilirinacami tantiichiča, ninacž puntu chiiñi, nii. ⁴⁶ Jalla nuž tantiizcu, Jesusa tanz pecatča. Pero ana atchiča, parti žoñinaca ekskui. Parti žoñinacaqui Jesusiž puntu tantiyatča, Yooz taku parliñi profetača, nii.

YOOZ KJUYCHIZ FAMILIA

22 ¹ Jalla nekztanaqui Jesusaqui wilta tjaajinchizakazza. Jalla tuž cjican quint'ichiča:

² —Araj pach Yooz kjuychiz familiaqui jalla tužuča. Tsji chawjc jiliriqui niiz majchajapa zalz pijsta paachiča. ³ Niiz piyunanaca cuchanchiča, invitta žoñinaca kjawzñi. Nii kjawža žoñinacaqui ana tjonz pecchiča. ⁴ Nekztanaqui yekja piyunanaca cuchanchizakazza, tuž cjican: “Invitta žoñinacžquin mazca, ‘Chjeri lujlž tjacztača. Wejt wacanaca conkatchinča, nižaza cjew animalanacami. Tjappacha listuča, jaziqui pijstiquin tjonla’ ”. ⁵ Jalla nuž chiyamani nii invitta žoñinacaqui ana cazquichiča. Tsjiiqui zkal yoka ojkchiča. Tsjiiqui tuyžtan ojkchiča.

⁶ Parti invitta žoñinacaqui kjawzñi cuchanta piyunanaca tanzicha.

Nekztan kitchiča, conañcama.

⁷ Jalla nekztanaqui nii chawc jiliriqui ninacž quintra žawjziča. Nekztan zultatunaca cuchanžquichiča, nii piyuna conñinaca conžcajo. Nižaza, ninacž watja ujžcajo. ⁸ Jalla niža paažcu chawc jiliriqui piyunanacžquiz cjichiča: “Tjappacha zalz pijstac listuča. Nii primir invitta žoñinacaqui ana tjonz waquiziča. ⁹ Jalla nižtiquiztan ančhucqui pajk calliranž ojklajža. Jecnacžtanami zalačhaja, jalla ninacžquiz tjonajum cjequiča tii zalz pijstiquin”. ¹⁰ Jalla nekztanaqui piyunanacaqui call kjutni ulanchiča, nižaza tjapa niiz zaltanaca kjuyquiz ajcskatžquichiča, zuma žoñimi, ana zuma žoñimi. Jalla nekztanaqui pijsta paaz kjuyaqui chijipsi cjissiča.

¹¹ “Jalla nekztanaqui chawjc jiliriqui luzquichiča invitta žoñinaca cherzñi. Tsji željñi žoñi naychiča, ana pijsta paaz zquiti cutchi želatča. ¹² Jalla nuž nayžcu nii chawjc jiliriqui niizquin paljaychiča tuž cjican: “Jila, žkjažtiquiztan amqui ana pijsta paaz zquiti cujtchi luzquichamtajo?” Nii žoñiqui ch'uj quirchiča.

¹³ Nekztanaqui chawjc jiliriqui pijsta atintiñi žoñinacžquiz mantichiča, tuž cjican: “Kjojchanacami kjaranacami čhejlžina. Zawnc zumchiquiz tjojta, jalla nicju kaala, nižaza niiz izke kjojla”.

¹⁴ Jesusaqui cjichizakazza:

—Kjawža žoñinacaqui tamača.

Illzta žoñinacaqui kolucullača.

IMPUESTO PACZ PUNTU

¹⁵ Jalla nekztanaqui fariseo žoñinacaqui ojkchiča. Ninacaqui acuerduquiz kazziča, Jesusiž quintra tsji uychiz cjiskatzjapa. Jaknužumi Jesusa tsji ana wali chiikataquiča; jalla nii uychiz cjiskatz pecatča.

¹⁶ Jalla nekztan ninacž partiquiztan yekjap žoñinaca cuchanžquichiča, Herodes parti žoñinacžtanpacha. Jalla nii cuchanta žoñinacaqui Jesusižquiz cjichiča:

—Maestro, wejrnac zizuča, amqui werarapan chiča, nižaza Yooz kamañ puntuquiztan weraram tjaajiñamča, kjažtami žoñiqui chiičhani, nižaza kjaža žoñimi želačhani. ¹⁷ Jaziqui amqui tii tantižinalla. ¿Roman chawc jiliržquin impuesto pacz wali cjesaya? uż čanaž wali cjesaj? Jalla nii ziz pecuča.

¹⁸ Pero Jesusaqui ninacž ana zuma pinsita intinzuna zizziča. Jalla nižtiquiztan ninacžquiz kjaaziča tuž cjican:

—Ana zum kuzziznaca, čkjažtiquiztan ančhucqui wejt quintra uj jwes pecjo? ¹⁹ Impuesto pacz paaz tjeezna.

Jalla nekztan tsjii denario cjita paaz zjičchiča. ²⁰ Jalla nii paaz cheržcu, Jesusaqui ninacžquiz pewcziča, tuž cjican:

—Tii paazquiz čjecž yujctaya? Nižaza tii cjiirta tjuu, čjecž tjuutaya?

²¹ Nii quintranacaqui kjaaziča, tuž cjican:

—Roman chawc jiliržtača.

Jesusaqui nekztan cjichiča:

—Roman chawc jiliržtaqui jalla nii jiliržquin tjaasa. Nižaza čhjulut Yooztaqui Yoozquinpan tjaasa.

²² Jalla nuž nonžcu, nii quintranacaqui ispančiči. Nekztan Jesusižquiztan zarakžcu ojčkichiča.

JACATATZ PUNTU

²³ Jalla nii noojpacha yekjap saduceo parti žoñinacaqui Jesusa cheri ojčkichiča. Saduceo parti žoñinacaqui ana criiñitača, ticziquiztan jacatatz, nii. Jalla nuž cjenami Jesusižquiz

pewcziča. Tii quintu quint'ican, pewcziča, tuž cjican:

²⁴ —Maestro, Moisesaqui učumnacalca cjiirtkalča, tuž cjican: “Tsji žoñi ticznasaž niiqui, niž tjun ana ocjalchiz cjesaž niiqui, nekztan nii ticzi žoñž jilaqui naa žewatan zalz waquiziča, nii ticzi jilž cuntiquiztan ocjala paazjapa”.

²⁵ Jaziqui wejrnacporquiz pakallak jilazullca želatča. Jilir jilaqui zalsiča. Nekztan ticziča ana ocjalchiz. Jalla nekztan jilirž jar jilaqui naa žewatan zalsizakazza. ²⁶ Nii jilaqui ticzizakazza ana zinta ocjala ecžcu. Nekztan yekja taypir jilžtan nižtazakaz watchiča. Nižaza tjappach nii pakallak jilazullquižquiz nižta watchiča.

²⁷ Tjapa nii pakallak jilazullcaž ticztan, naa žewqui ticzinzakazza. ²⁸ Jaziqui ticziquiztan jacatatzcu, naa žewqui čjakziltiž tjun cjequejo? Tjappacha naatancama zalzitača.

²⁹ Jesusaqui ninacžquiz tuž kjaaziča:

—Ančhucqui tsjii kjutñi

kiwkchinčhucča. Ančhucqui Yooz takumi ana zuma zizza. Nižaza Yooz azimi ana pajča. ³⁰ Ticzi žoñinacaž jacatattanaqui zalzqui ana želaquiča. Žoñinacami žoñž maatinacami ana zalznaquiča. Nii timpuquiz žoñinacaqui arajpach Yooz anjilanacažtakaz cjequiča. ³¹ Pero nii ticziquiztan jacatatz puntu, ¿Yooz tawkquiz ana tuž liichinčhucjo? Tii puntuquiztan Yoozpachaž čhiichiqui. Jalla tuž cjican Yoozqui cjichiča:

³² “Wejrqui Abrahamž Yoozza, nižaza Isaacž Yoozza, nižaza Jacobž Yoozza”. Anača ticzi žoñž Yoozqui. Antiz žejtñi žoñž Yoozza.

³³ Jalla nuž čhiita nonžcu, nekž žejlñi žoñinacaqui Jesusiž čhiitiquiztan ispančiči.

JUC'ANT CHEKAN MANTITAQUI

³⁴Jalla nuž chiižcu Jesusaqui saduceo parti žoñinaca ch'uju paachiča. Jalla nuž ch'uj paatiquiztan fariseo parti žoñinacaqui wilta ajcziča. ³⁵Tsjii lii maestruqui nižaza fariseo partinacžquiztan uj jwesjapa yanz pecatča. Jesusižquiz pewcziča, tuž cjican:

³⁶—Maestro, učhum liiquiztanaqui ěchjul mantitat juc'ant chekanaaya?

³⁷Nekztan Jesusaqui kjaaziča, tuž cjican:

—Tii mantitača juc'ant chekanaqui. “Ančhuca Yooz Ej Jiliržquiz sirwa, tjapa kuztanami, tjapa animužtanami, tjapa pinsamintužtanami”. ³⁸Parti mantitanacquiztan cjenaqui jalla niiča chekanaqui. ³⁹Niž jaru tii mantitaqui žejlča. “Jaknužum persunpachquiz okzñamžlaja, jalla nižta okzñi kuzziz cjistanča žoñinacžquizimi, liijitum mazižtakaz”. ⁴⁰Jalla nii pizc mantitanacača chekanaqui. Nižaza tjapa Moisés tjaata liimi, nižaza tjapa profetanacaž tjaajintanacami nii pizc mantitanacž partiquiztan chiiča.

CRISTUŽ PUNTU

⁴¹Fariseo žoñinacaž ajczi želan, Jesusaqui ninacžquiz pewcziča tuž cjican:

—Ančhucqui Cristumž puntuquiztan tantiya. ěCristuqui jecž majch niiqui?

⁴²Nekztanaqui ninacaqui Jesusižquiz kjaaziča, tuž cjican:

—Davidž majchmajtquiztan tjonñiča niiqui.

⁴³Jalla nuž kjaaztiquiztan Jesusaqui ninacžquiz cjichiča:

—David jiliriqui Cristuž puntuquiztan chiican, “Chawc Jiliri” cjichiča. Jalla nuž chiižcu, Yooz Espíritu Santuž chiikatchiqui.

⁴⁴Davidadž cjižrta Yooz takuqui tuž cjicha:

“Yooz Jiliriqui wejt chawjc Jiliržquiz cjichiča: ‘Wejrqui am kjojch koztan am quintri žoñinaca tjeczkatača. Nii oracama wejt žew latuquiz julzna’.”

⁴⁵Jaziqui Davidaqui “chawjc Jiliri” cjichiča Cristuž puntuquiztan. Jalla nižtiquiztan ějaknužt nii chawjc Jiliri Davidž majchqui cjesajo? —Jalla nuž pewcziča Jesusaqui.

⁴⁶Anaž jecmi kjaazñi atchiča, ana zinta takumi. Jalla nužquiztanpacha ana ěhjulumi pewcžni atchizakazza iya. Jalla nii orquiztanpacha pecunz eksipanča nii quintr žoñinacaqui.

ANA ZUM TJAAJININACŽ PUNTU

23 ¹Jalla nekztanaqui Jesusaqui nekž žejlñi žoñinacžquizimi niž tjaajinta žoñinacžquizimi tuž cjichiča:

²—Lii tjaajiñi maestruncami nižaza fariseo žoñinacami persun puntuquiztan tuž tantiiča, tjaajinz puestuquiz uchtača Moisés liiquiztan punta punta tjaajinzjapa, nii. Jalla nuž tantiiča persun amtiqiziqui. ³Ančhucqui ninacaž tjaajintacama oka. Nižaza ninacaž chiitacama paa. Pero ninacž kamz jaru, ana kama. Ninacaqui tjaajinča, pero persun tjaajinta jaru ana ojčča, ana cumpliča. ⁴Ninacaqui walja mantitanaca paača, walja kuzižtakaz žoñinacžquiz jepča. Tjapa ninacž mantitanacaqui anapan atchucača. Jalla nuž cjenami tjapa mantitanaca žoñinacžquiziqui tirapanž ijsijča. Pero ninacapacha anaž ěhjulquizimi yanapča nii cumplisjapa. ⁵Ninacaqui ěhjul paatami paača, žoñinacakaz cherajo. Yujc ayquizimi kjarquizimi

cijirta Yooz taku jweranchiž ojklajča, nižaza parti žoñinacžquiztan juc'anti lajch chjajlchiz zquiti cujtchiž ojklajča. Jalla nižtaž ojklajž jutztaza.

⁶Pijistiquiz cjen tucquin panž julz pecča. Nižaza ajcz kjuyquiz cjen tucquin panž julz pecča honorchiz cjisjapa. ⁷Ninacaqui žoñinacž taypiquiz cjen rispitztan tsaanta cjis pecča, nižaza “Maestro” cjita cjis pecča.

⁸Ančhucqui anača žoñinacžquiz “maestro” cjita cjis peczqui. Tjapa ančhucqui jilazullquičhucča. Tsji Maestruchizčuckazza. Cristučha nii Maestruqui. ⁹Nižaza ančhucqui tii muntuquiz kamcan anaž jeczquizimi “ejp” cjican chiiz waquizičha. Tsji Ejpchizčuckazza. Arajpach Yooz Ejpča niiqui. ¹⁰Nižaza ančhucqui anača žoñinacžquiz “jiliri” cjita cjis peczqui. Tsji jilrchizčhucča. Cristučha niiqui. ¹¹Ančhucquiztan jequit jilirižtakaz cjis pecčhaja, jalla niiqui piyunažtakaz cjis waquizičha parti žoñinacžquiziqui. ¹²Jequit persun honora waytiz pecčhaja, ultimquiziqui ana honorchiz cjequičha. Nižaza jequit humilde kuzzizlaja, jalla niiqui ultimquiziqui honorchiz cjequičha.

¹³Lii tjaajiñi maestrunaca, nižaza fariseo parti žoñinaca, ana zuma kuzziz žoñinacčhucča. Ančhucqui anawalipanž cjisnaquičha. Žoñinaca atajiñchucča, arajpach Yooz wajtchiz ana luzajo. Ančhucpachaž ana luzza, nižaza pecchi cjenami parti žoñinacžquizimi ana luzkatiñchucča.

¹⁴Lii tjaajiñi maestrunaca, nižaza fariseo žoñinaca, ana zuma kuzziz žoñinacčhucča. Ančhucqui anawalipanž cjisnaquičha. Žew maatakanacžquiztan kjuy cusasanaca kjañiñchucča. Jalla nuž paažcumi nii maataka incallzjapa ažka ažka Yoozquin maytažoka payiñchucča

ninacžtajapažtakaz. Jalla nuž paatiquiztan ančhucqui juc'anti castictaž cjequičha.

¹⁵Lii tjaajiñi maestrunaca, fariseo žoñinaca, ana zum kuzziz žoñinacčhucča. Jaziqui ančhucqui anawalipanž cjisnaquičha. Ančhucqui jaknužumi ančhuca cuzturumpi jaru žoñinaca ojkkatzkaz pecča. Jalla nuž ojkkatžcuqui ančhucqui nii žoñinaca ančhucaquiztan pizc wilta wilta juc'anti anawaliz cjisatčha, infiernuquin casticta cjisjapa.

¹⁶Ančhucqui anawalipanž cjisnaquičha, zur žoñižtakaz irpiñinaca. Ančhucqui cjiñchucča: “Jakziltat timplu tistiwcchiz juramintu paaquiz niiqui, jalla nii juramintuqui anaž walčha. Pero jakziltat timplu kor paaz tistiwcchiz juramintu paaquiz niiqui, jalla nii juramintuqui walčha”.

¹⁷Zumzu zur žoñinaca. ¿Jakziltat juc'ant chekanaqui, timpluquin žejlñi korinacakaya, už timplupanej? Timpluž cjen nii korinacaqui walčha. ¹⁸Nižaza ančhucqui cjiñchuczakazza: “Jakziltat timplu altar tistiwcchiz juramintu paaquiz niiqui, jalla nii juramintuqui anaž walčha. Pero jakziltat altarquin uchta ofrenda tistiwcchiz juramintu paaquiz niiqui jalla nii juramintuqui walčha”. ¹⁹Zumzu zur žoñinaca. ¿Jakziltat juc'ant chekanaqui, ofrendakaya, už altarapanej? Altaraž cjen nii ofrendaqui walčha. ²⁰Jakziltat altar tistiwcchiz juramintu paaquiz niiqui, nižaza tjapa nii altaruntuñ žejlñinaca tistiwcchiz juramintu paača. ²¹Nižaza jakziltat timplu tistiwcchiz juramintu paaquiz niiqui, nižaza timpluž Yooz tistiwcchiz juramintu paača. ²²Nižaza jakziltat arajpach tistiwcchiz juramintu paaquiz niiqui, nižaza arajpach Yooz tistiwcchiz juramintu paača.

Yoozqui arajpachquin žejlča, nižaza arajpachquiztan mantiča.

²³‘Lii tjaajiñi maestrunaca, nižaza fariseo žoñinaca, ana zum kuzziz žoñinacčhucča. Ančhucqui anawalipanž cjisnaquiča. Ančhucqui diezmos tjaayiñchucča mentquiztan, anizquiztan, cominquiztan. Jalla nii kolta plantanacquiztan ančhucqui diezmos tjaayiñchucča. Pero ančhucqui liž chekan mantitanac jaru ana kamiñchucča. Yooz kuz jaru ana kamiñchucča, nižaza ana okzñi kuzzizčhucča; nižaza ana Yoozquin kuzzizčhucča. Jalla nižta chekan lii jaru ana kamiñchucča. Jalla nižta jaru kamz waquiziča, diezmos tjaacanami. ²⁴Ančhucqui zur irpiñinaca. Tižta irata paayiñchucča. Tsji žoñiqui kolta zmoyalla culchiča ana lulzjapa. Jalla nuž cjenami pajk ana wali animala ana culčcu lulchiča. Jalla nižta irata paayiñchucča.

²⁵‘Liy tjaajiñi maestrunaca, nižaza fariseo žoñinaca, ana zum kuzziz žoñinacčhucča. Anawalipanž cjisnaquiča ančhucqui. Wazumi chuwami zawnctanaqui ajuntaž cjesača. Jalla nuž cjenami kjuyltan cjujchiž cjesača. Jalla nižtaž ančhucqui. Zawncta curpuqui walikaz chercherča. Ančuca kuzquizzti cjujchinacažtakaz žejlča. Tjañi zaazmi anawali paazmi jalla nižta kuzzizčhucča ančhucqui. ²⁶Zur fariseo žoñinaca, primiruqui zuma kuzziz cjisna ajunta chuwažtakaz; nekztanaqui zuma žoñiž tsijtchizakaz cjequiča.

²⁷‘Lii tjaajiñi maestrunaca, nižaza fariseo žoñinaca, ana zum kuzziz žoñinacčhucča. Anawalipanž cjisnaquiča ančhucqui. Chiw ljocžtan tjarta sipulturužtakazza ančhucqui. Ančuca tsitiqui walikazza. Ančuca

kuzzti ana walipanča. Sipultura ticzi žoñinacž tsjijnacžtan chjijsi, nižta ana waliča. ²⁸Jalla nižtaž ančhucqui. Žoñinacaqui ančhuc zuma žoñižtakaz nayča. Pero ančuca persun kuzquizzti juc‘ant anawalinaca žejlča.

²⁹‘Lii tjaajiñi maestrunaca, nižaza fariseo žoñinaca, ana zum žoñinacčhucča. Anawalipanž cjisnaquiča. Ančhucqui profetanacž sipulturunaca azquichiñchucča, nižaza Yooz kuzcama kamñita žoñinacž monumentunaca c‘achjalla cjiskatiñchucča. ³⁰Nižaza nii zuma žoñinacž puntuquiztan tuž cjiñchucča: “Učhum tuquita atchi ejpnacaqui anawali kamchiča. Wejrnacqui nii tuqui timpuquiz kamtasaz niiqui, anaž profetanaca conzjapa yanaptasača”. ³¹Jalla nuž chiican, ančhucpacha chiča, profeta conñi žoñinacž majchmaatičhucča, nii. ³²Jaknužt ančuca tuquita atchi ejpnacaqui anawali paatčhaja, jalla nižtakaz payiñchucča.

³³‘Zkoražtakaz žoñinaca. Zkoražta sarchiz žoñinaca. Ančhucqui anapanž wira atipasača infiernuquin casticzquiztanaqui. Castictapanž cjequiča. ³⁴Ančhuc juc‘ant casticta cjisjapa, ančucaquiz cuchanžcača profetanaca, nižaza Yooz puntu zuma zizñinaca, nižaza Yooz puntu tjaajinñinaca. Jalla nii žoñinaca cuchanžquichiž cjen, ančhuczi tsjii yekjanaca conaquiča, yekjanaca cruzquiz ch‘awcznaquiča, yekjanaca ajcz kjuyquizpacha wajaquiča. Nižaza yekjanaca wajtquiztan watja tanzjapa apznaquiča. ³⁵Jalla nuž paatiquiztan ančuca ujnacquiztanami nižaza ančuca tuquita atchi ejpnacž ujnacquiztanami caztictaž cjequiča. Ančuca atchi ejpnacaqui zuma žoñi conchiča, Abelquiztanpacha

asta Berequías majch Zacarías, jalla niicama. Zacariasqui timpluquizpacha contatacha, altar žcati. ³⁶Ančucaquiz weraral cjiwcha. Tjapa nii uj paatanacquiztan casticta cjequiča tii timpluquiz kamñi žoñinacaqui.

JERUSALEN WAJTCHIZ ŽOÑINACŽ PUNTU

³⁷Nekztan Jesusaqui chiichiča, tuž cjican: Jerusalén wajtchiz žoñinaca, Jerusalén wajtchiz žoñinaca. Profetanaca coničhucča. Nižaza Yooz cuchanžquita profetanaca maztan čhaciñhucča. Kjaž wila wejrqui tii žoñinaca juntis pecchinča, cwitisjapa. Jaknužt wallpiquei kjar koztan ozmachanaca cwitičhaja, jalla niža irata tii žoñinaca cwitis pecchinča. Tii žoñinacazti wira ana nuž cwitiskatz pecchiča. ³⁸Tii taku nonžna. Ančuca kjuyanacaqui jaytitaž cjequiča. ³⁹Ančucaquiz cjiwča. Tsjii noojiquei ančhucqui wejt puntuquiztan chiyaquiča, tuž cjican: “Yooz Jilirž tjuuquiz tjonñi, amqui honorchiz cjila”. Jalla nii noojcama ančhucqui ana wejr wila cheraquiča.

JUDIO TIMPLU PUNTU

24 ¹Nekztanaqui Jesusaqui timpluquiztan ulanchiča. Nekztan niiž tjaajinta žoñinacaqui niižquin macjatžcu, tuž cjichiča:

—Cherzna. Ancha c'achjača tii timplu kjuyanacaqui.

²Jesaqui kjaaziča, tuž cjican:

—Tjapa tii timplu kjuyanaca zumpacha chernza. Ančucaquiz weraral cjiwča. Tsjii noojiquei tii kjuyanacaqui k'ala pajlaž cjequiča. Ana zinta tii maznaca pirkita želaquiča.

TII MUNTU TUCUZINZ PUNTU

³Nekztan ninacaqui Olivos cjita curullquin ojkičiča. Nicju Jesusaž

julzi želan, tjaajinta žoñinacaqui niižquiz jamazit tuž cjichiča:

—Maznalla. ¿Čhjulatorat nii amiž chiita wataqui? Nižaza am tjonz siñala, ¿jakziltat cjeequiya? Nižaza tii muntu tucuzinz siñala, ¿jakziltat cjeequiya?

⁴Nekztanaqui Jesusaqui kjaaziča tuž cjican:

—Ančhucž cwitaza, ana jecmi ančucaquiz incallskata. ⁵Muzpa žoñinacaqui wejt tjuužtan tjonaquiča, “Wejrtča Cristutqui” cjican. Jalla nuž chižcu tama žoñinaca incalltaž cjequiča. ⁶Nižaza ančhucqui quira žejlž quintunaca zizaquiča; nižaza yekja quira quintunaca arawasaquiča. Jalla nuž cjenami anaž tsuca. Nuž watstanča. Imaziča tii muntu tucuzinzqui. ⁷Nacionpora talznaquiča; nižaza quira paaquiča. Nižaza mach'a želaquiča, nižaza conanaca ojklayaquiča, nižaza walja yoka chekjincan terremotož wataquiča, wacchi yokaran. ⁸Tjapa tii wattanaqui juc'anti t'akjiziz želaquiča.

⁹Jalla nekztanaqui ančhucqui jilirinacžquiz intirjitaž cjequiča sufriskatzjapa. Nižaza contaž cjequiča ančhucqui. Nižaza ančucaž wejtquiz criichiž cjen, tjapa ana criichi žoñinacaqui ančuca quintraž cjequiča. ¹⁰Jalla nuž watan, muzpa Yoozquin criichi žoñinacaqui quejpsnaquiča. Yoozquin criichi žoñinacž quintra cjsnaquiča, jilirinacžquin intirjizcama. Criichi žoñinacžquiz ancha chjaawjkataquiča nii quejpsñinacaqui. ¹¹Muzpa toscara chiiñinaca ojklayaquiča, tuž cjican: “Yooziž tjaata takuča tiiqui”. Nii toscar takunacžtan muzpa žoñinacžquiz incallaquiča. ¹²Anawalinacaž miraquiča. Žoñinacpora ana zuma munasaquiča. ¹³Jakziltat wejt tjonzcama tjurt'iñi kuzziz

želačhaja, jalla niiqui ultimquiziqui liwriitaž cjequičha. ¹⁴Yooziž liwriita žoñinacača Yooz kjuychiz familiaqui. Jalla nii zuma taku tjapa kjutñi tii muntuquiz parlitaž cjequičha, tjapa žoñinaca zizajo. Jalla nii wattanaqui tii muntuqui tucuzinzaquičha.

¹⁵Tii zakal cjiwčha. Tii puntuquiztan Daniel cjita profetaqui cjiyrchičha: “Tsjii noojiqui tsjii juc'ant ana wali akñi žoñi parizaquičha. Yooz chekan kjuyquinkaz luzaquičha”. (Tii taku liiñiqui tintintaza.) ¹⁶Jalla nuž cheržcu Judea yokquin žejlñi žoñinacaqui curunacžquin atipz waquizičha. ¹⁷Nižaza nuž cheržcu kjuy juntun žejlñi žoñinacaqui chjujžcu ana kjuya luzla, cusasanaca chjitzjapa. ¹⁸Nižaza pampiquin žejlñi žoñinacaqui persun zquiti apti ana quejpžquila. ¹⁹Nii tjuñquiziqui ic maatakanacami k'azllu wawchiz maatakanacami ancha t'akjiri želaquičha. ²⁰Yoozquinčha mayiza ančhucqui, anaj zac timpuquin nižtanaca watsjapa, nižaza anaj jeejz tjuñquiz nižtanaca watsjapa. ²¹Tii sufris timpu juc'anti sufris cjequičha yekja sufrisnacquiztanami. Yooz tii muntu paatiquiztan jecchuc anapančha tižta sufrisnacaqui watchiqui. Nižaza tekžtan najwcchuc anaž iya juc'anti sufrisqui cjequičha. ²²Yoozqui anaž tii sufrisnaca tucuskatasaz niiqui, tjapa žejlñi žoñinacaqui ticznasača. Yoozqui niž illža žoñinacž laycu nii sufrisnaca tucuskataquičha.

²³Nižaza yekjap žoñinacaqui ančhucaquiz chiyasača, tuž cjican: “Tekzičha Cristuqui”. Yekjapac chiyasača, “Nii nacjučha Cristuqui” cjican. Jalla nuž chyanami anapančha nii taku criyaquičha ančhucqui.

²⁴Incallñi žoñinacaž tjonaquičha. Yekjapaqui “Cristutčha wejrqui” cjequičha. Yekjapaqui “Yooziž tjaata

taku mazniñtčha wejrqui” cjequičha. Ninacaqui walja ispantichuca milajrunacaž paaquičha, incallzjapa. Tjapa žoñinacaž incallz pecaquičha, asta Yooziž illža žoñinacami. ²⁵Ima tižtanacaž tjonan wejrqui ančhucaquiz ultim weraral maznučha, ana incallta cjisjapa. ²⁶Žoñinacaqui “Ch'ekti yokquin cheržquilalla, nicjučha Cristuqui” cjequičha. Jalla nii quinto nonžcu, anapanž okaquičha. Nižaza “Tii kjuyquizza Cristuqui” cjequičha. Jalla nii quinto nonžcu, anapan criyaquičha.

JESUCRISTUQUI WILTA TJONAQUIČHA

²⁷Ančhucaquiz cjiwčha. Jalla tižtal irata tjonača wejrqui. Wejrqui tsewtan cuchanžquita Yooz Žoñtčha. Jaknužt lliwjlliwni tuwantan tajachuc lliwjčhaja, jalla nuž tjonača. ²⁸Jakziquin zerwi žejlčhaja, jalla nekzi zkaranacaž ajcznaquičha.

²⁹Nekztanaqui tii sufris timpu wattan, tjuñiqui zumaquičha; kataquičha, ana iya kjanaquičha. Jiizmi nižazakaz ana iya kjanaquičha. Warawaranacami pachquiztan tjojtsnaquičha. Nižaza tseecu azziz žejlñinacaqui chjekinskattaž cjequičha. ³⁰Jalla nekztanaqui arajpachquin wejt siñalaqui parisaquičha. Wejrqui tsewtan cuchanžquita Yooz Žoñtčha. Jalla nuž wejt siñala cheržcu tjapa ana criichi žoñinacaqui kaaquičha. Ninacaqui wejt tjonz cheraquičha. Wejrqui tsjir taypizquiz tjonača walja aztan, nižaza Yooz Epiž aziž tjeežcan. ³¹Nižaza wejt anjilanaca cuchanžcača weriž illža žoñinaca juntjapzjapa, trompeta tjawžcu. Illztanacaqui tjapa tii muntuquiztanpacha juntaptaž cjequičha.

³²Ančhucqui higuera munti puntuquiztan zizza, jalla tuž.

Higuera muntiqui ch'ojñantiz kallantaquiči nīquī, waj kutunz timpuž kallantaquiči. Jalla nii zizza ančhucqui. ³³Jalla nižta irataž tjapa weriž chiita wattan, tii muntuqui waj tucuzinznaquiči. Jalla nuž ančhucaquiz zizkatz pecuča. Jaknužt tsjii žoñiqui kjuy zana žcatžinčhaja, luzjapa, jalla nižta irataž žcatžinčiči tii muntu tucuzinzqui. ³⁴Ančhucaquiz weraral cjiwčha. Ima tii timpuquiz kamñi žoñinacaž ticznā, tjapa weriž chiitanaca wataquiči. ³⁵Arajpachami tii yok muntumi liwj tucuzaquiči. Wejt takunacazti wiraž ana tucuzaquiči.

³⁶'Pero wejt tjonz tjuñimi, wejt tjonz orami anaž jecmi zizasachā, anaž arajpach Yooz anjilanacami, anaž Yooz Majchmi. Yooz Ejp alajakaz zizza.

³⁷'Jaknužt Noež timpu watčhaja, jalla nuž wataquiči wejt tjonz tjuñquiziqui. ³⁸Noež timpuquiz ima tii muntu kjaztan tuzkatta cjen, žoñinacaqui tuž kamñitačha, lujlcan, liccan, zalzcan, zalzjapa majtnaca tjaacan. Jalla nuž kamñitačha Noež warcuquiz luz tjuñicama. ³⁹Kjaz juyzu tjonzcama žoñinacaqui ana čjul tantiyassi žejlchičha. Nekztan kjaz tjontiquiztan tjappacha žoñinacaqui kjazquiz kuzta ticzičha. Jalla nižta irataž wataquiči wejt tjonž tjuñquiziqui. ⁴⁰Jalla nii noojiqui pucultān žoñiqui pampiquin cječhani. Tsjiiqui arajpach kjutñi waytižcu chjitžtaž cjequiči. Tsjiiqui ectaž cjequiči. ⁴¹Nižazakaz pucultān maatakanacaqui jawuncan želačhani. Tsjaaquī arajpach kjutñi waytižcu chjitžtaž cjequiči. Tsjaaquī ectaž cjequiči.

⁴²'Jalla nižtiquiztan ančhucqui walja naynay želaquiči. Čhjulator wejr, am Yooz Jiliri, tjonačhaja, jalla nii ora

ana zizzuca. ⁴³Ančhucqui tii zizza. Kjuychiz žoñiqui tjañi tjonz ora ziztasāž niiqui, walja naynay žejltasachā, niiz kjuya ana tjañiž luzta cjisjapa. ⁴⁴Jalla nižta irataž ančhuqui naynay želaquiči. Tiripintit, ana pinsita orquiz tjonačha. Wejrqui tsewtan cuchanžquita Yooz Žoñičha.

PIZC PUNTA PIYUNANACA

⁴⁵Tsjii kjuychiz žoñiqui piyunacžquiz kjuya tjiisichā, cwtisjapa, nižaza lujlz ora čjjeri tjaazjapa. ¿Jakzilta piyunat zuma cumpliñi, nižaza zuma cwtiñiya? Nii tantiya. ⁴⁶Jalla tižtaž piyunanacaqui. Kjuychiz žoñiž irantižcan tsjii piyunaqui cwtican žejlchičha, jaknužt cumpjiitažlaja, jalla nuž cumplican žejlchičha. Jalla niichā zuma piyunaqui. Nižaza nii piyunaqui cuntintuž cjequiči. ⁴⁷Ančhucaquiz weraral cjiwčha. Nii kjuychiz žoñiqui tjapa niiz cusasanaca cumpjiyaquiči nii zuma piyunž kjarquiz. ⁴⁸Nii kjuy cumpjiita piyunaqui ana zuma cječhaj niiqui, pinsasachā jalla tuž: "Aaaa, wejt patrunaqui ana uri tjonasaka", cjian cjequiči. ⁴⁹Jalla nekztan parti piyunanacžquiz wjajtasachā. Nižaza ana zum žoñinacžtan cumpant'asachā, lujlcanami liccanami. ⁵⁰Jalla nuž kaman, nii kjuychiz patrunaqui tiripintitž tjonaquiči, tsjii ana zizta orquiz. ⁵¹Jalla nekztanaqui nii ana zum piyunaqui zuma castictaž cjequiči. Nižaza nii ana zuma piyunaqui chjatkatatž cjequiči. Nižaza infiernuquin žejlcan, kaaquiči, nižaza ižke kjojaquiči.

TUNCA TURAKANACŽ QUINTU

25 ¹'Tii zakal chiyučha. Arajpach Yooz mantis puntuqui jalla tužučha. Tunca turtakanacaqui micha

tanžcu tsjii zalzñi tjowžquin ojkcichiča.

²Pjijskaltanaqui ima ojkan ana zuma tantiichiča. Tsjii pjijskaltanaqui zuma listu tjaczitača. ³Nii pjijskaltan ana zuma tantiitazzi turtakanacazti michaka chjitchiča, ana iya parafina chjitchiča, tsjiiztan camzjapaqui. ⁴Nii pjijskaltan zuma listu ojchinacaqui wila camzjapami parafina chjitchiča. ⁵Nii zalzñi tjowaqui ana uri tjonchiča. Jalla nižtiquiztan tjai tjonkatchiča tjappacha. Nižaza tajchiča. ⁶Jalla nekztanaqui chica arama kjawñi jora nonziča, tuž cjican: “Cherzna. Zalzñi tjowa tjonžca. Ulanžca nižaza risiwžca”.

⁷Tjapa nii turtakanacaqui žaaziča, nižaza micha teejapa tjacziča. ⁸Niž upaquiztanalla nii pjijskaltan ana zuma tantiyazzi turtakanacaqui tsjii pjijskaltan turtakanacžquiz cjichiča, “Parafina tojnalla, wejtnaca parafina upziča. Nižaza wejtnaca micha tjessa”. ⁹Pero nii walja tantiitazzi turtakanacaqui tuž kjaaziča: “Ana atchuca. Wejtnacaltami ančhucaltami anaž wacasača. Jalla nižtiquiztan ančhucadž oka, jakziquin parafina tujčaja, jalla nicju. Ančhucaltajapa kjayžca”. ¹⁰Nii pjijskaltan turtakanacadž parafina kjayi ojktan, zalzñi tjowaqui irantižquichiča. Nekztan nii tantitazzi turtakanacaqui zalzñi tjowžtan kjuyquiz luzziča, zalz pijsta paazjapa. Jalla nekztanaqui kjuya chawcziča. ¹¹Wiruñauqui nii kjayi ojkcichi turtakanacaqui quejpžquichiča, tuž cjican: “Wejt Jiliri, Wejt Jiliri, cjetznalla, cjetznalla”. ¹²Pero niiqui kjaaziča, tuž cjican: “Ančhuc anal pajucha”.

¹³Jalla nižtiquiztan Jesusaqui ninacžquiz chiižinchiča tuž cjican:
—Anchucqui walja zuma listu tjacziž cjequiča. Wejt tjonz tjuñi orami ana zizza.

TJAATA PAAZNACA QUINTU

¹⁴‘Arajpach Yooz kamañaqui jalla tužuča. Tsjii žoñiqui jiczquin ojczjen, niiž piyunanaca kjawziča. Piyunanacžquiz paaz tjiiziča.

¹⁵‘Tsjii tsjiizquiz pjijska warank paaznaca tjaachiča. Tsjiizquiz paa warank paaznaca tjaachiča. Tsjiizquizqui tsjii warank paaznaca tjaachiča. Zapa maynižquiz ninacžnegocio paaz atñi jama tjaachiča. Jalla nekztanaqui ojkcichiča. ¹⁶Nii tsjii pjijska warank paaznaca tanzñi piyunaqui paaztan negocio paachiča. Jalla nuž pažcu tsjii pjijska warank paaznacžtan canchiča. ¹⁷Nižazakaz nii tsjii paa warank paaznaca tanzñi piyunaqui paaztan negocio paachiča. Jalla nuž pažcu tsjii paa warank paaznacžtan canchizakazza. ¹⁸Nii tsjii warankalla paaznaca tanzñi piyunazti patrunž paaz chjojziča. Yokquiz ojt jwetžcu, jalla nekz chjojziča.

¹⁹‘Ažktan niiž wiruñ nii paaz kajžñi patruaqui quejpžquichiča. Jalla nekztanaqui piyunanacžquiztan kaja cobrichiča. ²⁰Primuruqui nii tsjii pjijska warank paaznaca tanzñiqui tjonchiča. Jalla niiqui patrunžquiz paaznaca intirjichiča, tuž cjican: “Wejt Jiliri, wejtquiz pjijska warank paaznaca tjaachamča. Nii paaztan trabajžcu, iya pijisk warank paaztan canchinča. Jalla tiiča amiž tjaatami nižaza weriž cantami”. ²¹Patrunaqui nižquiz cjichiča: “Walikazza. Amqui ancha zuma piyunamča. Zuma trabajchamča. Zkoluc paaz zuma trabajtiquiztan, jaziqui juc’anti paaznaca amquiz cumpjiyača”. Nižaza cjichiča: “Luzca. Wejtjan chica chjipzna. Cuntintum cjee”. ²²Jalla niiž wiruñ nii tsjii paa warank paaznaca tanzñi piyunaqui tjonchiča,

tuž cjan: “Wejt Jiliri. Wejtquiz paa warank paaznaca tjaachamčha. Iya tsjii paa warank paazan canchinčha. Jalla tiičha amiž tjaatami nižaza weriž cantami”. ²³Niž patrunaqui nižquin cjichičha: “Walikazza. Amqui ancha zuma piyunamčha. Zuma trabajchamčha. Zkoluc paaz zuma trabajtiquiztan, jaziqui juc'anti paaznaca amquiz cumpjiyačha”. Nižaza cjichičha: “Luzca. Wejttan chica chjipzna. Cuntintum cjee”. ²⁴Pero nekztan nii tsjii warank paaznaca tanzni piyunaqui tjonchičha. Niiqui patrunžquiz cjichičha: “Wejt Jiliri. Amqui c'ar patrunamčha. Jalla nii zizzatučha. Amqui ana čjulumi paažcumi canñamčha. Nižaza ana čhjaczćumi, ajžñamčha. ²⁵Jalla nižtiquiztan ekzinčha, nižaza ojķzcu am paaznaca yokquiz chjojchinčha. Pero tekziž am paazqui”. ²⁶Patrunaqui nii piyunžquiz tuž kjaazičha: “Ana zum piyuna. Jayri piyuna. Wejrqui ana čhjaczću ajžñinpančha, nižaza ana čjulumi paažcu canñpančha. Jalla nižtapanim zizla amqui. ²⁷Jalla nižtiquiztan wejt paaz bancuquiz mekaz uchanchucataž, jalla. Jalla nuž paatasaz niiqui, wejrqui quejpžcu bancuquiztan paaz majchtanpacha ricujtasachha”. ²⁸Jalla nekztanaqui nii patrunaqui nekzi žejlñi žoñinaczquiz cjichičha: “Tii piyunžquiztan nii warank paaznaca kjaña. Nii tunca warank paaznacchiz piyunžquiz tjaa. ²⁹Jakziltat želinchižlaja, jalla nižquiz iya tjaataž cjequičha, jilacama. Nižaza jakziltat zkoluc želinchižlaja, nižaza ana zuma trabajchižlaja, jalla nižquiztan tjappacha kjañtaž cjequičha. ³⁰Tii ana zum piyuna chjatkata, zawncta zumchiquin. Jalla nicju kaaquičha, nižaza ižke kjojaquičha”.

ŽOÑINACA PJALŽTAŽ CJEQUIČHA

³¹‘Wejrqui tsewtan cuchanzquita Yooz Žoñtčha. Tsjii nooiqui wejrqui wila tjonachha, wejt azi tjeežcan. Rey cjita Jiliri cjeečha. Tjapa wejt anjilnacžtanpacha tjonachha. Poderchiz tjonachha žoñinaca pjalzjapa. Tsjan chekan juez Jiliritčha wejrqui. ³²Wejt yujcquin tjapa tii muntuquiz kamñi žoñinaca juntjaptaž cjequičha. Jalla nekztanaqui wejrqui ninaca pjalznačha, jaknužt tsjii awatiriqui uua yekja nižaza cabra yekja pjalznačhaja, jalla nuž. ³³Pjalžcu uuzanacaqui žew latuquiz cjequičha, cabranacazti zkar latuquiz cjequičha. ³⁴Wejrtčha chekan juez jiliritqui. Nekztanaqui wejt žew latu pjalzťanaczquiz tuž cjeečha: “Wejt Epiž k'aachita žoñinaca, pichalla ančhucalta tjaczta kamaña tanzjapa. Tii muntu paata ora, niwjťanpacha ančhucalta nii kamaña tjaczťachha, Yooztan kamzjapa, nii kjuychiz familia cjisjapa”. ³⁵Nižaza cjeečha, “Ančhucqui zumanaca paachinčhucčha. Weriz čhjeri eecsiž cjen, ančhucqui wejtquiz čhjeri tjaachinčhucčha. Nižaza weriž kjaz pecan, ančhucqui wejtquiz kjaz onanchinčhucčha. Nižaza yekja yokquin ojklayan, ančhucqui wejtquiz tjajz kjuyquiz kjawzinčhucčha. ³⁶Weriz ana zquitchiz cjen ančhucqui zquiti onanchinčhucčha. Nižaza laaquichi cjen, wejtquin tjonzinčhucčha. Nižaza carsilquiz chajwcta cjen, ančhucqui wejtquin cheržni tjonchinčhucčha”. ³⁷Jalla nekztanaqui zuma kamañchiz žoñinacqui wejtquin cjequičha: “Wejt Jiliri, ččjulora am čhjeri eecsi cherchintaya? Nižaza čhjeri lujljapa, ččjulora onanchintaya? Ččjulora am kjaz pecan, onanchintaya? ³⁸Ččjulora am yekja yokquin

ojklayan tjaiz kjuyquiz kjawzintaya? ĆĤjulora am ana zquitchiz cjen, zquiti onanchintaya? ³⁹Niżaza ĆĤjulora am laaquichi cjen, tjonzintaya? ĆĤjulora am carsilquiz cjen, amquin tjonzintaya?” ⁴⁰Jalla nekztanaqui zuma kamañchiz žoñinacžquiz kjaaznaĉha, tuž cjican: “Anchucaquiz weraral cjiwĉha. Wejrtĉha chekan juez Jiliritqui. ĆĤjulora wejt jilanacžquiz yanapĉhaja, humilde jilanacž cjenami, jalla niiqui wejtquiztakaz yanapchinĉhucĉha”. Nuž chiyāĉha pjalz tjuñquiz.

⁴¹Jalla nekztanaqui wejrqui, chawc juez Jiliri cjican, nii zkar latu pjalžtanacžquiz cjeeĉha: “Anĉhucqui, Yoozqui anĉhuca quintrāĉha. Jaziqui wejtquiztanž infiernuquin oka. Diablužtami niiž anjilanaĉžtami tjaczaĉha nii infiernuqui. Anĉhucqui zakaz nii infiernuquin wiñaya sufraquiĉha. ⁴²Weriž ĉheriž eeciž cjen, anĉhucqui ana wejtquiz ĉĥjeri onanchinĉhucĉha. Weriž kjaz pecan, anĉhucqui ana wejtquiz kjaz onanchinĉhucĉha. ⁴³Weriž yekja yokquin ojklayan, ana tjaiz kjuyquiz kjawzinĉhucĉha. Weriž ana zquitchiz cjen, ana zquiti onanchinĉhucĉha. Weriž laa cjen, niżaza carsilquiz cjen, anĉhucqui ana wejr cherzñi tjonzinĉhucĉha”. ⁴⁴Jalla nekztanaqui ninacaqui cjequiĉha: “Wejt Jiliri, ĆĤjulora am ĉĥjeri eeci cjen, kjaz pecchi cjenami, yekja yokquin ojklaychi cjen, ana zquitchiz cjen, laa cjen, carsilquiz chawĉta cjen, jalla ĉĥjulora am nižta cherchintaya? Nižta chertuĉhaja, yanaptasaĉha”. ⁴⁵Jalla nektanaqui wejrqui, chawc juez Jiliri cjican, ninacžquiz kjaaznaĉha, tuž cjican: “Anchucaquiz weraral cjiwĉha. ĆĤjulora wejt jilanacžquiz humilde cjenami ana yanapchižlaja,

wejtquiztakaz ana yanapchinĉhucĉha”. ⁴⁶Jalla nekztanaqui nii ana zuma kamañchiz žoñinacaqui infiernuquin cuchantaž cjequiĉha, wiñaya casticta cjisjapa. Nii zuma kamañchiz žoñinacazti Yooztan chica wiñaya kamzjapa okaquiĉha.

JESUSA TANZ TANTIITA

26 ¹Tjappacha nii chiitanaca žeržcu, Jesusaqui niiž tjaajinta žoñinacžquiz cjichiĉha:

²—Anĉhucqui zizza, puc majĉha pascua pijjstaqui. Jalla nii pijjsta ora wejrqui intirjital cjeeĉha cruzquiz ch'awĉta cjisjapa. —Jalla nuž cjichiĉha Jesusaqui.

³Jalla nii oraqui timplu jilirinacami, liy tjaajiñi maestrunacami judío wajtchiz jilirinacami ajcziĉha, Caifās jilirž kjuy patiuquiz. Caifās cjitaqui timplu jilirinacžquiztan chawc jiliritaĉha. ⁴Jalla nicju ninacaqui palt'ichiĉha, niżaza kazziĉha mañžtan Jesusa tanzjapa. Jalla nuž tanžcu, Jesusa conzjapa kazziĉha. ⁵Nuž kazcu tuž cjichiĉha:

—Pijjsta paan Jesusa tanz anaž cjichuca. Žoñinacaqui aptjapznasaĉha.

JESUSIŽ ACHQUIZ ASIITI ALZTA

⁶Jesusaqui Betania wajtquiz želatĉha, Simonž kjuyquiz. Niiž tuquiqui Simonaqui janchi mojkchi laataĉha. ⁷Jalla nekz želan, tsjaa maatak žonqui Jesusižquiz macjatžquichinĉha. Naaqui tsjii putilla ĉĥjitchinĉha. Nii putillquiz cuza mazk'a ulurchiz asiiti želatĉha, anĉha jila walurchiz. Nii putilltaĉha zuma alabastro cjita maztan paataqui. Jesusa mizquiz želan naa maatak žonqui niiž achquiz zuma asiiti alžinchinĉha. ⁸Niiž tjaajintanacaqui nii cheržcu, žawjziĉha, naa žoña quintrā. Jalla nekztan tuž cjichiĉha:

—¿Kjažtiquiztan tii walurchiz asiiti pertejo? ⁹Jalla tiiqui antis tuychucatacha walja jiluñ, nižaza pori žoñinacžquiz yanapzjapa.

¹⁰Jesusaqui nii chiiñi nonžcu tjaajintanacžquiz ujziča:

—¿Kjažtiquiztan taa žonatan chjiicjisejo? Anača taa žon kjaž cjisqui. Jalla tuž taa žoñaz paataqui wejtquiztan walikazza. ¹¹Porinacžquiz yanapz pecaquiz niiqui, porinacaqui ančhucatan panž želaquiča. Wejrzi ančhucatan ana žejlztanpanča.

¹²Jalla taa maatak žoñqui wejtquiz tii zuma ulurchiz asiiti alžinžcu, wejt curpu tjaczinča, tjatta cjisjapa.

¹³Ančhucaquiz weraral cjiwča. Jakziquinami tii muntuquiziqui liwriiñi Yooz taku parlita cječhaja, jalla nižtazakaz taa maatak žoñaz paataqui parlita zakaz cjequiča, jalla naaquiztan cjuñta cjisjapa.

JUDASQUI JESUS TARAZUNAQUIČHA

¹⁴Tuncapan illzta žoñinacžquiztan tsjiiqui Judas Iscariote cjitatača. Jalla niiqui ojkičiča timplu jilirinacžtan parli. ¹⁵Jalla nuž parlican cjičiča:

—Ančhucaquiz Jesusal intirjasaz niiqui, ančhucqui čkjaž paaz pacas?

Jalla nii orapacha quinsa tunc paaznaca Judasquiz pacčiča. ¹⁶Jalla nužquiz Judasqui čjulorat Jesusa tankachuca cječhaja, jalla nii ora walja kjurchiča.

SANTA CENA PAACHIČHA

¹⁷Jalla nekztanaqui ana liwaturžtan t'anta lujlz pijjzta, jalla nii pijjztaž primir tjuñquiz tjaajinta žoñinacaqui Jesusižquin macjatžcu tuž pewcziča:

—¿Jakziquin wejrnacqui tjaczni ojks pecya, pascu čjheri lujlzpajaya?

¹⁸Jesusaqui tuž kjaaziča:

—Watja oka. Tsjii žoñžtan zalaquiča. Niižquiz cjee, “Maestruqui ž-cjiča. ‘Wejt ticz ora wajillača. Am kjuyquiz pascua pijjzta paača wejt tjaajinta žoñinacžtan’ ”.

¹⁹Nekztanaqui Jesusaž mantitacama ojkičiča. Nii tokintz'tita kjuyquiz pascu čjheri tjaczīča.

²⁰Weenjapa cjistana Jesusaqui nii kjuyquiz žejlcan mizquiz julziča niiž tuncapan tjaajinta žoñinacžtan. ²¹Jalla nuž čjheri lujlcan, ninacžquiz cjičiča:

—Ančhucaquiz weraral cjiwča. Tsjii tsjii ančhucqui wejt quintrā paaquiča, nižaza tarazunaquiča.

²²Jalla nuž čhiitiquiztan tjaajinta žoñinacaqui walja llaquita cjišiča. Jalla nekztan ninacaqui tsjiiza tsjiiza pewcziča, tuž cjičan:

—Wejt Jiliri, čwejr cjesajo?

²³Nekztanaqui Jesusaqui tuž kjaaziča:

—Anziqui wejttañ čicaž tii chuwwquiztan lujlča nii tarazunñi žoñiqui. ²⁴Wejrqui tsewtan cuchanžquita Yooz Žoñtča. Jaknužt cjiirta Yooz takuquī cjičhaja, jalla niicama okača. Nii tarazunñi žoñiqui anaj maa pjuchquiztan nastčhaja, waliž cjitasača niižtaquī. Wejr tarazuntiquiztan wali chawc ujchiz cjequiča.

²⁵Jalla nekztanaqui Judasqui, nii tarazunñi žoñiqui, tuž cjičiča:

—Maestro, čwejr cjesajo?

Jesusaqui tuž kjaaziča:

—Jesalla, amchiya.

²⁶Jalla nuž pascua čjheri lujlcan Jesusaqui niiz persun kjaržtan t'anta tanzīča. Nekztan Yooz Ejpžquin gracias cjičan tjaazč, t'anta kjolziča. Jalla nuž kjolžcu, niiz tjaajinta žoñinacžquiz tjaachiča, tuž cjičan:

—Lujlzna. Jalla tiīča wejt curpu cuntaquī.

²⁷ Jalla nekztan persun kjaržtan tsjii wazu tanzicha. Yooz Epžquin gracias cjican tjaachizakazza. Nekztan tjaajinta žoñinacžquin čhjalžcu zapa mayni licchicha. Jalla nuž čhjalžcu, tuž cjichicha:

—Tii wazquiztan tjapa ančhucqui liczna. ²⁸ Wejt ljocquiztanž cjicha tiiqui. Wejt ljocžtan tsjii ew acta tjułžtaž cjequicha. Wacchi žoñinacž laycu wejt ljocqui tjawktaž cjequicha ninacž uj pertunta cjisjapa. ²⁹ Wejr cjiwcha. Uwas kjaz ana iya licača, čhjulorcama wejt Yooz Ejp tjapa mantačhaja, jalla nekztan ančhucatan wilta uwas kjaz licača.

TJAAJINTA ŽOÑINACAQUI WICHANZNAQUIČHA

³⁰ Nekztan Yooz wirzu itzcu, Olivos cjita curulla ojkcichicha. ³¹ Jalla nekztanaqui Jesusaqui niž tjaajinta žoñinacžquiz tuž cjichicha:

—Jalla tii weenqui tantal cjeecha. Nekztan tjapa ančhucqui ana wejtquin kuzziz tucaquicha. Jalla nuzpan cjiirta Yooz takuqui cjicha: “Uza awatiri contanaqui uuzanacaqui wichanznaquicha”. ³² Wejr jacatatžcuqui ančuca tuqui okayača Galilea cjita yoka.

³³ Nekztanaqui Pedruqui cjichicha:

—Tjappacha ana amquin kuzziz tucačhani. Wejrzi ana wira niža cjesača.

³⁴ Jalla nuž chiitiquiztan Jesusaqui tuž kjaaziča:

—Amquiz weraral cjiwcha. Jalla tii weenpacha čhjep wilta amqui ana wejr pajni chiican k'otaquicha, ima wallpaž klawan.

³⁵ Nekztan Pedruqui Jesusižquiz kjaaziča, tuž cjican:

—Wejrqui amtan chicami waztal ticznasača. Anapan amquiztan k'otasača.

Nižaza tjapa nii tjaajintanacaqui tsjiika chiichicha.

JESUSAQUI GETSEMANI CJITA YOKQUINČHA

³⁶ Jalla nekztan Jesusaqui niž tjaajintanacžtan Getsemaní cjita yoka irantichicha. Jalla niwjc irantižcu, ninacžquiz cjichicha:

—Tekz julzna ančhucqui. Wejrqui nii nawcju Yooz Ejpžtan parli okača.

³⁷ Jalla nekztan Pedružtan nižaza Zebedeož pucultan majchnacžtan chjitchicha. Nekztanaqui Jesusaqui kuzquiz walja llaquisatča, nižaza anchaž llactazatča. ³⁸ Jalla nižtiquiztan Jesusaqui nii čhjepultan chjichta tjaajintanacžquiziqui cjichicha: —Wejt kuzqui ancha llaquissa, ticzmayača. Ančhucqui tekzi žela. Wilaquicha, anača tjajaquicha.

³⁹ Jalla nekztanaqui Jesusaqui tsjii koluc nawjchuc ojkcichicha. Yokquizkaz tuzi t'okžcu Yoozquin mayizichicha, tuž cjican:

—Wejt Yooz Ejp. Tii juc'ant sufris timpu anal watz pecuča. Tii sufrisquiztan liwriichucažlaj niiqui, amqui wejr liwriyalla. Pero anal wejt kuzcama cjis pecuča. Antiz jaknužt am kuz amtičhaja, am munañpakaj cjila.

⁴⁰ Jalla nekztanaqui tjaajintanacžquin quejpžquichicha. Tjajchi zalchicha. Jaziqui Jesusaqui Pedružquiz cjichicha:

—¿Ančhucqui anapanz wejttañ tsjii orami wilasi atya? ⁴¹ Tjaji watzi žela, nižaza wilazaquicha. Yoozquin mayizaquicha, ana ujqiz tjojtsjapa. Chekapan, ančuca kuzqui wilasača. Pero ančuca curpuzi anaž awantasača.

⁴² Nekztan Jesusaqui wilta Yooztan parli ojkcichicha. Tuž cjican, mayizichicha:

—Wejt Yooz Ejp, tii sufrisquiztan ana liwriita cjichucažlaj niiqui, am kuz munañpaj cjila.

⁴³Nekztan wilta tjaajintanacžquin quejpžcu tjaichi zalchiča. Ancha tjaji tjonatča. ⁴⁴Čjepquiziqui wilta ninacžquiztan ojkchiča, Yooz Ejpžquin parli. Primiru jaknužt parličhaja, jalla nuž zakaz parličhiča. ⁴⁵Jalla nekztanaqui tjaajintanacžquin quejpciča. Ninacžquin paljaychiča, tuž cjican:

—Jaziqui tjaichinčhucča ančhucqui, nižaza jeejzinčhucča. Nužukazza. Wejrqui ujchiz žoñinacž kjarquiz intirjital cjeeča. Anz nii ora irjatžquiča. ⁴⁶Žaazna. Ojkla. Wejr tankatñi žoñiqui nii najwcž tjonča.

JESUSA PRESO CHJICHTA

⁴⁷Jesusa nuž chiyan, Judasqui irantižquichiča. Niitača Jesusiž tuncapan illzta žoñinacžquiztanqui. Judastan tama žoñinacaqui tjonchiča pajk cuchillunacchiz, nižaza wjajtz carotinacchiz. Timplu jilirinacami wajt jilirinacami ninaca cuhanžquichiča. ⁴⁸Tarazunñi Judasqui niž tuquilla nii žoñinacžtan kazzitača, tuž cjican:

—Wejrqui nii žoñžquiz chjulznača. Jalla niž cjequiča nii žoñiqui. Jalla nekztan zuma tanžcu chjichaquiča.

⁴⁹Jalla nuž kazcu Judasqui Jesusižquiz macjatchiča, tuž cjican:

—Tjaajiñi Maestru, čwalikazkay?

Jalla nuž tsaanžcu, chjulziča.

⁵⁰Jesusaqui nižquiz kjaaziča, tuž cjican:

—Jila, ččhjulquin am tjonjo?

Jalla nekztanaqui žoñinacaqui čcatžinžquichiča, nižaza preso chjichi tanchiča.

⁵¹Jalla nuž paan, tsjii tsjii Jesusiž tjaajinta žoñiqui pajk cuchillu joožcu, quintri žoñž cjuñi čhajtžinchiča. Nii

cjuñi čhajtžinta žoñiqui timplu jilirž piyunatača. ⁵²Jalla nekztan Jesusaqui tuž cjichiča:

—Am pajk cuchillu čhjojzna, nii cuchill čhjojzquiz. Jakziltat pajk cuchillu joojoočhaja, jalla ninacaqui pajk cuchillžtan conta zakaz cjequiča. ⁵³Wejt Yooz Ejpžquiztan mayasača, wejtquiz yanapžjapa. Jalla nuž maytiquiztan wejt Yooz Ejpqui anzpachaž wacchi anjilanaca cuhanžcasača, tuncapan walja tama ejércitonacacama. ¿Nii ana zizya? ⁵⁴Pero jalla nižta anal mayača. Jalla tižta watstanča, jaknužt cjiirta Yooz taku chiičhaja, jalla nii cumplistanča.

⁵⁵Jalla nekztanaqui Jesusaqui nii tjonchi žoñinacžquiz cjichiča:

—Ančhucqui pajk cuchillunacžtan wjajtz carotinacžtan wejr tani tjonchinčhucča, wejr tjañi cjes, nižtažtakaz. ¿Kjažtiquiztan nižta tjonchinčhuctajo? Zapurupan ančhucatan žejlchinča, timpluquiz tjaajincan. Jalla nii oranacaqui anaž wejr tanchinčhucča. ⁵⁶Tjapa tii watñinacaqui jaknužt tuquita profetanazaž cjiirčhaja, jalla niit jama cumplistanča.

Jalla nekztanaqui tjapa Jesusiž tjaajinta žoñinacaqui tsucaña wichanziča. Jesusa zinalla ecchiča.

CHAWC JILIRINACŽ YUJCQUIN CHJICHTA

⁵⁷Jalla nii Jesusa tanñi žoñinacaqui Caifás cjita jiliržquin chjitchiča. Caifasqui timplu jilirinacž chawc jiliritača. Caifás kjuyquin liy tjaajiñi maestrunacami wajt jilirinacami ajczitača. ⁵⁸Pedruqui nii chawc jilirž kjuy patiuacama apziča ažquiztanalla. Nii patiuquin luzcu, julzi želatča wijilñi policianacžtan. Jaknužt Jesusa watčhaja, jalla nii cherzjapa želatča.

⁵⁹Timplu jilirinacami, wajt jilirinacami, tjapa mantiñi jilirinacami Jesusiž quintra uj jwes pecatča, toscaraz cjenacui, conkatzjapa.

⁶⁰Wacchi žoñinacami toscar tawkžtan prisintižquichiča Jesusiž quintra uj tjojtunzjapa. Pero ana čjul uj jwesi atchiča. Ultimquiziqui pucultan toscar tisticunacacui apantižquichiča, ⁶¹tuž cjan:

—Tii žoñiqui cjiñiča, “Yooz timplu t'ezinžu, čjep majquiz wiltal tsjtsnasača”.

⁶²Jalla nekztanacui timplu chawc jiliriqui tsjtsiča. Jesusižquiz cjichiča:

¿Kjažtiqiztan am ana kjaazjo? ¿Kjaž cjan tii žoñinacacui am quintra chiijo?

⁶³Jalla nuž chiižinanami Jesusacui ch'uju žejlchiča. Jalla nekztanacui nii timplu chawc jiliriqui nižquiz cjichizakazza:

—Žejtñi Yooz tjuuquiz am juramintu paakatača, werara chiizjapa. Mazna. ¿Amqui Cristumkaya? ¿Nižaza Yooz Majchpanikaya?

⁶⁴Jesusaqui kjaaziča, tuž cjan:

—Wejrčhay. Amqui jaknužum chiičhaja, jalla nužuča. Wejr zakal ančhucaquiz cjeeča. Wejrqui tsewctan cuchanžquita Yooz Žoñtča. Tsji noojiqui ančhucui wejr cheraquičha, juc'anti azziz Yoož žew latuquiz julzi. Nižaza arajpachquiztan tsjir taypiquiz wilta tjonača.

⁶⁵Jalla nuž kjaaztiqiztan timplu chawc jiliriqui niž persun zquiti wjajržinchiča, žawjchi kjanapacha tjeezjapa. Nižaza cjichiča:

—Tii žoñiqui persun tawkžtan Yooz quintra chiichiča. ¿Kjažt iya tisticunaca pecznasajo? Ančhucpacha tiiž ana wal takunaca nonzinčhucča. ⁶⁶¿Kjažtat cjees?

Ninacacui kjaaziča, tuž cjan:
—Tiiqui ujchizpanča. Paj ticzla.

⁶⁷Jalla nekztanacui Jesusiž yujcquiz llawžižtan tjujti kallantichiča, nižaza wjajtchiča. Partinacacui yujcquiz čhajcziča, ⁶⁸tuž cjan:

—Amqui Cristumžlaj niiqui, jazic ¿jequit am čhajcjo? Jalla nii pajalla.

PEDRUQUI K'OTCHIČHA

⁶⁹Nii ora Pedruqui zancu kjuy patiuquin julzi želatča. Nekž želan tsjaa piyuniqui nižquiz macjatžcu paljaychinča, tuž cjan:

—Amqui ojklajñamla nii Galilea yokchiz Jesusižtan, čana jaa?

⁷⁰Pedruqui parti žoñinacž yujcquiz k'otchiča, tuž cjan:

—Čjulquiztankam chiičhani, anal intintazuča.

⁷¹Nekztanacui Pedruqui zan kjutñi žcatžinchiča. Nekžtan tsjaa piyuniqui nii cheržcu parti žoñinacžquiz cjichinča:

—Tii žoñipan ojklayatla tii Nazaret wajtchiz Jesusižtan chica.

⁷²Pedruqui wilta k'otchiča.

Juramintužtan tuž cjichiča:

—Nii žoñi anapan pajuča.

⁷³Jalla niž upaquiztan nekž žejlñi žoñinacacui Pedružquiz macjatžcu, cjichizakazza:

—Chekapan, amqui zakaz Jesusiž parti žoñinacžtan chica ojklajñamla. Am takuqui kjanapachala, ninacaz takukam chiila.

⁷⁴Nekztanacui Pedruqui wilta k'otchiča, juramintu paacan.

—Anapal nii žoñi pajuča. Toscara chiičinžlaj niiqui, Yoož wejr casticačhani. —Nuž cjichiča Pedruqui. Jalla nii orapacha tsji wallpi jora kjawchiča. ⁷⁵Jalla nii wallpa kjawñi nonžcu, Pedruqui Jesusiž chiita taku cjuñziča. Niiž tuquiqui Jesusacui

cjichiċha: “Ima wallpaž kjawan, ċhejp wilta amqui ana wejr pajñi chiican k'otaquiċha”. Jalla nuž cjuñžcu Pedruqui nekztan ulanchiċha. Nižaza walja kuzquiz sint'ican kaachiċha.

JESUSAQUI CHAWC JILIRIŽQUIN CHJICHTA

27 ¹Kjanžqitan tjapa timplu jilirinacami, wajtchiz jilirinacami tsjii acuerduquiz luzziċha Jesusa conkatzjapa. ²Jalla nekztan Jesusa chejlžcu ċhjitchiċha Poncio Pilato ċjita chawc jiliržquin. Nii oraqui naciona mantiñi gubernutaċha Pilatuqui.

JUDASQUI TICZIĊHA

³Jesusa tarazunñi Judasqui Jesusa conata cheržcu, kuzquiz walja sint'ichiċha. Jalla nuž sint'ižcu nii quinsa tunc tjaata paaz tjepunchiċha timplu jilirinacžquizimi wajtchiz jilirinacžquizimi. ⁴Paaz tjepunžcu, tuž cjichiċha:

—Wejr uj paachinċha. Ana ċhjul ujchiz žoñi tarazunchinċha.

Ninacazti nižquiz tuž kjaaziċha:

—Jalla niiqui, ċċhjul importejo wejtnacaquiztanajo? Niiqui amtakazza.

⁵Jalla nekztanaqui Judasqui timpluquinpacha nii paaz tjojtunchiċha. Nekztan ojkchiċha. Persunpacha jora mokžcu, tsjijspu ticziċha.

⁶Nekztanaqui timplu jilirinacaqui paaz ricujžcu, tuž cjichiċha:

—Tii paazqui anaž uċhumqui ofrend cajquiz uhasaċha. Tiiċha žoñž ljok kajta paazqui.

⁷Nekztanaqui ninacaqui kazziċha nii paaztan yoka kajyzjapa. Nii yokaqui Campo del Alfarero nižta ċjita tjuuchiztaċha. Yekja wajtchiz ticzi žoñinaca tjatzjapataċha nii yokaqui. ⁸Nužquiz tii timpucama nii

yokž tsjii tjuuqui Campo de Sangre ċjitazakaztaċha. ⁹Jalla nuž Jeremías profetž takuqui cumplissiċha. Tuqui timpu Jeremiasqui ċjiyrchiċha, tuž ċjican: “Israel žoñinacaqui nii žoñi tankatz precio utchiċha, quinsa tunc paaznaca, jalla nii. ¹⁰Nii quinsa tunc paaznacžtan Campo del Alfarero ċjita yoka kjayaquiċha, jaknužt Yooz Jiliriz mantiċhaja, jalla nuž”.

JESUSAQUI CHAWC JILIRŽ YUJCQUIN ŽEJLĊHA

¹¹Nekztanaqui Jesusaqui naciona mantiñi chawc jiliržquin ċhjichtataċha. Nii mantiñi jiliriqui Jesusižquiz tuž pewcziċha:

—ĈAmqui judionacž chawc jilirimkaya?

Jesusaqui tuž kjaaziċha:

—Am jaknužum ċhiċhaja, nužuċha.

¹²Timplu jilirinacami wajtchiz jilirinacami, jalla ninacaž uj tjojtuntan, Jesusaqui anaž ċhjulumi kjaaziċha.

¹³Jalla nekztanaqui Pilato jiliriqui tuž cjichiċha:

—ĈAnam am kjaaznaquiya tjapa tii am quintra ċhiyanaqui?

¹⁴Jesusazti jalla nuž ċhiyanami ana ċhjulumi kjaaziċha. Jalla nižtiquiztan nii mantiñi chawc jiliriqui ispantichiċha. Ana ċhjul pinsimi atchiċha.

¹⁵Jalla nii pascu pijjztiquiz Pilato chawc jiliriqui tsjii cuzturumpichiztaċha. Tsjii priz žoñiqui cutzpanikaztaċha žoñinacž ċhiitacama. ¹⁶Tsjii ana wal žoñiqui Barrabás ċjita prisu zakaztaċha. ¹⁷Žoñinaca ajcziž ċjen Pilatuqui ninacžquiz pewcziċha, tuž ċjican:

—ĈJakzilta tii tanta žoñinacat liwrii cutžta ċjeequi? ĈBarrabás ċjeequi? už ĈJesús, Cristo ċjita ċjeeja?

¹⁸Pilato jiliriqui zizziċha, Jesusa ċhjaawjcu judío žoñinacaqui nii intirjichiċha, jalla nii.

¹⁹ Pilatuqui niiz jusjiis mizquiz julzi želatča. Jalla nicju želan niiz tjunqui tsjii žoñi mazñi cuchanžquichinča. Nii mazñi žoñiqui tuž chiichiča: “Am tjun cjiča: ‘Nii zuma žoñžquiz ana mitisaquiča. Nii žoñiž cjen tižwan juc’ant ana wali čhuuzinča. Nii žoñžquiz ana mitis waquiziča’”.

²⁰ Pero timplu jilirinacami wajtchiz jilirinacami, nii žejlñi žoñinacžquiz intintiskatchiča, Barrabás cutzna cjeajo, nižaza Jesusa contaj cjila cjeajo.

²¹ Jalla nekztanaqui nii mantiñi jiliriqui wila žoñinacžquiz pewcziča, tuž cjican:

—čJakzilta pirit tii pucultan tantanacquiztan liwrii cutznaqui?

Žoñinacauki kjaaziča, tuž cjican:
—Barrabás cutzna.

²² Pilato jiliriqui wila ninacžquiz pewcziča, tuž cjican:

—Tii Cristo cjita Jesusižquiz, ččhjulut wejr paa-aqui?

Tjappacha nii žoñinacauki kjaaziča, tuž cjican:

—iCruzquiz ch’awczna!

²³ Nekztanaqui Pilato jiliriqui cjičiča:

—čČhjul uj paachi teejo?

Nii žoñinacazti juc’anti kjawchiča:

—iCruzquizka ch’awczna! —cjican.

²⁴ Jalla nekztanaqui Pilato jiliriqui nayčiča, nii žoñinaca ana intintiskatchuca. Nii žoñinacauki walja žawjchiž ch’ajrapatča. Jalla nekztanaqui Pilato jiliriqui kjaz zjičkatchiča. Nii zjičta kjazquiz kjara awjziča žoñinacž yujcquiz, tuž cjican:

—Tii zuma žoñž ticzqui anaž wejt uj cjequiča. Ančuca ujž cjequiča.

²⁵ Tjapa nii žoñinacauki kjaaziča, tuž cjican:

—Wejtnacaltazat uj cječhani, nižaza wejtnaca ocjalanacžtami.

²⁶ Jalla nekztanaqui Pilato jiliriqui Barrabás liwrii cutziča. Nekztanaqui

Jesusa wajtjzapa mantichiča.

Nižaza cruzquiz ch’awcta cjeajo, zultatunacžquiz intirjichiča.

²⁷ Jalla nekztanaqui nii mantita zultatunacauki jilirž palacio kjuyquin Jesusa chjitchiča. Nekztanaqui tjapa nii zultatž tropanaca kjawsassiča, Jesusa muytata. ²⁸ Nekztanaqui Jesusa čhjojčkichiča. Jalla nuž čhjojčkzcu tsjii ljoc murat zquti tjutziča. ²⁹ Nekztan niiz achquiz ch’ap pillužtakaz paažcu scaržinčiča, nižaza žew kjarquiz wara tanskatchiča. Jalla nuž paažcu niiz yujcquiz quillziča, tuž cjican:

—iViva tii judfo žoñinacž chawc jiliri!
—Jalla nuž čiican burla paachiča.

³⁰ Nižaza llawzižtan niizquiz tjutjčiča. Niiž kjarquiztan wara kjañcan, achquiz wajtjčiča. ³¹ Jalla nuž burla paažcu, niižquiztan ljoc murat zquti čhjojčkichiča. Nekztan wila niiz persun zquti tjutziča. Jalla nekztanaqui cruzquiz ch’awczjapa Jesusa chjitchiča.

JESUSAQUI CRUZQUIZ CH’AWCTA

³² Jalla nuž Jesusa chjichecan tsjii Cirene wajtchiz žoñi zalžquichiča. Simón cjitatača. Jalla nii žoñiqui Jesusiž cruza kuzkatchiča.

³³ Jalla nuž Gólgota cjita yokquin irantichiča. Nii yokaqui “Ach Tsjij yoka” cjitazakaztača.

³⁴ Jalla nicju tsjii vinžtan jaržtan t’ajžta lickatchiča. Pero nii mallžcu, ana licz pecchiča.

³⁵ Cruzquiz ch’awczcu, zultatunacauki Jesusiž zquti tanzjapa surtiassiča. Jalla nuž paatan profetž takuqui cumplissiča. Nii tuqita profetaqui tuž cjičiča: “Wejt zquti tanzjapa surtiasaquiča”. ³⁶ Jalla nekztanaqui nijwcpacha ninacauki wilzjapa julziča. ³⁷ Kjažtiqiztan Jesusa cruzquiz ch’awctatažlaja, jalla

nii tabliquiz cjiirtataĉha, tuž cjican, “Tiiĉha Jesusaqui, judío žoñinacž chawc jiliri”. Jalla nuž cjiiržcu ach tsewctuñ nii tabla ch'awcžinchiĉha.

³⁸Nižaza pucultan tjañinaca cruzquiz ch'awctataĉha, tsjiiqui žew latu tsjiiqui zkar latu. ³⁹Nekz watñi žoñinacaqui iñarcan, acha wewcžiñitaĉha. ⁴⁰Nižaza tuž cjichiĉha:

—Amqui cjiñamla, “Timplu t'ezinžcu ĉhjep majquiztan tsijtsnasaĉha”. Jalla nižta payi atasaz niiquei, jazic persunpacha liwriisalla. Yooz Maatimžlaj niiquei, cruzquiztan apakscu, chjiijwžcalla.

⁴¹Jalla nižta irata zakaz iñarchiĉha timplu jilirinacami, liy tjaajñi maestruncami, fariseo parti žoñinacami, wajtchiz jilirinacami. Jalla ninacaqui porapat parlassiĉha tuž cjican:

⁴²—Tiiqui yekja žoñinaca liwriiĉhiĉha, pero persunpacha anaž liwrii atĉha. Israel žoñinacž chawc jilirižlaj niiquei, cruzquiztan apakscu, chjiijwžquilla. Nekztan niizquiz criyasāĉha. ⁴³“Tiiĉha cjiñiiquei, Yoozquin tjapa kuzziztĉha. Wejrtĉha Yooz Maatiqui”, cjican. Yoozqui tii k'aachichižlaja, jaziqui anzpacha Yooz tiij liwriila.

⁴⁴Nii cruzquiz ch'awcta tjañinacami Jesusižquiz quintra chiichizakazza.

JESUSAQUI TICZIĈHA

⁴⁵Taypurquiztan majña kak oracama tjapa nii yokaqui zumchi cjissiĉha.

⁴⁶Jalla nii orapacha Jesusaqui tjapa aztan kjawchiĉha, tuž cjican:

—Elí, Elí, ĉlama sabactani? —Jalla nii takuqui cjiĉha: “Wejt Yooz, wejt Yooz, ĉkjažtiquiztan wejr jaytichamtaĉo?”

⁴⁷Yekjap nekz žejlñi žoñinacaqui jalla nii kjawñi nonžcu, cjichiĉha:

—Nonžna. Tiiqui Elías profetaž kjaw kjawla.

⁴⁸Nekztan tsjii tsjiiiquei esponja cjita kjaz ch'umñi apti zajtchiĉha. Jar vinu ch'umkatžcu zjiicĉhiĉha. Nekztanaqui war puntižtan ĉjapžcu, Jesusižquin ĉjalziĉha, liquinzjapa. ⁴⁹Parti žoñinacaqui cjichiĉha:

—Žela cjee. Antiz chekžla, Elías tii liwrii cunamit tjonaĉhan.

⁵⁰Nekztanaqui Jesusaqui altu joržtan wila kjawchiĉha. Jalla nuž kjawžcu ticziĉha. ⁵¹Jalla nii orapacha pajk timplu cortina ĉicatquiz juystokaz wjajrziĉha, tsewtan kozzuc. Nižaza yokac ĉjekinchiĉha. Nižaza cur akjinacaqui c'acchiĉha.

⁵²Nižaza sipulturanacaqui cjetsi cjissiĉha. Muzpa Yoozquin criichi ticzi žoñinacaqui jacatattiĉha. ⁵³Jesusaž jacatattiquiztan nii parti jacatatti žoñinacaqui Jerusalén wajtquiz luzquichiĉha. Jalla niĉju muzpa žoñinacaqui ninaca cherchiĉha.

⁵⁴Zultat capitanaqui nii Jesusa wijilñi zultatunacžtanpacha yoka ĉjekini cheržcu, nižaza tjapa nii watñi cheržcu, walja tsucchiĉha. Jalla nekztan cjichiĉha:

—Chekapan tii žoñiiquei werar Yooz Maatitakalala.

⁵⁵Jalla niĉju wacchi maatakanacaqui želatĉha, ažquiztan chekžcan. Nii maatakanacaqui Galilea yokquiztanpacha Jesusa apziĉha, nii atintizjapa. ⁵⁶Jalla nii maatakanacaqui tuž cjita tjunchiztaĉha: María Magdalenataĉha; nižaza Mariiquei Jacob Josež maataĉha; nižaza Zebedeož tjun želatĉha. Naaqui majchwichchiztaĉha.

JESUSIŽ CURPU TJATŽTA

⁵⁷Waj zumznan, tsjii ricach žoñi, José cjita tjonchiĉha. Arimatea

wajtchiz žoñitača. Nižaza Jesusa cumpañ'iñi žoñitača. ⁵⁸Jalla nii žoñiqui Pilato jiliržquin zali ojkcichiča. Nuž zalžcu, Jesusiž curpu maychiča. Nekztan Pilato jiliriqui mantichiča nii curpu intirjajo. ⁵⁹Josequi Jesusiž curpu chjichcu, limpu saban pañžtan capziča. ⁶⁰Niižta ew sipultura želatča, mazquiztan jwetta. Jalla nii sipulturquiz Jesusiž curpu tjatichiča. Jalla nuž tjatžcu, sipultur zana pajk maztan pjucziča. Nekztan ojkcichiča. ⁶¹Jalla nicju María Magdalena, nižaza tsjaa María julzi želatča, sipulturž yujcquiz.

SIPULTURA ZUMPACHA PJUCŽTA, NIŽAZA WIJILTA

⁶²Jakatažuqui, jeejz tjuñijapa tjacžcu, timplu jilirinacami, fariseo parti žoñinacami Pilato jiliržquin zali ojkcizakazza. ⁶³Jalla nuž zalžcu tuž cjichiča:

—Wejt Jiliri, wejrnacqui tuž cjuñžnuča. Tii toscar chiñi žoñiqui, žejtcanaqui, tuž cjichiča: “Čhjep maj ticziquiztan jacatatača wejrqui” cjican chiñitača. ⁶⁴Jalla nižtiquiztan mantižinalla čhjep majcama sipultura zumpacha wijilta cjila. Ana zuma wijilta cjequiz niiqui, niiz tjaajinta žoñinacaqui ween niiz curpu chjichi tjonasača. Jalla nekztanaqui žoñinacžquiz k'otasača: “Jesusaqui ticziquiztan jacatatchiča” cjican. Nižta toscara juc'ant anawaliz cjesača, primira toscara chiitiquiztan.

⁶⁵Jalla nekztanaqui Pilato jiliriqui ninacžquiz cjichiča:

—Jalla tekz zultatunaca žejlča wijilñijapaqui. Ančhucqui oka, nii sipultura zumpachaž chawjčza, jaknužt atčhaja, jalla nuž.

⁶⁶Jalla nekztanaqui ojčžcu, sipultura zumpacha chawjčžquichiča. Nižaza

nii chawjčžta maz latuquiz sinalt'ižcu ecchiča. Nižaza nekpacha nii sipultura wijilñi zultatunacami ecchiča.

JESUSAQUI JACATATCHIČHA

28 ¹Kjantati jeejz tjuñi watžcu María Magdalena cjitiqui tsjaa Mariatan sepultura cherni ojkcichiča, primir siman tjuñi kallžnan. ²Tsjii Yooz anjilaqui arajpachquiztan chjijwžquichiča. Nekztan yoka walja chjekinchichiča. Anjilaž nii sipultura pjucžta maz cjewžinichiqui. Nekztan Yooz anjilaqui nii maz juntuñ julziča. ³Anjilaqui ancha kjañchiča liwliwñižtakaz. Nižaza ancha chiwitača niiz zquitiqui, kjatñižtakaz. ⁴Jalla nuž cheržcu wijilñi zultatunacaqui walja tsucchiča chjekinzcama. Ticzi žoñižtakaz cjissiča. ⁵Jalla nekztanaqui nii anjilaqui maatakanacžquiz cjichiča:

—Anaž ančhuc eksna. Wejrqui zizuča, ančhucqui Jesusaž kjurča, cruzquiz ch'aweta Jesusa. ⁶Anaž tekz žejlča. Niiqui jacatatchiča, jaknužt chitčhaja, jalla nuž. Pichay, tii sipultura cherni. ⁷Nekztanaqui apuraž oka. Niiz tjaajinta žoñinacžquiz mazca, tuž cjican: “Jesusaqui ticziquiztan jacatatkaliča. Ančuca tuqui Galilea yokquin okaychiča. Jalla nicjuž ančhucqui Jesusa jacatatchi cheraquičha”. Wejrqui cuchanžquitača tii puntuquiztan ančucaquiz maznajo. —Nuž cjican paljaychiča anjilaqui.

⁸Jalla nekztanaqui sipultur kjuya cheržcu, maatakanacaqui apura ojkcichiča, ispantichi nižaza walja cuntintu. Zati pariju ojkcichiča tjaajintanacžquin mazñi. ⁹Jalla nuž okan Jesusaqui ninacžquiz parizichiča. Nekztan ninacžquiz

tsaanchiicha. Nii maatakanacaqui Jesusiŋquiz macjatŋcu rispitan, quilljatchiicha, Nekztan niŋ kjojcha ŋcojrziicha. ¹⁰ Jalla nekztanaqui Jesusaqui cjichiicha:

—Anaŋ ančhucqui eksna. Wejt jilanacŋquin mazca, Galilea yok kjutni ojkla ninacaqui. Jalla nicju ninacaqui wejr cheraquiicha. Jalla nii maznaquiicha.

ZULTATŲ QUINTU

¹¹ Jalla nuŋ nii maatakanacaŋ okan wijilni zultatunacaqui watja ojkiicha. Nekztan timplu jilirinacŋquin tjapa watchinaca quint'ichiicha. ¹² Jalla nekztanaqui timplu jilirinacaqui wajtchiz jilirinacŋquin parli ojkiicha. Nuŋ parliŋcu tsjii acuerduquiz luzziicha. Jalla nekztanaqui nii quint'ini zultatunacŋquiz paaz tjaachiicha, ¹³ tuŋ cjican:

—Ančhucqui tii wajtchiz ŋoinacŋquiz cjequiicha: “Ween wejtnacaŋ tjaan, niŋ tjaajinta ŋoinacaqui Jesusiŋ curpu kjaŋŋcu chjitchiicha”. Jalla nuŋuŋ cjequiicha. ¹⁴ Chawc jiliriqui ančucaŋ quint'ita nonznaquiŋ niiqui, wejrnacqui niŋŋtan parlača ančhucqui ana casticta cjisjapa.

¹⁵ Jalla nekztanaqui nii zultatunacaqui nii ch'iiŋzinta paaz

tanŋcu, ojkiicha. Jalla nekztan nii paaz laycu toscara chiichiicha. Jalla niŋta toscar quintu judfo ŋoinacaqui chiichiiŋiicha anz tii timpuquiziqui.

JESUSIŲ MANTITANACA

¹⁶ Jalla nii maatakanacaŋ maztiquiztan nii tuncaman tjaajinta ŋoinacaqui Galilea yoka ojkiicha, Jesusaŋ t'okinzt'ita curquin.

¹⁷ Jalla nicju Jesusa cherŋcu, niŋquiz rispitchiicha. Yekjapa kuz turwaysi zelatča, ultimu werara Jesucristo, uŋ anaj Jesucristo. ¹⁸ Jalla nekztanaqui Jesusaqui ninacŋquin macjatŋcu, tuŋ cjichiicha:

—Wejtquizpacha tjapa mantiz poder tjaatača, arajpachquin ŋejlŋinaca mantizjapami, niŋaza tii yok muntuquiz ŋejlŋinaca mantizjapami. ¹⁹ Jaziqui ančhucqui cuchnuča.

Tjapa tii muntu nacionanacŋquin oka. Tjapaman nacionchiz ŋoinacŋquiz wejtquin kuzziz cjisjapa tjaajinŋca. Niŋaza Yooz Ejp, Yooz Majch, Yooz Espiritu Santo, jalla wejtnaca tjuuŋtan criichi ŋoinaca bautizaquiicha.

²⁰ Niŋaza tjapa weriŋ mantitanaca nii ŋoinacŋquiz tjaajnaquiicha ninaca cazajo. Zapuru wejrqui ančhucatan chica cjeeča, tii muntu tucuzinŋcama. Jalla nii ančhucqui tiraŋ cjuŋaquiicha. Jalla nuŋoj cjila. Amén.